

नेपाले पिण्डपात्र प्रदान तथा सम्यक् दान धर्म याना वंगु खँ

(कपिदाज्वदान जातकमालाया छगू अंश)

सर्वानन्द नृप जातक

★ कथा ★



भाषानुवादक:-

पं. वै. आशाकाजी वज्राचार्य

प्रकाशक:-

हर्षज्योति शास्त्र

ले पिण्डपात्र प्रदान तथा सम्यक्-दान धर्म यांना वंगु खँ

(कपिदाऽवदान जातकया छगू अंश)

सर्वानन्द नृप जातक

★ कथा ★

भाषानुवादक:-

पं० वै० आशाकाजी वज्राचार्य

स० पु० अचःनति

संशोधक:-

पं० ज्ञानरत्न वज्राचार्य

का० पु० शोछे, लायकू साः

प्रकाशक:-

हर्षज्योति शाक्य

स० पु० दीपावति गुरितः

मूल्य- २।२५

बुद्ध सम्वत् - २५१२

नेपाल सम्वत् - १०८६

विक्रम सम्वत् - २०२५

श्व सफूया
सर्वाधिकार सुरक्षित
लेखक पाखें जी

प्रथम संस्करण १०००

मुद्रक-

फाइन आर्ट प्रिन्टिङ्ग प्रेस


बटु चिकंअत, कान्तिपुर।

फोन- १२०३०

कविदाऽवदान



लेखक- पं. वै. आशाकाजी वज्राचार्य



भूमिका



श्री शाक्यमुनि बुद्ध भगवानं दृष्टुं जन्मं हे प्रयत्नयानां बुद्धत्वं
पदं लानां विज्यायुं मयुं ।

वसपोलं ह्यापां ह्यापुं बोधिसत्त्वः खः । वसपोलं बुद्धत्वं एव प्राप्तं
याय्यां सागीं सय्यं युगं नित्यं असंख्यं जन्म कया प्रयत्नं याय्यां ह्यापरं
पुनया अन्ते कलिं युगया प्रथमं पादे चर्मं जन्म-जन्मं पतिं यानां वयागुं
सत्कर्म-आचरण-उद्गुणया विकाशं यानां विज्यायुं । उकिं वसपोलयात्
बोधिसत्त्वं धकां धाःगुं खः ।

बोधिया अर्थः खः बुद्धत्वं, सत्त्वया अर्थः खः प्राणी । बोधिसत्त्वः
धाःगुं हे बुद्धत्वं प्राप्तं यानां विज्यायुं ह्या प्राणी धाःगुं खः ।

वसपोलं श्री शाक्यमुनि बुद्ध भगवानया जन्म-जन्मपतियागुं
जातकं हना तःपुयात् हे जातकं माला धकां धाःगुं खः । जातकं
मालायां द्वितीयं नाम बोधिसत्त्वाज्ज्दानं माला धकां न धाःगुं दुः ।

अवदानया अर्थः खः निमंतं बुद्धं प्रशस्तं आचरणं, सुकर्मं ।
बोधिसत्त्वाज्ज्दानं माला धाःगुं हे बोधिसत्त्वया सुकर्म-माला खः ।

किन्तु वसपोलं जन्म जन्म पतिकं काय-वाक्-चित्तं याय्यिगुं दश
अपुण्यं कर्म (दियू मणिगुं जया) तोता, दश पुण्यं कर्म (विमू

भिगु ज्ञ्या) जक याना दान, शील, क्षान्ति, वीर्य, ध्यान, प्रज्ञा ध्व
षट्पारमितां पूर्ण याना, मारजित्, लोकजित् जूया नित्त ब्रह्मादि
सकल देवनागासुर मनुष्यादि सकस्यानं बुद्ध भगवान सुगत तथागत
धका धायका विज्यात ।

उर्क अवदान तथा जातक माला इत्यादि बुद्धया पूर्व (न्हापा)
जन्मयागु खे खः । बुद्ध पूर्वाऽनूस्मृति सर्वज्ञ जगद्धितैषी करुणामय खः ।

वसपोलं पूर्वजन्मया स्मृति फुकं लुपंका शिष्य वर्ग भिक्षु
संघादि सकल लोकपिण्त कना विज्याना धन ।

प्राचीन गृन्थोक्त विधेयस्त ध्वसपोल बुद्ध भगवानया दोछिगु
जातक खनेदु ।

वाङ्मयस ५४७ ग्यास वीह्लयगू, शतकाऽवदाने १०० सच्छिगु,
जातक मालास २० नीगू, महज्जातक मालास ५० मेगू, व्रताऽवदानस
१३ शिस्वंगू ।

पुनः कपिदाऽवदान, महावस्तु अवदान, भद्रकल्याऽवदान, दिव्या-
ऽवदान, द्वाविंशतिकाऽवदान, रत्नमालाऽवदान, यमद्वाराऽनुशंसाऽवदान,
विचित्रकणिकाऽवदान, चित्रविंशति अवदान, सुवर्णप्रभा सोत्तम,
गुणकारण्डव्यूह, स्वायम्भू पुराण, कल्पवृक्षा, ललितविस्तर इत्यादिस
याना २७० नित्तः व ह्लेगू । ध्व पुक्क याना १००० द्वःछिगू
जातक खनेदु ।

वसपोलया १००० द्वःछिगू जातक मध्ये विशेष याना आः
धौकह्ले धन प्रचलित जुया ख्वंगु ३२ स्वीनिगू जातकया जक धुकी
नामावली ध्वया, मेगु मरुवया ।

श्रीभगवान बुद्धया १००० द्रःछिगू जातक मध्ये

३२ स्त्रीनिगू जातकया ग्रन्थ सहित

नामावली

सत्ययुगे—

१. रूपावत जातक, उत्पलावति देशे जन्मः— दशानु रूपावत शुद्धसत्त्वं दारिद्रीनी प्रसव जूझ, नयेगु-रवनेगु छुं दे मइया पित्याना संकष्ट जुया मृत्यु ज्योत धिक्क जूझ छह्य मिसां नकतिनि थमं स्वीकाह्य कायमचा स्याना, ला-हि नयेत धिक्कयागु खना, कण्ठा तथा थःगु शरीरे घाटक याना' हि पिकया त्वंका, ला ध्यना नका, मांनं मचाजातनं रक्षा याःगु । थ्व खं दिव्याश्वदाने २२ अध्याये दु ।

२. सुप्रभास नृप जातक, सुप्रभावति देशे जन्मः— सुप्रभास राजां मनूतयेत आपानं दुःख भय त्रास बिद्या जूषि मत्ताहापि किसि-तयेत दमन याना शान्ति याःगु । थ्व खं महज्जातक मालाया ६ अध्याये व कल्पलटाया २ अध्याये दु ।

३. पुण्यवल नृप जातक, वाराणसी 'काशी' देशे जन्मः— पुण्यवल राजां हिक्क व्यादातयेत दमन याना, धर्मया मूल अहिंसा धर्म तथा, थमं दान धर्म याना स्वंगु अवस्थाप् हान मारया संग्वा पांगुघोष धाःपि ५ ग्वाह्य वया, ला, हि नये हकि धका धाःवःपिन नकेत मेपिन्त घातक मयासे थःगु शीरयागु ला, हि, दाः, छ्यंगु, मिच्छा सहितं ध्यना बिद्या युमित सन्तोष याना प्राण त्याग याना बंगु । थ्व खं म. जा. मा. ३६ अध्याये दु ।

४. धर्माकर नृप जातक, वाराणसी 'काशी' देशे जन्मः—
धर्माकर राजा देशवासी प्रजापति आपालं दश अकुशल पाप याः नृलि १२
जिनिदं तक देशे जलवृष्टि मज्जया, ह्महाकारं दुःख ज्वले सकलयात दश
कुशल कर्मया ज्ञानोपदेश दिया, पापयात दमन याता धर्म याता, जलवृष्टि
ज्वीका सकलयात रक्षा याः नृ । श्व खं म. जा. मा. ३७ अध्याये दु ।

५. दुर्धन नृप जातक, उज्जैन देशे जन्मः— दुर्धन राजा
देशे पापं दग्ध जुया १२ दं तक अनावृष्टि जूगुलि भूमि छं हे बुया
मवया, वनान्तरे चर्षि पशु—पक्षिपिनि मयेगु त्वनेगु छं हे मवया,
पशु-पक्षित सिना बंगु खना, करुणा चित्तोत्पति जुया उगु वनान्तरे
ढाही बना, थःथमं पबलं ववलाणा, पशु-पक्षिया ग्हाणे प्राण त्याग
याना, थःगु शरीरया ला, हि नका-त्यंका, जलवृष्टि ज्वीका सकलयात
रक्षा याः नृ । श्व खं म. जा. मा. ३८ अध्याये दु ।

६. प्रदीप प्रद्योत नृप जातक, वाराणसी देशे जन्मः—प्रदीप
प्रद्योत राजा छगु बने तपस्या याता स्वंगु समये छह वनिक पुत्रयात
चौरतस्ये स्याना धन-द्वय लुटे याता कायत विनक याः नृ खना बुद्ध राजा
चौरतयेत धर्मोपदेश दिया, शान्त याता वनिक पुत्रयात प्राण रक्षा याय
धुंका, हानं ला, हि नयेहिं धाःबःपि राजेतपिन्त सनेतं दमन याता
फलाहार याका रक्षा याः नृ । श्व खं म. जा. मा. ३९ अध्याये दु ।

७. अम्बर नृप जातक, बरद देशे जन्मः— अम्बर राजा
अधिकगणपिन्त दान याता स्वंगु समये मारया सैन्यगणपि भेषधारी
राक्षसत जुया दया सश मांस, रुधिर (रक्तां ला, हि) नये हकि
धका दान काःवःपिन्त प्रथम (ह्मापां) पुत्र, पुत्री, स्त्रीपिसं थःथःगु
शरीरयागु ला, हि दान दल, तथापि सन्तोष गज्जनि, भेगु हिं धका
धास्यंलि थःगु शरीरयागु दवाःगु ला, हि सनेतं दान याः नृ । श्व खं
म. जा. मा. ४२ अध्याये दु ।

८. यक्ष नृप जातक, उत्पलावति देशे जन्मः— यक्ष राजा उत्पलावति देशे यक्ष राक्षस-राक्षसीपितं मनुष्यतपुगु ला, हि जक नया दुःख बिया च्वंगु अवस्थास उगित खना हया, धर्मोपदेश बिया, दमन याना, ला, हि नयेगु त्वनेगु तोतका, देशवासी सकलयात अहिंसा धर्म तया प्राणिपिन्त रक्षा याःगु । ध्व खं म. जा. मा. ४४ अ. दु ।

९. शिवि नृप जातक, क्रोशलावति देशे जन्मः— शिवि राजा दानपारमितां पूर्ण यापेत अधिक याचकगणपिन्त, धन-द्रव्य दान याना च्वंगु बलते इन्द्र भेसधारी साहाय जुया वया, मिडा छगः हकि धका दान काःवःहयात छनः मिडा जक दान बिया छुयाये धका सन्तोष मजुया, निगः हे मिडा दान बी धका थःगु मिडा निगलं थःमं हे लिहया दान थाःगु । ध्व खं म. जा. मा. ४६ अध्याये व हानं जातक मात्तास २ अध्याये दु ।

१०. मैत्रीवल नृप जातक, केतुमति देशे जन्मः— मैत्रीवल राजा यक्ष याना अधिकगणपिन्त धन-द्रव्य दान बिया, भोजन याका लिछोयेगु स्वा याना च्वंगुसे, यक्ष राक्षसी ५ ग्याहा साहाय भेस जुया वया, जिपं साहाय जाति जूतां स्वाःगु ला, हि नयेगु-त्वनेगु इच्छा जूगुलि थन वया, जिमित हया पूर्वक स्वाःगु ला-हि तया भोजन याकि धका धाःवःपि खना मैत्रीवल राजाया दुनेनेसं कक्षणा चित्त उत्पत्ति जुया हर्ष प्रकट याना, मेपिन्त घातक मयासे हिला-हिला थःगु शरीरे थमं हे शस्त्रं घातक याना हि पिहया त्वंका, ला घेना कुक्ता-कुक्ता थला नका धुनित तृप्त जीवक रुधिर, मांस भोजन याका प्राण त्याग थाःगु । ध्व खं म. जा. मा. ४८ अध्याये व हानं जा. मा. ८ अध्याये दु ।

११. कविर राजकुमार जातक, काम्पिल्य देशे जन्मः— कविर राजकुमार, दाणु अल्लोल राजायागु अत्याचारं सुदास व्याधाया

लाहार्तं मृत्यु ज्वेत धिवक् जूबले ध्व कुमारया श्री मदाय्यावलोकितेश्वर
कर तामययागु भक्ति बत्लागु प्रभावं याना, अकाल मृत्युया भयं मुक्त
जुया यःगु देशे लिह्वावया राजा जुया देशवासी प्रजापति तच्चोक्तं
सुरक्षा याःगु । ध्व खे वताऽवदान मालास २ अध्याये दु ।



त्रैतायुगैः—

१२. चन्द्रप्रभ नृप जातक, भद्रशिला नगरे जन्मः—चन्द्रप्रभ
राजा अधिकगणपित्त यःके दुगु वस्तु धन-द्रव्यादि अन्न दान याना
च्वंगु समये इन्द्र शिर दान कया हति धका खे स्यता छोया हःह
रौद्राक्ष नाम ब्राह्मण खना खुसि जुया आःतिनि जि दानपारमितां
पूर्ण ज्वीगु जुत धका हर्षप्रकट याना अविलम्बं यःगु शिर धमं ध्यना
धुह्य ब्राह्मणयात शिर दान याःगु । ध्व खे म. जा. मा. ४९ अ. दु ।

१३. धर्मपाल राजकुमार जातक, वाराणसी 'काशी' देशे
जन्मः—धर्मपाल राजकुमारं यः मां दुर्मती रानी कूशासने चवना जि
चण्डी खः काय्यागु हि त्वने माल धका यः स्वामी ब्रह्मवत्तेश्वर राजा
यात सत्य कवल याकुगु, थुगु समाचार राजकुमारं सिया यः बौयागु
सत्यपालन यायगु, हानं यः मांयागु मनोरथ पूर्ण यायगु ध्व छगु
तःधंगु शुभकर्म खः धका यःत धमं यःगु गःपते शस्त्रं किया मांयात
हि त्वंका प्राण त्याग याःगु । ध्व खे शतकाऽवदाने ३२ अध्याये व
हानं महावस्तु अवदाने २४ अध्याये दु ।

१४. मैत्रीकन्य कुमार जातक, काशी जन्मः—मैत्रीकन्य
कुमार सज्जीवं यमपुरे वना सोवंगु अवस्थास छह्य पितृ द्रोही पापीयात
शिरे अयोमय (नयागु) चक्र स्वचाका हीका शासना याना तःगु खना
करुणा चित्त उत्पत्ति जुया वैके च्वंगु अयोमय चक्र धमं लिक्कया यःगु

शिरे विका धमं शास्ति, कष्ट नया व पापीयात यमपुरयानु शासनां
मुक्त याःगु । श्व खं शतका व. ३५ अध्याये, दिव्याऽवदाने ९ अध्याये
व हानं भद्रकल्पाऽवदाने २८ अध्याये दु ।

१५. सर्वज्ञमित्र जातक, पद्मपुर देशे जन्मः- सर्वज्ञमित्रं
रत्नकोशवति देशे रत्नकेतु राजाया नराहुति यज्ञस आहुति बीत १०८
सच्छि व कथाया मनुष्यत माःगुलि १०७ मनुष्यपि माता ज्थना हया
कुना तःपिनिगु धास्ते यः वना धुमित जानोपदेश मन्त्र दान विद्या, अमित
अकाल मृत्यु भयं मुक्त याना, नराहुति यज्ञ यायिह्य, यार्कपिन्त समेतं
जगत हित-मुख ज्बीनु सद्धर्मोपदेश विद्या, भिषु मार्गे तया रक्षा याःगु ।
श्व खं विचित्र कर्णिकाऽवदाने १० अध्याये दु ।

१६. सुधन राजकुमार जातक, उत्तर पाञ्चाल देशे जन्मः-
सुधनराजकुमारं यःत द्वेष भाव तया संग्राम याःवपि चतुर्माहाराजापिन्त
विना हिंसां ऋद्धियागु बलं त्याकालि स्वर्गया इन्द्र भुवनं चव्य द्रुमभुवने
ध्यंक वना, यःगु अनेक ऋद्धि पराक्रम वयना, अन जन्म जुया श्वहं
द्रुम राजाया पुत्री मनोहरा देवकन्या विवाह याना लिहाविद्या, मां-बी-
स्त्रीयात, देशवासी सकललोकपिन्त सद्धर्मोपदेश विद्या उद्धार याःगु । श्व
खं दिव्याऽवदाने १९ अध्याये व भद्रकल्पाऽवदाने २९ अध्याये तं दु ।

१७. सर्वानन्द नृप जातक, दीपावति नगर, नेपाल यल
देशे (गुईत) स जन्मः- सर्वानन्द राजां सुप्रशन्न शील महाबिहारे
वना, श्री दीपङ्कुर बुद्ध भगवानयात प्रथम पिण्डपात्र दान यानालि
यःगु दरवारे दान-शाला गोया पञ्चदान याना, पुनः महायान चव्यं
सम्भय् आर्य धर्मं याना वयना वंगु । श्व खं कपिदाऽवदानया २
अध्याय निसे ८ अध्याय तक दु ।

१८. सुप्रिय सार्थवाह जातक, काशी देशे जन्मः- सुप्रिय
सार्थवाहं ७ ह्वय् तक रत्नाकर समुद्र पार वना रत्नद्वीपे व्यापार

याना आपालं धन-द्रव्यं लाभं जुर्गका लिहां वया लंय् च्वना च्वंयि
 चौरगणपिन्त ह्यको तर्कं धर्मं कमाये याना हयागु धनया ह्यगू अंशया
 छगू छगू अंश बिया थःगु देशे लिहां वया सकल अधिक याचकगणपिन्त
 दान बिया नं याचकगणपि सन्तोष मज्जुया लिपा हानं वरद्वीप थ्यंक
 वना, रत्न कया हया थःगु जन्मभूमि गृहतरण ध्वजास तथा कःसी स्वाना
 अहोरात्र ह्यिच्छि-चछि रत्न बागाका, आपालं देशवासी जनतापिन्त
 सन्तोष ज्वीक धनाद्य याना उद्धार याःगु । ध्व खं दि. व. १२ अध्याये
 व भद्रकल्पा ३२ अध्याये दु ।

१६. सुतसोम नृप जातक, कौरव देशे जन्मः— सुतसोम
 राजा सौदास नरसिंह राजाया नरमेघ यज्ञस आहुति बीत मनुष्य १०८
 सच्छि व च्याह्य माःगुत्ति १०७ ह्य राजकुमारपि ज्वना हया, चिना
 कुना तःगु चासे प्रथम सौदास नरसिंह राजायात दमन याना, द्वितीय
 १०७ ह्य राजकुमारपिन्त अकाल मृत्यु भययागु बन्धनं मुक्त याना
 रक्षा याःगु । ध्व खं भ. क. व. ३६ अध्याये व स्वायम्भूपुराणे १
 अध्याये दु ।

२०. सर्वदन्द नृप जातक, शालवति देशे जन्मः— सर्वदन्द
 राजा छगू वनाश्रमे सपस्या याना ख्वंगु समये सतांचां लिना हःह्य वखं
 छह्य थःके शरण वःह्यायात कया रक्षा याना तल, उगु समये व वखुं
 नयेहकि धका इन्द्रया छलं वःह्य नैवाद व्याधायात वखुं ग्यंछि थःगु
 शरीरयागु ला ध्यना तासाज्वी तथा लना बियां सन्तोष मज्जुया, व
 व्याधायात थःगु शरीरयागु सा-हि समेतं नका-त्वंका सन्तोष याःगु ।
 ध्व खं द्वाविंशतिकाऽवदाने १२ अध्याये दु ।

२१. सुरूप नृप जातक, काशी देशे जन्मः— सुरूप राजा
 याचक वर्गपिन्त इच्छापूर्वक दान याना च्वंयले वसपोलया काय्मस्तयेगु
 सा-हि नयेगु-त्वनेगु हकि धका धाःवःह्य भेषधारी राक्षसायात मेमेगु

वस्तु बियां सन्तोष मज्जुया प्रथम काय् नं थःगु शरीरे घातक याना
हि पिकया त्वंकल, लाध्यना नकल, थ्व खना द्वितीय काय् रक्षा योपया
कारणे वसपोलं नं थःगु शरीरघातु ला-हि राक्षसयात नका-त्वंका
सन्तोष याना प्राण त्याग याःगु । थ्व खं हा. व. १४ अध्याये दु ।



द्वापरयुगैः—

२२. सुवर्ण वणकुमार जातक, वैशालि नगरे जन्मः—
सुवर्ण वणकुमार प्रचण्ड मन्त्रीया अत्याचारं बिना अवराधे सुरापे तथा
स्यायेत थिक्क याःबले सत्य प्रकट जुया, मुरा हे पलेह्सा जुया रक्षा
जुल । यनलि सुवर्ण वणं कुमार सहन शरितता क्षान्ति धर्मं च्वना,
थःत अत्याचार या हा प्रचण्ड मन्त्री प्रवृत्ति, मेपि देशवासी सकसितं
रक्षा याःगु । थ्व खं अतःअवदान माला ४ अध्याये दु ।

२३. श्रीमन् वाहन नृप जातक, धर्मपुर देशे जन्मः—
श्रीमन् वाहन राजा हि हा नागराजा भक्ष याना, नागराजापिन्त
आपालं भय-त्राश बिया दुःख बिया ख्वंहा, नाग भक्षक गरुडयात दमन
याना, आर्वलि तीर्थवासी नागराजापिन्त भक्ष याय् मखुत धका सत्य-
वाचा याका, नाग-नागिनीपिन्त गरुडयागु भयं मुक्त याना प्राण रक्षा
याःगु । थ्व खं अतःअवदान माला १ अध्याये दु ।

२४. जलवाहन राजकुमार जातक, धर्मकौशल देशे जन्मः—
जलवाहन राजकुमार अटवी सन्भव नाम पुण्डुली स्वच्छन्द ह्यता वास
याना च्वपि १०००० क्रिडः मत्स्य (म्या) व्याघातसें स्याना विप्री
याना नयेत थिक्क याना च्वंजले व्याघातयेत धर्मोपदेश बिया दमन
याना सिद्धः श्यायात प्राण रक्षा याना। पुनः बंधाराज जुया बिना
इव्यं सर्वत्र रोगीपिन्त व्याधि कौशल्य चिकित्सा याना रोगं मुक्त याना
परउत्कार याःगु । थ्व खं सुवर्णप्रभोत्तम सूत्र १८ अध्याये दु ।

२५. पद्मशेखर राजकुमार जातक, वैशालीनगरे जन्म:-
पद्मशेखर राजकुमारनाथ बिना बिच. र ममता व अहंकार याना युद्धयोयत
बःह्य विजयसेन राजायात वःगु सहायक सिंह, शाहूँल, अजरामरण,
महानागपिनिगु द्वारा विजय याना त्याका, लिषा विजयसेन राजाया
३२ स्वीनिह्य कलापिनिगु व पुनः देशवासी प्रजापिनिगु विलाप शब्द
म्यना, वन छण्डस बिस्यू वना बवंह्य विजयसेन राजायात सःता, वंगु
राज्य वेंतलुं लित बिद्या राजा-प्रजा सकलयात रक्षा याःगु । अब खें
बि. क. व. ९ अध्याये दु ।

२६. वीरकूश नृप जातक, काशी देशे जन्म:- वीरकूश
राजा विरूपगु खैना, तिरस्कार याना थःखें बया बवंह्य सुदर्शनायागु
रूपयोवन खना काम मत्तान्लोमी जुया चर्वि ७ ह्यपह्य राजापिसं
सुदर्शना हरण याये धका ७ ह्यं भित्तये जुया संगतम यायत वःपित्त
वीरकूश राजां धुमिनाथ संगम याय म्बाय्क घटशरी मन्त्र चववा
ध्वजा बोयका बिना युद्ध ७ ह्यपह्य राजापित्त त्याका धुमित बांलाक
दमन यानालि सुदर्शना सहित थःगु राज्ये तिहां वःगु । अब खें दि.
व. १३ अध्याये व भ. क. व. ३० अध्याये दु ।

२७. महासत्त्व राजकुमार जातक. पाञ्चाल देश नेपाल
पनौतिस जन्म:- महासत्त्व राजकुमार वनागरे चाःह्यू बंयले व्या-
धिणी छह्य वनया जोले मच्चा बुयीका पित्यागु, प्यातबाःगुलि अत्तमर्थ
जुया, थमं बुयिकापि मच्चात हे स्याना नय्श्य याना बवंगु खना, दुमैं
निसैं करुणा चित्तोपति जुया, व्याधिणीयात तच्छोक करुणा तथा यागु
शरीरे घातक याना हि पिकया ब्यागु हि त्वंका, सा ध्यना नह्य
व्याधिणीयात व बया मच्चातय्त नं रक्षा याना थमं प्राण त्याग याना
वंगु । बसपोलया शरीरयागु शेष बाकि अस्थि (बजें) फुकं मन्-बी,
दाजुपि वना मुना, चैत्य निर्माण याना, दुने गर्भे तथा नमोबुद्धाय चैत्य

धका नामाकरण याता तःगु स्वयम्भू मूर्ति चैत्य (नमरा) भगवान्
अद्यापि दर्शन याय्गु दया च्छंगु दु । ध्व खं सुवर्ण प्रभोसोत्तम सूत्र
१९ अध्याये दु ।

२८. सिंहसार्धबाह जातक, सिंहकल्प नगर, नेपाल ये
देशे थैवहीस जन्म:- सिंहसाधबाहं ताम्रद्वीप सिंहकल्प नगरे बया
सिंहकेशरी राजाया वंश शुद्धान्त मदयेक स्थाना, ला नया, हि तोना
वर्षि ताम्रद्वीप निवासी नरमांसाहारी राक्षसीत नाप श्री आर्याबलो-
कितेश्वरयागु करुणा कृपां प्राप्त जूगु षडक्षरी महामन्त्रया क्षमत्कार
व्यता विजय प्राप्त यानालि ताम्रद्वीपयात सिंहलद्वीप धका नां तथा,
सकल सार्धबाहपिन्त, वनिजालपिन्त रक्षा याःगु । ध्व खं गुणकारण्ड
च्यूहे १५ अध्याये दु ।

२९. शेन नृप जातक, अरिष्ट देशे जन्म:- शेन राजाया
अधिकजनया उपरे करुणा वित्तोत्पत्ति जुया दान याता स्व-स्व ५ ग्याहें
दुवले इन्द्रयागु जालं भेषधारी ब्राह्मण छह्य बया शरीर बाह्य दान
हकि धका धाःह्य छना, हर्ष प्रकट याता थःगु शरीर शस्त्रं बाह्य थला
अधो भाग शरीर दान याःगु । ध्व खं इतावदान माना ५ अध्याये
८ कल्पलटास २ अध्याये दु ।

३०. विश्वन्तर राजकुमार जातक, विदर्भ देशे जन्म:-
विश्वन्तर राजकुमारं क्षिप्रं देशे दुने जक स्वना, धन-द्रव्य दान यातां
सन्तोष मजुया आपालं धन-द्रव्य पिकया, कितिया ह्ये तथा देश पिने
बना दान याःवर्गुलि मन्त्रीयागु विरोधं थः स्त्री-पुत्र-पुत्री सहितं स्वना
यंका चंक नाम पथैले वना, तपस्या याता स्वबले इन्द्र भेषधारी ब्राह्मण
जुया दान काःवःह्ययात प्रथम पुत्र जालीकुमार, पुत्री जालिनी कुमारी
दान बिया, पुनः दान काःवःह्य भेषधारी ब्राह्मण इन्द्रयात थः स्त्री
मन्दिरदेवीयात नं प्रेम-प्रीति, स्नेह-माया-मोह दपक त्याग याता दान

याःगु । श्व खं दि. व. २ अध्याये व जातक माला ९ अध्याये हानं
च. व. मा. ६ अध्याये दु ।

३. मणिचूड नृप जातक, शाकेतु नगर, नेपाल सको
देशे जन्म:- मणिचूड राजा इन्द्रजित् नाम 'निरगंड' स्वतं छुं वाधा
दुःख मविसे यज्ञ याना च्वंगु समये, इन्द्र राक्षसयागु भेष कया यज्ञ
कुण्डं थाहाँ बया, लाहा ब्वे-ब्वे स्थाना, सद्य रक्षिर-मांस नयेगु जितः
हकि धका हाला च्वंहायात आसन बिद्या मान्य याना, मोपि प्राणिपिन्त
हिंसा मयासे, थःगु शरीरयागु हिनू थमं हे खाना, हिपिकया त्वंका,
ला ध्यना नका, भेषधारी राक्षस इन्द्रयात थःगु शरीरयागु सद्य रक्षिर-
मांस दान याना, तृप्त ज्वीक नका-त्वंका, सन्तोषयाय् धुसेलि सत्पयागु
प्रभावं थःगु जीव रक्षा याना, यज्ञ कर्मयागु ज्या कुक्क निर्विघ्नं समाप्त
याना, स्त्री-पुत्र समेत दान याना, लिपा हिमालय पर्वतया कटिस
चवना तरस्या याना च्वंगु समये, दुष्टप्रसह राजायागु देशे महामारी रोग
प्रकट जुया भों-भों रोगाहा जूगुलि देशे हाहाकार मचे जुया अनेक
चिकित्सा, पाठ-पूजा, शांति-ध्वस्ति याका नं मजिया, आपालं प्रजा-
लोकापि भृत्य जुया वंगुलि, वृद्ध-वृद्धि, जानिजनपि सःता ग्यबले,
मणिचूड राजायागु शिरोमणि सिसागु लः त्वंकेव देशे नं सिचन याना
बीव शान्त ज्वी धाःगु ग्यना, ब्राह्मणपि ५ ग्याह्य मणिचूड राजायाके
शिरोमणि फोंके छोगु । मणिचूड राजा ब्राह्मणपिन्त तबबोकं आदरभाव
तया मान्य याना थःगु शिरे कःति कीका, पां पाय्का, चुपि स्वीका,
थःगु कण्ठ दक्वं सह याना, शिरोमणि लिंकाय्का थःगु मस्तिकया दुने
च्वंगु, नर-मणि दान याःगु । थुगु स्थान सको देशया लिउने मणि-
लिंगेश्वर तीर्थ धका प्रख्यात जुया च्वंगु सभजनवगोंपि तीर्थ सेवा, स्नान
याःवनीगु प्रथा आःतक चले जुया च्वंगु दु । श्व खं म. जा. मा ५०
अध्याये व दि. व. १८ अध्याये हानं स्वायम्भूपुराणे ४ अध्याये दु ।

कलियुगे—

३२. सर्वार्थसिद्ध राजकुमार जातक, कपिलवस्तु नगरे जन्मः— सर्वार्थसिद्ध राजकुमार वसपोल द्वापर युगधा अन्ते कलियुगधा प्रथम पादे नेपाल पुण्यभूमि कपिलवस्तु महानगरे पवित्र शुद्धगु स्थान तुम्बिनी वनया उल्लानस, पिलासिमाया ध्वे मायादेवीया जषगु कक्ष (पाक्व) जन्म जुया, २० नीदेंया वयसे विवाह याना, २९ नीगुदें तक गृहाश्रम—राजदरवारे च्वना, लौकिक धर्म धिरक्त जुया, लोकोत्तर धर्म अनुराग याना, सकलयात हित चिन्तना याना, सर्वा आनन्द सुख प्राप्त ज्वीगु बोधितानया प्रत्येक खँ, मुञ्जरञ्जनीय कथा कना, बोध याना, ३० देंया वयसे राज्य-ऐश्वर्य दक्खं 'गृह' त्याग याना, तपोवन विज्याना, यःत थमं चूडाकर्म याना, नैरञ्जना नदीया तीरे विज्याना ६ खुदें तक दुष्कर चर्या तपस्या याना नं उगु तपस्या सम्बोधिज्ञान प्राप्त मजुया (गत्वा नैरञ्जना तीरात् शुद्ध सिद्धि प्रकाशकः) पुनः बोधिमण्डपस वना बोधिवृक्ष सिमाया मूले स्थीरासनं च्वना, आस्फानक समाधियोग याना, बाह्य-गुह्यार्ण चतुर्मारिदि सकल मारगणपिन्त धर्षण याना मारपराजित जुस्यंलि विजय प्राप्त जुया, सम्यक्सम्बुद्ध भगवान् जुया विज्यात ।

धर्नेलि वसपोल सम्यक्सम्बुद्ध भगवान् बोधिमण्डपं मृगदावने विज्याना, प्रथम द्वापां पञ्चभद्र वर्गीय ५ न्याह्य, अनेलि शालिपुत्र, महामौद्गल्यायन, आनन्द, काश्यप प्रभृति मेनेपि आर्यपिन्त भिक्षु याना, आपालं शिष्यपिसं सहित याना, देश-मगध देश आदि, वन-जेतवन विहारादि, पर्वत-वज्रकूट, गृध्रकूट इत्यादि शिखर-पर्वत स्वर्ग भुवन थ्यंक भ्रमण याना, थाय्-थासे विश्राम याना, देव-दैत्य-मनुष्यादि सकललोकपिन्त सद्धर्मरूपी अमृत वाणी, धर्मचक्र प्रवर्तन याना, श्रावकं निसं क्रमशः माहायान तथा वज्रयान, तन्त्रयानया सद्धर्म ज्ञानोपदेश

दिया, अन्य धनु पूर्वजन्मया जातक कुक्कं समाप्त ज्योति कना, संकम लोकायात बोध याना, त्रिस्ताह्व-महासाह्व आदि त्रयोदश भूवत पर्यन्तं सद्धर्मरूपी ज्ञानामृत वर्षा याना, ८० अर्द्धया वयसे कुशीनगरे विज्याना पुनर्जन्म कायम्वाःगु सुखमय धर्मसक्त महानिर्वाण वदे विज्याःगु । ध्व खं नवव्याकरणया ८ अष्टम खण्डे व ललितविल्लर सूत्रे व्यक्तरूपं दु तथा निर्वाण सूत्रे, पञ्चरक्षा, करवीर इत्यादिस संक्षिप्त रूपं खनेदु ।

श्री बुद्धभगवान देश-विदेश, ग्राम, वन, पर्वत इत्यादि थाय्थासे विज्याना, देव-मनुष्यादि सकललोकपिन्त उपदेश विद्या विज्यागु सद्धर्म रूपी अमृतवाणी न्यना, मुख्य-मुख्यां शिष्यपितं उल्लेख याना थकुगु बुद्धोपदेश थन समूह जुया च्वंगु नवव्याकरण (नव खण्ड), जातक माला, अवदान, त्रिपिटकादि जगतोहिताय-सुखायया लागी विद्यमान जुया च्वंगु ग्रन्थ आपातं दुगु खनेदु ।

थुकी वसपोल बुद्ध भगवानया ३२ स्वीनिगू जातकया नामावली उल्लेख यानागु मध्ये सर्वानन्द नूपयागु जातक १७ सिंहल्यगुली लाःगु छिगू जातक खः ।

कपिदाजवदानया द्वितीयोऽध्यायनिसं अष्टमोऽध्याय तक व वंशा-वली इत्यादि सोयाथलै ध्वसपोल सर्वानन्द राजाया जन्म नेपाल ललितपुर (यल) दीपावतिनगर (गुइत) स त्रेतायुगे जन्म जुया विज्यागु पूर्ण रूपं सीदु ।

ध्वसपोल उगु अवस्थाम श्री दीपङ्कुर आदि बुद्धभगवान तथागतया सद्धर्मोपदेश न्यना जगतोहिताय-सुखायया लागी सद्धर्म प्रचार थायया कारणे श्री दीपङ्कुर बुद्धभगवानयात तथा वसपोलया शिष्यगण, आर्य्य भिक्षु संघपिन्त, पुनः सुप्रसिद्ध ज्ञानिजनपिन्त समेत आषाढ पुह्लि गुरु पूजा (दिल्ला पुह्लि) थुनु निसं आरम्भ याना कार्तिक पुह्लि

(सरिसता पुष्टि) खुनु तक ४ प्यता यंक, अन्यन्त शोभायमान श्चीक दानशाला ख्या, दान पाय्गु ख्या श्री दीपङ्कुर आदि बुद्ध भगवान् प्रमुख आय्यं भिक्षु संघापि विख्याता प्रथम पारार्थ पूजादि धुंका पिण्डपात्र प्रदान (पञ्जदान) याना विख्यात ।

तत्पश्चात् अनं लिपा मक संक्रान्ति, माघ (घ्योवातु सह) खुनु हानं श्री दीपङ्कुर आदि बुद्ध भगवानंनिसं आय्यं संघर्णन्ति निमन्त्रणा याना, पूजादि कर्म सहित महायान चर्यं सम्यक् दान आय्यं धर्म याना यपना विख्याता वन ।

अनंनिसं कमलः प्रचलित जुया थःगु थुगु महायान आय्यं सम्यक् धर्म पुनः सज्जन धर्मावलंबिसं श्रावण (गुंला) महिनास थःथःगु छे अथवा विहारे दानशाला गोया पिण्डपात्र प्रदान (पञ्जदान) याना च्वंगु अद्यापि दनि ।

पुनः पाय्फुपि दानीपिसं सर्वान्तरा राजांनं माघ संक्रान्ति सुष-
पर्वकात् दिन खुनु स्वयम्भू, दीपङ्कुर बुद्ध, सम्यक्सम्बुद्ध, आय्यं तारा,
लोकेश्वरादि बोधिसत्त्वपिनिगु मूर्ति, आय्यं संघ, देशया स्वाभि (जुजु)
प्रभिति बिहारया संघापि सहित निमन्त्रणा याना पूजाध्यं धुंका, पिण्ड-
पात्र प्रदान, भोजनादि कर्म समेत याना यया च्वंगु नेपाल देशे अद्यापि
स्थीर जुया च्वंगु सकलपाके विदित जुया च्वंगु थ खना च्वंगु
दनि हे धाय्मा ।

देस-य देशवासी सकल लोकया पारमोजन जुया सदा सुमङ्गल
ज्योगु थुगु महायान आय्यं सम्यक् दान धर्म लोप ज्योया कारणे सज्जन
धर्मावलंबि दानीपिसं गुठि दयका, थुगु सम्यक् दान धर्म, ५ न्वादेय्
झुकी ललितपुर (यल) देशे महाबहाले पाय्गु, पुनः १२ सिनिदेय्

छको जूसां कान्तिपुर (पे) देशे, स्वयम्भू स्थान भुङ्ख्यले याय्गु चलन
जुया च्वंगु नं भद्यापि सकसिनं सिया च्वंगु व खना च्वंगु हे दनि ।

केवल बोधिसत्व सर्वानन्द राजा निर्माण याना थकुगु विहारदि
सफू, चित्र-विचित्र रंगं जाया च्वंगु कलाकार पौमा-विलपी इत्यादि
दीपावती नगर (यल-गुईत) प्रथमशील विहारे, सुप्रसन्नशील विहारे,
पद्मश्री विहारे ब्ये-देलं श्रावण महिनास (गुँसाबले) प्रदर्शनी ज्वीगु
अवस्थास सिद्धिमानपि बना सो वनीगु नं अद्यापि प्रचलित जुया
हे ज्वनं तिनी ।

सकलया सर्वदा शान्ति व सुमंगल ज्वीमा धेगु कामना याना,
धुगु पुस्तक कविदाज्वदानोक्त संक्षिप्तकथं नेपाल भाषा अनुवाद याना,
श्री हर्षज्योती शाक्यद्वारा प्रकाश याना ।

धुगु सफुली भतीचा हे अलसि मचासे संशोधन याना बिज्याह
बौद्ध दर्शन इत्यादिस आपालं निपुणह, पं० श्री ज्ञानरत्न वज्राचार्ययात
व हानं भिगु चेतना याना अद्यापूर्वक धुगु सफूया माक्व चन्दा ग्वाहालि
याना प्रकाश याना बिज्याह, श्री हर्षज्योती शाक्ययात नं निरन्तर
धन्य प्रशंसा याना ।

धुगु सफू थासा आखः जूया निति गनं-गनं दोनेफु, बोना
बिज्याहपि-दीपि सज्जन वर्गपिसं संशोधकयात दोष मध्युसे सचे याना
अवना यंकं धेगुनं कामना याना ।

—अस्तु ।

—भा. अ. पं. वै. आशाकाजी

जिगु छत्वाःचा खँ

नेपाल ललितपुर महानगरया अथःननी धैगु त्वाले
 पण्डित बस्त्राचार्यया कुले उत्पन्न जुया बौद्धशास्त्रे निपुण
 जुया विज्याम्ह पण्डित, वैद्य श्री आशाकाजी बस्त्राचार्य
 श्री शाक्यमुनि बुद्ध भगवानं जगतोहिताय सुखायया लागी
 प्राणिपिन्त अनुकम्पातया, चतुरार्य्य सत्य, आर्य्याष्टांग मार्गया
 सद्धर्मोपदेश विद्या. पुनः थःगु पूर्व निवासाऽनुस्मृति ज्ञानो-
 पदेश विद्या विज्याना वंगु १००० द्वाःछगू जातक खनेदुगु
 मध्ये थन नेपाल देशे आः प्रचलित जुया र्वंगु, ३२ स्वीनिगू
 जातक दिव्याऽवदानादि अनेक अवदान अनुसन्धान याना,
 नेपाल भाषां अनुवाद याना विज्याना र्वंगु ३२ स्वीनिगू
 जातक मध्ये थुगु जातक कपिदाऽवदानया सर्वानन्द राजायागु
 जातक खः । थुगु जातक त्रेतायुगे दीपावती नगर 'यल देशे'
 सर्वानन्द राजां प्रथम श्रावण कृष्णया त्रयोदशीखुन्हु, पुनः
 छम्ह ब्रम्हचारी मिसा लक्ष्मीथकुनं व सर्वानन्द राजां श्रावण
 शुक्लया अष्टमी दिनखुन्हु श्री दीपङ्कर आदि बुद्ध भगवानयात
 व वसपोलया आर्य्य सर्वसंघगणपिन्त पण्डितपात्र दान (पञ्च-
 दान) याःगु इत्यादि पुखू, तुं, हिति बिहार निर्माण याना
 वंगु यथार्थ रूपं खनेदु ।

आः उम्ह सर्वानन्द राजायागु पुरावृत्त नाप सम्बन्ध दुगु
 थुगु सफू, गुईत त्वाले विज्याम्ह हर्षज्योती शाक्यं श्रद्धा-
 पूर्वक चन्दा प्रदान याना थासा आखलं थाकाः प्रकाश यायगु

अनुमति विया विज्यात धका पं. वै. आशाकाजी वञ्चाचार्य
संशोधनयागु अभिभार जितः उत्सर्ग याना विज्यागुलिं थुगु
सफु जि अल्पज्ञं यत्किञ्चित् सहयोग विया यथार्थ रूपं संशो-
धन यानागु खः । थुकी दोषज्ञजनपिसं क्वे क्वे. हिना विना
जूगु. उचित-अनुचित विचार याना ध्वना स्वया, बोध
याथगु योग्य जू ।

पुनः ध्वं सफु धासा आखलं थाःगु जूया नितिं गनं-गनं
प्र. फ. संशोधनया भूलं व मुद्रण यन्त्रयागु आघातं स्वर, व्यञ्जन,
द्वस्व. दीर्घ, अनुस्वार, अनुनासिक, रेफ, विसर्ग इत्यादि
छुटये जुया अपभ्रंश जूगु दय्फु, थुकी सज्जनवर्गपिसं नेपाल
भाषा अनुवादक व संशोधकयात दोषारोपण मयासे कृपातया
संशोधन याना ध्वना स्वयांलि थुगु संख्यागु महत्व ध्वीका,
इहजन्मनि सुख सम्पत्ति, परजन्मनि मोक्ष प्राप्त ध्वीगु श्रद्धास
उत्साह चित्त जुल धाःसा भाषानुवादकयागु परिश्रम व
प्रकाशकयागु सदिच्छा सफल ध्वी धैगु पूर्ण आशा तु ।

पुनश्च, आशा तु कि - बुद्ध धर्मावलम्बी-धर्मार्थी सज्जन
वर्गपिति हर्षज्योती शीकर्यं धैतु मेमेगु न्यने मदुगु-स्वे मखंगु
भगवान बुद्धयागु जातिक क्रमशः प्रकाशन याथगुली उत्साह
चित्त जुल धाःसा भा. अनुवादकयागु परिश्रम सार्थक जुया
भगवान बुद्धया पूर्वनिवासाऽनुस्मृत ज्ञान न्यने मदुगु न्यना,
स्वे मखंगु स्वया, सभ्य पुरुषपिति परोपकार याथगुली यथार्थ
ज्ञान वृद्धि ध्वीतु धैगु आशा ।

स्वस्तिरस्तु ।

कविदाऽवदान



प्रकाशक- हर्षजोति शाक्य



प्रकाशकया इनाप

स्वज्ञा न्हापानं नेपाल सम्बत १०८० स धुगु खँ किञ्चित् मात्र जक तथा आदिवज्र बज्राचार्य पाखें अनुवाद याका २०० प्रति प्रचार याये धुंगु खः ।

तथापि आः हानं पं. वै. आशाकाजी बज्राचार्य द्वारा पूर्णरूपं खँ तथा अनुवाद याना तःगु सफू नं छुं भतिचा पुनः प्रकाशक जुया प्रचार याना ।

न्यागु हे सफू नं थज्वीमा जितः बांलाक हे ज्ञात जुल कि सफू चोया विज्याईपिं, दिईपिं, लेखकनयसं भतिचा जक हे अलसि मचासे आपालं सफू सोया मभित्क चाउयेका विचार याना चोया विज्याईगु जूया निंति, थुजोपिं विद्वान् लेखक तथा संशोधकपिनि थमं चोयागु सफुलि त थंगु तःचोगु थःगु परिश्रम दुविना च्वनी । उकिं लेखकपिनि व सफू तःथंगु सम्पत्ति ज्वी ।

थुजोगु सफू, लेखक तथा संशोधकपिनि परिश्रम दुविना चोगु सम्पत्ति रूपी सफू सफल ज्वीक क्रमशः लेखक तथा संशोधक पिनिगु नाम सहित उल्लेख याना सफू प्रचार यायेगु प्रकाशकतय् छगू तःथंगु शिचित्त व शुभ कर्तव्य खः ।

थध्ये लेखक तथा संशोधकपिनिगु परिश्रम सफल याना
ध्व सफु छुं प्रचार याये दया जिगु मन तसकं हर्ष याना । जि
जक मखु आपालं सज्जनपिसं लेखकपिनिगु ज्या सफल याना
प्रकाशक जुया, सफु पिकया चर्बंगु नं आपालं खने दु ।

जिमेगु छुं धाय् मसःसानं अनुवादक तथा संशोधकपिनि
सर्वदा कल्याण व सुमंगल उवाचा धैगु जिगु तुगलं धया
च्वनागु दु ।

थुगु धर्मं सत्त्व प्राणीपि असत्य मार्गं लिचिला, सत्य
मार्गस पत्ता तया पाप कुता, पुण्य फल लायेमा, थव सफू
स्वया बिज्याई-दीपिनि नं ज्ञान प्राप्त ज्वीमा, जगत् सत्त्व
प्राणीपिनि सर्वदा सुख शान्ति ज्वीमा धैरु आशिका याना ।

[illegible]

विषय	पृष्ठ
२९. फल-स्कन्दफल-	१४४
३०. सत्तु-कुं-	"
३१. शर्करा पान (साधति)-	१४५
३२. क्षार भोजन-	१४६
३३. जलपान -	"
३४. सम्यक् भोजनया फल-	१४७
३५. नीचामयेगु-	१४८
३६. मुखशुद्धि (म्वा-म्बे)-	१४९
३७. ध्वज पताका चामल ध्वे.	"
३८. क्षेत्र कुं-	१५०
३९. तुफि-लाखि-	१५१
४०. दन्तकाष्ठ (दतिबं)-	१५२
४१. कण्डलु (जलभाण्ड)-	१५३
४२. देवतालंकार (तिसा)-	"
४३. निपू-भोति आदि...	१५४
४४. मकुट (मुख) तपुलि-	"
४५. वज्र-घण्ट-	१५५
४६. ताम्रादि विविध भाण्ड-	१५६
४७. भेषज्य (व सः)-	१५७
४८. जाकि-माये-मू इत्यादि-	१५८
४९. चि-	"
५०. चिकं-	१५९
५१. पट्ट चीवरादि वस्त्र-	"
५२. मुलुसुका-	१६०

विषय	पृष्ठ
५३. सलां-	१६०
५४. वधपू-लाकां-तुतां-	१६१
५५. छत्र, कुसा-	"
५६. किसि, सल, रथ-	१६२
५७. अग्नि भाण्ड (मक)-	१६३
५८. शय्या, लासा फांगा ..	१६४
५९. स्त्री-पुत्र-पुत्रादि-	१६५
६०. दान दक्षिणा-	१६७
६१. अन्न दानया फल-	"
६२. प्यंगू युगोदय प्रमाण-	१६८
६३. तथा श्रावण शुक्ल...	१६९
६४. दानया फल-	"
६५. अदत्त दानया फल-	१७०
६६. दान-शील तथा ज्ञान ...	"
६७. तथा दान शील...	१७१
६८. नाना वाद्य (अनेक...	१७२
६९. गीत नृत्यया प्रशंसा-	१७३
७०. पुण्य फलया प्रशंसा-	१७४
७१. पुण्य फलया भावना-	१७५
७२. प्रायना-	१७६
७३. आशीर्वाद-	१७७
७४. प्रत्यावृत्त (लिहां बिज्यागु)"	"
७५. जित्तना-	१७८
७६. शुभेच्छा- इत्यादि -	"

नमः श्रीदीपङ्कर तथागताय ॥

मङ्गलाचरणम्



खपरजनप्रदिष्टाः देशिताबोधिमार्गाः

त्रिभुवन सुरनाथो दीपरूपः स्वरूपः ।

प्रचलित नरकाग्नौ नित्य संसारतारः

शयन कलुष रूपः पातु दीपंकरो वः ॥ १

भावार्थ

न्दापा थमं थमं भोगयाना वः गु कर्मयानुसारं भवचक्रे
जन्म काः वयाच्वं पि प्राणिपि संसारे गुलि दया च्वन

धुमित याकनं निर्वाण प्राप्तजीगु आर्य्य अष्टांग मार्ग
च्यागु प्रकारया शुद्धगु लँपु खनीगु, बोधिज्ञान उपदेश
विया विज्याह ।

स्वर्ग, मर्त्य, पातालस वासयानाच्चंप्पि देव, दैत्य,
मनुष्यादि दक्खया नाथजुया, अज्ञानरूपी अन्धकार
त्वपुया ख्यँगुलिं ह्रुं मखना, संसाररूपी समुद्रे दुना, नाना
प्रकारया दुःख भोग यानाच्चंप्पि प्राणिपिन्त, ज्ञानरूपी
दीप 'मत' या स्वरूपजुया ज्ञान केना, संसारयागु दुःख-
याकें तरेयाना विज्याह ।

अति प्रज्वलितगु अग्नि चलायमान जुया, महाभयंकर
जुया च्वंगु अवीची नरक आदि षोडष नरके कुतुंवना
नरकयागु भिणुना दाहजुया अत्यन्त दुःख कष्ट नया च्वंप्पि
पापित्थेत करुणातया धुमिगु दाह शान्त याय्त शीतलगु
रस्मि प्रकाशयाना नरकयागु अग्नि शान्तयाना उद्धार
यानाविज्याह ।

प्लपरूपी 'अहं मम' जिं जिगु धँगु मोह जालं त्वपुया
ह्रुं मचायका अचेतं न्होवयकाच्चंप्पि अज्ञानि प्राणिपिन्त
ज्ञानरूपी ध्वनि 'शब्द' विया थना बोधिज्ञान विया
उद्धार याना विज्याह ।

प्राणिपिन्त हित याययालागी आकाशधातुपर्यन्तं
यावत् सर्वत्र लोकधातुस व्यापक जुया, मैत्री, करुणा,
मुदिता, उपेक्षा, चतुर्ब्रम्ह विहार धारणा याना, असंख्य
कल्पकल्प तक समाधियोगस च्वना विज्याम्ह । भो प्रभु
श्री दीपङ्कर आदिबुद्ध भगवन् ! छलपोलयात जिमिसं
नित्य प्रणाम याना, जिपिं सकलयात रक्षा याना विज्याहुं ।

श्रीदीपङ्कर बुद्ध धारक्षी

ॐ नमो भगवते दीपंकराय तथागतायाऽर्हते संन्यक्संबुद्धाय
तद्यथा ॐ कर २ सुकर २ दीपंकर सर्वज्ञान प्रदर्शन
अकार संभवादि बुद्धे स्वाहा ॥

ॐ

नमः सर्व बुद्ध बोधिसत्त्वैभ्यः ।

कन्दर्प दर्प शमनं प्रणिपत्य मूर्ध्नि
सौद्धोदनिं सुरनरार्चित पादपीठम् ।
श्रुत्वा गुरोः सुगत सूत्र सतत्त्व विज्ञं
सूत्रं तदर्थं समनुस्मरणां करिष्ये ॥१

भावार्थ

काम मारयागु दक्व चमत्कार (ममता व अहंकार) यात शमनयाना विज्याद्ध जूयानिन्ति । देव, दैत्य, मनुष्यादि सकल लोकपिसं पाद—पीठस पूजादि वन्दना याका विज्याद्ध भगवान् बुद्धयात नम्रभावं शीर कोलुनप्रणाम यानालि, ध्वमपोल भगवान् बुद्धया सिद्धान्त, जगतोहिताय अहिंसा सद्धर्मज्ञान धर्मोपदेश सूत्र न्यना तत्वसीका उगु ज्ञाने दीक्षित जुया महाज्ञानि साधु जुया विज्यापि ध्वस्तरोरुया शिष्यापि वमपालपिसं अहत् पद लाना मुक्त जुयावंगु सद्धमे ज्ञान सूत्र व तत्वया अर्थ सीका गुवरेसं तोमफाक स्मरणथाये । सकल बुद्ध वमप ल बोधित्तादिपिन्त सर्वदा स्रष्टांग प्रणाम याये ।

ओ शाक्यभुनि धारशी

ॐ नमो भगवते शाक्यमुनये तथागतायाऽर्हते संन्यक्संवद्धाय तद्यथा ॐ मुने २ महामुने, ॐ हिलि २ मिलि २ किलि : ईदृले कट्टेले केतुमूले अडमले अट्टे : नट्टे २ वज्जे २ नट्टवज्जे पश्य २ संपश्यति सिद्धचन्तु मन्त्रपदा महाकारुणि काय स्वाहा ।

कथाऽऽरम्भ

श्री दीपङ्कर भगवान् यत् प्रथमं पिण्डपात्रं दानं यानां
विज्याह्व, न्हापा जुयावंक्ष सर्वानन्द राजाया पूर्वं जन्मनिर्से
यागु अष्टमोऽध्याय तदयमगु संक्षिप्तं खैः—

तद्यथाऽभूत् पुराऽभिज्ञः शाक्यसिंहो मुनीश्वरः ।
सर्वविद्याऽधिपः शास्ता त्रैधातुको विनायकः ॥ १
सर्वज्ञोऽर्हन्महाऽभिज्ञस्तथागतो जिनेश्वरः ।
स संबुद्धो जगल्लोकान् हितार्थेन स सांघिकः ॥ २
श्रावस्त्यां नगरीपूर्वां जेतारामे मनोरमे ।
सद्धर्मं समपादेष्टुं सभासने समाश्रयन् ॥ ३

इत्यादि ।

परापूर्वं काले शाक्यसिंह बुद्ध भगवान् मुनीश्वर सकल
विद्याया अधिपतिजुया विज्याह्व, सर्वज्ञ महाऽभिज्ञ तथागत
जिनेश्वर शास्ता स्वंगू भुवनया नायक जुया विज्याह्व, एवं
सम्यक्संबुद्ध जुयाविज्याह्व प्रभु । छगू समये जगल्लोकपिन्त

हितयायया कारणे आपालं थः संघ व शिष्यपि मुंका,
अतिमनोरम जुयाच्चंगु श्रावस्ती नगरस जेतवन महाविहारे
विज्याना सकभणं कल्याण यायेया कारणे समास यथाक्रमं
सद्धर्म ज्ञान धर्मोपदेश विद्या शोभायमान ज्वीक विराजमान
जुया विज्याना च्वन ।

थुगु स्थान गथिगु धाःमाः- विहारया छचाःखेरं अनेक
जात-जातया फल सयाच्चंगु सिमा दया च्वन । सुगन्ध
वासनां संयुक्तगु स्वांमां चाःउला च्वन । हंसराजपिसं जल
क्रीडा याना च्वंगु शुद्ध निर्मल लखं पूर्ण जुयाच्चंगु पुखु
दयाच्च्वन ।

थार् थासेसिमास कोकिलादि जग, पंक्षिजुना थःथःगु
स्वर पिकया मधुर स्वर हाला च्वन । पशुगणपि थःथःगु
बल पिकया बलाज्जसे वमलाह्वयात दुःख बीगु, स्याना
नयगु कर्म मयासे परस्पर स्नेहयाना करुणातया भ्रमणयाना
नम्रभावं वास यानाच्च्वन । थुजागु मनोरम स्थान वनान्तर
मध्ये न्हापा जेत ऋषि दय्का वंगुलिसनं हानं छुं लिपा
प्राणिपिन्त हितयायगुली श्रद्धादुद्ध अनाथपिण्डक महाजनं
सकललोकपिन्त श्री त्रिरत्न दासीगु, सन्सार रूपी समुद्रं
तरेजुया मोक्ष वनेफैगु सद्धर्म ज्ञान उपदेश बीगु न्यनेगु
लागी ततःधंपि मुनाश्चरपिसं वास याय्त लायक ज्वीक

आपालं धन खर्चयाना, मुनीश्वरपिसं सद्वर्म ज्ञान उपदेश
कंगु न्यना भक्तिपूर्वक सेवायाना च्वनेत योग्य ज्वीक थुगु
स्थाने विहार निर्माण याना तःगु खः ।

छगु समये थुगुहे स्थाने शाक्यमुनि भगवान् बुद्धं
सद्वर्मज्ञान धर्मोपदेश बीत विज्यात धैगु शुभ-समाचार
न्यना सकल देव, दैत्य, मनुष्यादि गन्धर्व, किन्नर, महोरग,
विद्याधर, अप्सरादि देवकन्यार्पि वया भगवान् शाक्यमुनि
बुद्धयात त्रि प्रदक्षिणयाना, साष्टाङ्ग प्रणामयाना, क्रमा-
नुसारं पूजाभावयाना, कलवलं महासे नम्ररूपं शील स्वभाव
धारण याना, थर्गान्यया पुलिचुया फेतुना, ल्हाहा चिन्ति
याना एकाग्रचित्तं खँ न्यनेत भगवान्या मुखमण्डल स्वया
छचारख्यलं च्वंच्वन । तथा उगु देशयार्पि राजा, मन्त्री,
महाजन, सार्थवाह, मेमेपिं सकल सज्जनवर्गादि पुरुष,
स्त्रीगनपिनं मिलेचुया पृष्प, धूप, दीप, गन्ध, रस, नैवद्यादि
फल मूल अनेक प्रकारया शुद्धगु वस्तु ज्वना, थुगु स्थाने
भगवान्या आश्रमे वया स्वचा चाःउला, थःथःपिसं ज्वना
वयागु सकतां दोहलपा नम्ररूपं साष्टाङ्ग प्रणाम याना
भगवान् बुद्धया ख्वाः स्वया च्वन ।

थुगु समये अनाथपिण्डक महाजननं थः परिवारपिं
गंका पञ्चोपहारया पूजा सामग्रि ज्वना, थुगु स्थाने थ्यंका

भगवान् बुद्धया स्वा स्वया हर्षात्सुकं पूजादि याय् धुंका
 ध्वसपोल भगवान्या न्होने च्वना ल्हाहा विन्तियाना
 सद्धर्मज्ञान धर्मोपदेश न्यनेत पुलिचुय् थगांन्यया नम्ररूपं
 शील धारणायाणा विन्तियाना च्वन ।

थुगु समयस सकसियां थ.थ.गु मने च्वन कि ध्वसपोल
 भगवान् गुरुं लु धर्मोपदेश चिया विज्यायिगु ज्वी धका
 हर्षे याना च्वन ।

भगवानं धर्मोपदेश यायिबले क्रमानुसारं सभा ज्वीगु
 थथे खः—

भगवान्या जवे शालिपुत्र महाभिक्षु, खवे महामौङ्ग-
 ल्यायण भिक्षु, न्होने आनन्द भिक्षु, काश्यप भिक्षु,
 अनंलि पञ्चभद्र वर्गीयर्षि न्यात्त महाभिक्षुगणपि शिष्यपि
 च्वने धुंको अनंलि मेमेपि संघ भिक्षुपि, उपाशक उपाशिका
 गणपि सहितयाना प्रश्न यायिद्ध (न्हापालाक खं न्यने
 सःद्ध) विद्वान् न्होनेसं च्वनि ।

तदा उगु अवस्थास भगवान्या जवे च्वत्त मुख्यत्त
 शिष्य शालिपुत्र महाभिक्षु पुंगव थःगु आश्रमं दना
 वना भगवान् गुरुयात स्वचा चाःउला पादकमलस भोपुया

ज्वगु ल्हाः थकया थगान्यया पुलि निग्बलं पृथ्वीस चुया
थुगुप्रकारं चिन्तियात ।

भगवन् लोकनाथ त्वं सर्वज्ञ श्रीमताम्बर ।

सर्व लोकानुपालार्थं सद्धर्म ब्रुहि सास्त्रतं ॥

हे भगवन् लोकनाथ सर्वज्ञ ! छलपोल सम्पूर्ण
ऐश्वर्य्य दायक जुया सकल लोकपिन्त अनुकम्पा तया
सर्वदा ज्ञानोपदेश बिया लोकपिन्त उद्धारयाना विज्यायिद्ध
खः । थुगु अवस्थाय सकल लोकया मन एकचित्त जीका
प्रशन्न मनयाना, छलोपोलं आज्ञा जीगु सद्धर्मज्ञान न्यने
धका तयार जुया च्वन । छलपोलं कृपातया विस्तार पूर्वक
आज्ञा दय्का विज्याहुँ ।

भो भदन्त सर्वज्ञ गुरु ! पुनर्वार आः थन जिगु मती
लुया वःगु खं छगूनं चिन्ति याये, छलपोलं न्यना थुकी
यागु प्त्युत्तर बिया जिगु मनयात बोध याना विज्याहुँ ।
आः थन जिं चिन्तियाय त्यनागु खं छु धाःसा— पिण्डपात्र
दान यानागुया पुण्य फल गुलि दु ? पञ्चदान धैगु छु ?
तथा सम्यक् धर्म धैगु जीगु गध्ये ? आर्यावर्त पुण्यभूमी
ध्व नेपालमण्डले सकभनं श्रावण कृष्णया त्रयोदशी दिन
खुन्हु पिण्डपात्रादि (पञ्चदान) दान यायिगु आपालं

प्रचलित जुयाचंगु खनेदु । ध्वहे नेपालमण्डले ललित पट्टन
(यल देश) छगुलि जक श्रावण शुक्लया अष्टमी दिन खुन्दु
प्रचलित जुया च्वन । थुकीयागु खँ गथ्थे ? सुनां याना
जुगु ? ध्वयाम्ह सु ? थुगु खँ छलपोलं व्यक्तयाना आज्ञा
दय्का बिज्याहुँ । थुगु खँ न्यने दत धाःसा जिगु मन
जक मसु, थन सभास च्वनाच्वंर्पि सकल लोकयां मनोरथ
पूर्ण ज्वी, अनुम्पातया बिज्याहुँ ।

इति संप्रार्थितं तेन भगवान् स मुनीश्वरः ।
शालिपुत्रं भिक्षुवन्तं संपश्यन्नेवमादिशत् ॥
भिक्षुवः शृणु पूर्वस्य जन्मनः यत्कृताऽकृतम् ।
पाप पुण्य विवेकानां प्रवक्ष्यामि समासतः ॥

थथे शालिपुत्र महाभिक्षुं चिन्तियाःगु खँ न्यना भगवान्
मुनीश्वर शाक्यमुनि बुद्धं प्रश्नयाम्ह शालिपुत्र महाभिक्षुयागु
स्वाःस्वया थुगु प्रकारं आज्ञादय्का बिज्यात । हे शालिपुत्र
महाभिक्षु पुंगव ! छ धन्य खः, छ बांलागु खँ प्रश्नयात । ध्व खँ
जि व्यक्तयाना कने, सकसिनं एक चित्तयाना न्य ।

न्हापा जुयाचंगु खँ अथवा गुम्हसँ गुगु कर्म यायि
उम्हसँ उगु हे रूपं भोग याय्मागु कर्मवृत्ति पाप पुण्यया

न विवेक शुभाऽशुभ भिगू मभिगू भोगयाना वंगू, केवल थमं
हे भोगयाना वयागू जन्म चरित्र (पञ्चदान) पिण्डपात्र
दान न्हापालाक नेपाले अथवा ललित पट्टने (यल देशे)
थुगू धर्म विशेषयाना याना वंम्ह वा याना क्यंम्ह केवल
सद्धर्मचर्य्य सम्यक् धर्मया पुण्यानुभावं सुगति प्राप्त जुया
वंगू इत्यादि खं विस्तारं कने । थन सकल सभालोक्या
थुगू खं न्यना, स्वया मात्रं सद्धर्मज्ञान प्राप्तजुया मोक्षगति
प्राप्तज्वीमा ।

। अङ्गीकारमिति ।

इति श्री कपिशऽवदाने निदान परिवर्त्तौ नाम प्रथमोऽध्यायः । १ ।



अथ किंशुकवने कपि जन्म कथा

थनलि किंशुकवने जन्म जुया च्वंप्पि माक तय्गु खँ;
पुरा कृतयुगात्परतः त्रेतायुगेऽस्मिन् नेपाल
मण्डले किंशुकवने बहवः कपिजन्मोऽभूत्,
तस्यावसाने सः वनं समस्तात् शून्यान्धकारं
भवेत्, दुर्भिक्षमित्यादिश्च ।

न्हापा पूर्वकाले सत्ययुगयांलिपा, त्रेतायुगे थ्व नेपाल
मण्डले किंशुक धका नांजुया च्वंगु वने आपालं माकत
जन्म जुया च्वन । उगु समये व वने सकभन शून्यान्धकार
जुया दुर्भिक्ष जूगुलिं उगु वने च्वंप्पि माकत आदि पशु
पक्षि गणपिनि नयेगु, त्वनेगु छुं मदया आपालं दुःख कष्ट
भोगयाना च्वन ।

तद्यथा - थ्व खँ गद्यदधःस्ता-

न्हापा भद्रकल्पे थ्व नेपाल मण्डले कालिदहं जुया
लखं त्वपुया च्वंगु थुगु स्थाने छुं लिपा त्रेतायुगे महाचोन
श्री गुरु महामञ्जुश्री विज्याना थाय्-थासे प्यंगू दिशासं

लः छोना छोया शुद्ध भूमि जुस्येलि नेमपाल अथवा
नेपाल मञ्जुपट्टन धका नामाकरणयाना देश निर्माण ज्वी
धुंहुस्येलि अनं छुं लिपा ध्वहे भद्रकल्पया प्यह्मन्न तथागत
क्रकृलन्द तथागतया पर्यायस जि वसपोलया मुख्यह्म
शिष्य ज्योतिपाल धका नां जुया च्वनाह्म बोधिसत्व जुया
वसपोलया अनुयायी जुया सेवायाना च्वना ।

थुगु अवस्थाय् मनुष्यते परमायु पीढल (४०,०००)
या प्रमाण दु । थुगु समयस किंशुक नाम जुया च्वंगु छगू
वने न्हापा छुं पापयाना वःगुलि पशु जन्म काःवया च्वपि
आपालं वासयाना च्वन । विशेषयाना माकत यको दया
च्वन । समयानुकूल उगु किंशुकवने सकभन जल वृष्टि
मजुया बराबर गोफयनं वःगुलि सूख्येया तेज नं लिचिला,
वन छगुलि खूँस्ये अन्धाकार जुया, अनच्च्वपि सकल पशु
पंक्षि गणपिनि हाहाकार जुया, दुःख जुया च्वन ।
नयगु, तोनेगु, च्वनेगु वास नं छिगु मदया, उख्ये थुख्ये
भ्रमण याना ख्वया हाला जुल । पंक्षि गणपि फुकं
मेगु स्थाने वास याःवन । धुँ, किसि, भालु इत्यादि वन
जन्तुत नं मेमेगु वनान्तरे वास याःवन । माकत नं फुक
गत वने गन च्वने जुल, न्हाथाय् वंषानं हाहायाना हैगुलि
वहे वनेतुं वया दुःख भोगयाना च्वन ।

तदा उगु समये भद्रकल्पया प्यह्मह्म तथागत श्री
 क्रकुछन्द बुद्ध नेपाल मण्डले नगर, ग्राम, पर्वतस भ्रमण
 याना क्रमशः थ्व किंशुकवने द्वाहां विज्यागु बेलास श्री
 क्रकुछन्द बुद्धया अनुयायी शिष्यपिनि मध्ये मुख्यह्म शिष्य
 ज्योतिपाल बोधिसत्त्वं उगु वने खाद्यान्न पान हीन जूगुलि
 दीन दुर्मनयाना वासयाना च्वंपि आपालं माकत खना
 अभिगु दुःख सह याय् मफया, चित्त धैर्य याय् मफया
 करुणा सहित मिखां ख्ववि धारा हाय्का ख्वया च्वन ।

थनंलि क्रकुछन्द बुद्ध भगवानं उगु वनस वासयाना
 च्वंपि माकतयगु दुःख खना, चित्तं धैर्य याय् मफया
 ख्वया च्वंक्ष थः मुख्यह्म शिष्य ज्योतिपाल बोधिसत्त्वयात
 खना वैगु ख्वाःस्वया आज्ञा दयका विज्यात ।

हे महाज्ञानि ज्योतिपाल ! छ छाय् ख्वया ? ख्वय् मते,
 ख्वय् मते, छ चित्तयात धैर्यया, थ्व सन्तारे सकल प्राणिया
 न्हापा पूर्व जन्मस थःथःपिसं कुशल अकुशल कर्मयाना
 वःगुया फल लिपा सुख-दुःख भोग याय् माली धका छं
 मस्यूला । थुमिसं पूर्व जन्मे मनुष्य जन्म जुया आपालं
 अकुशलगु पाप कर्म याना वल, उकिं आः थन वने माक
 जन्म जुया नं नय्गु, त्वनेगु, छुं मदयका दुःख भोगयाना

चने माल । आः जि छगू थुमित उपकार याय्गु खँ छन्त
 धाय्, छं स्वीकार याना का । न्होपा थुमिसं मनुष्य जन्म
 जुया झिता प्रकारया अकुशल कर्मयाना वल, उकिं
 आः थन वने माक जन्म जुया दुःख भोग याना
 चने माल ।

थुमिसं याना वःगु दशांकुशल धैगु झिगू प्रकारया
 अकुशल कर्म दु, छु छु धाःसाः—प्राणाति पाप—परया प्राणकया
 हिंसा कर्म याय्गु १, अदत्ता दान—परया धन सम्पत्तिस
 लोभ तथा हरण याय्गु २, काम मिथ्याचार—पर स्त्री
 नाप लोभ तथा काम भोग याना ज्वीगु ३, ध्व स्वता काय
 शरीरं यायिगु पाप जुल ।

हानं मिथ्यावाद—सदा नं झुट्टा खँ जक ल्हाय्गु १,
 पैशून्य—परयात नुगले धाःज्वीक खँ ल्हाना, नुगले
 स्याकेगु २, पारुष्य—परयात छुरीं स्वीध्ये क्षुद्र वचनं
 छक खँ ल्हाना अपमान ज्वीक, नुगले स्याक बोविया
 अथवा श्राप वीगु ३, संभिन्न प्रलाप—मिलेजूपिन्त छोखँ
 बोखँ ल्हाना फाया वीगु तथा ज्यायाका जसवी माली
 धका अपजस विया खँ ल्हाय्गु ४ ध्व प्यता वाक म्हुतुं
 यायिगु पाप खः ।

हानं अविद्या- परया जय मङ्गल जूगु खना नुगलं
 सह याय् मफ्यका ज्वीगु १, व्यापाद- परया दुःख जूगु
 खना मन हर्ष याना ज्वीगु २, मिथ्यादृष्टि- कुविद्या सय्का
 परयात कुमन्त्रं प्रहारयाना दुःख वीगु ३, ध्व स्वता चित्तं
 यायिगु पाप खः । ध्व समेत झिगू १० प्रकारया
 अकुशल पाप कर्म याःपि पापि मनूत सिना, नरके बना
 आपालं दुःख भोग यानालि हानं थुगु किंशुक वने
 पशु जुया जन्म कया च्वंपि पशुतमध्ये विशेष याना ध्व
 माकतसें आपालं दुःख सिया च्वंगु खः ।

हे महाज्ञानि ज्योतिपाल ! आः थुमित उद्धार याय्त
 छ ध्व किंशुक वने माकया अवतार कया, माक बोलिं खँ
 ल्हाना, थुमित धर्मोपदेश बीत छ थुगु वने वासया ।
 छन्त लिपा अवश्यमेव सम्यक्संबुद्ध पद प्राप्त ज्वीगु सद्धर्म
 ज्ञानलाभ ज्वी ।

थय्ये गुरुं उपदेश व्यूगु शुभ-अमृत वचन न्यना गुरु
 यागु वचन तथाऽस्तु याना श्री गुरु क्रकुछन्द बुद्धयागु
 पादकमले प्रणाम याना, बुद्ध ज्योतिपाल बोधिसत्व
 समाधि द्वारा देहान्त जुया उगु किंशुकवने माकया
 अवतार कया वास यात ।

धनंलि श्री क्रकुछन्द बुद्धं म्येम्येपिं शिष्य परिवार
मुंका उगु किंशुकवन तोता अन्यत्र स्थान-स्थानान्तरे
विश्राम याना धर्मोपदेश बिया, आपालं लोकपिन्त हित
याना चंक्रमण याना विज्यागु जुल ।

हे शालिपुत्र भिक्षु पुंगव ! श्व हे कपि (माक) यात
ज्ञानाकर धका नामाकरण जूगु खः । श्व हे ज्ञानाकर
माकनं छुं लिपा किंशुकवने च्वंपि फुक माकतेत विस्तार
रूपं ज्ञान बुद्धि कना बोधयाना च्वच्चं माकते थःथःगु
मन बोध जुया धैर्य्य याना च्वने फत ।

छन्हू सकल माकत मिले जुया, थुद्ध ज्ञानाकर माक
यात दश्वी तया सकसिनं विन्तियात । भो महाज्ञानि
जुया च्वंक्ष पासा ! जिपिं फुक अज्ञानि जुया च्वंपिन्त
अनेक प्रकारं अलसि मचासे ज्ञान बुद्धि कना बोध याना
रक्षायात, धन्य-धन्य छलपोल खः । थर्निनिसें थुगुवने जिपिं
माक फुक सियां छलपोल मालीक (जुजु) जुल । छाय्
धाःसा छलपोल आपाल ज्ञान बुद्धि दुद्ध, दानं धीर वन्तद्ध,
वल वीर्य्य पराक्रमनं दुद्ध, आपालं चतुरद्ध, सकलयात
करुणातया रक्षा याय् फुद्ध जूया निर्निं छलपोल यागु
वचन जिमिसं माने याना च्वने, छुयाय् माःगु खः जिमित

उपकार ज्वीगु खँ कना रक्षा याना बिज्याहुँ । छलपौठ
जिमि मालीक जुल । थनिनिपेँ जिपिँ माकते राजान
छलपोल जुल धका प्रशंसा याना फुक माकतेसं वने दुगु
चीज बीज हया न्होने तथा प्रणाम याना, ज्ञानाकर माक
यात प्रशंसा याना जुजु धका मान्यता बिया स्थापना
याना तल ।

ज्ञानाकर माक अति खुसि जुया फुकसितं माया स्नेह
तथा अनेक प्रकारं अति बुद्धि बिया, वने भ्रमण याना दुगु
चीज बीज नया तोना, काल दिन हना वास याना दुःख
सह याना च्वन ।

छन्हु वने चाःउला नयगु माःजुल, गनहे नयगु चूमलाना
माकत फुकं धांलात, पित्यागु सहाय्य मफया ख्वया जुल,
गुलिसियां लः तोनोगु ईच्छा जुया म्हुतु गन, उख्येँ उख्येँ
वना लः तोनेगु माः जुल सकभनं लः सुखा जुया लः
तोनेगुनं चूमलाना असमर्थ जुया फुक माकत छथासं मुना
ख्वया च्वन । धिक्कार-धिक्कार छु याना वयागु पापं माक जन्म
जुयानं नयगु तोनेगु आहार चूमलात, लः नापं तोने मखन,
थथ्ये ज्वीका जन्म कया च्वनाया छु प्रयोजन दनि,
याकनं सिना वने दय्मा । हाहा गुजोगु दुःख जुल धका

हाला खवया क्व क्व छुना च्वन । थुगु अवस्थास जुजु
याना तःञ्च बोधिसत्व स्वरूप ज्ञानाकर माकनं थः दथ्वी
च्वना थुमित बोध यात ।

हे पासापि ! थस्व थस्व, नीतिस ल्हाना तःगु खँ जि
मोका च्वनागु दु, झीपि माक जाती पशुया अंश जुयानं
ज्ञान बुद्धि दयके माल । गथ्ये धाःसा— जि छगु खँ ल्हाय्
त्यना, छिपि फुकसिनं बोलाक एक चित्त याना न्य ।

विपत्तिकाले धैर्य्यश्च संपत्तिचोदये क्षमा ।
सभायां पटु सत्वाक्यं संग्रामे युद्ध विक्रमम् ।
उद्योगं यशसि कार्य्यं व्यसनेऽभिरुचि श्रुतम् ।
सिद्धं प्रकृति भावेन षडिदं हि महात्मनाम् ।

थ्व धाःगु छिमिस सीकि— विपत्ति जीवले धैर्य्य
याय् फय्के माल १, धन सम्पत्ति दैबले क्षमा तथा परयात
उपकार याय् फय्के माल २, सभास च्वने बले चतुर जुया
मिगु खँ ल्हाय् फय्के माल ३, युद्ध जीवले विस्त्युं मवंस्ये
शरा जुया धर्म युद्ध पराक्रम कथने माल ४, यश कमाय्
याय् बले उद्योगस ध्यानतय् फय्के माल ५, दुःख जीवले
मिगु खँ ल्हाना दिन हने फय्के माल ६, थ्व खुता अवश्य

नं ततःधर्पि साधु महात्मा ज्ञानिपिसं सीका च्वनि, झीसं
नं थ्व हे खँ लुमंका दुःख जूसा न धैर्य यांना च्वने फय्के
माल । आमथ्ये खोया भूमीस भोसुना च्वनेगु मखु,
छन्दुजा थन अवश्य नं सुख जीतिनि, छुं हे धन्दा
काय्म्वा ।

जल वृष्टि मज्जुलिं सम्म वने नय्गु सुखा जुल, हथाय्
चाय् मते त्रिरत्नया नामका जल वृष्टिज्वी, वने जक मखु
सकभनं अनेक चीज बीज बुयावै, सकलया सुख ज्वी,
झी नं सुख ज्वी । उकिं आः छिपिं सकसिनं जिं धयाथ्ये
पालाक नांका धका सकलयात थथ्ये बोध यांना,
थमं न्हापालाक “ त्रिरत्न शरण, थुगु दुःख याकन
मुक्त ज्वीमा, याकनं जल वृष्टि जुया सकलया जय
ज्वीमा ” धका नाम कया कयन । थ्व हे रात माकत
फुकसिनं पालाक “ त्रिरत्न शरण, थुगु दुःख याकनं
मुक्त ज्वीमा, याकनं जल वृष्टि जुया सकलयात आनन्द
सुख प्राप्त ज्वीमा ” धका बारम्बार त्रिरत्नया नाम कया
च्वन । नय् मखुना जक मखु कि लः हे तोने मखुना
सामर्थ्य हीन जुया च्वर्पि माकत फुकसिनं “ त्रिरत्न
शरण ” धका हाहाँ सः हे सुक हाला च्वन ।

अथास्मिन्नवसरे पञ्चज्ञानात्मकत्वं दिव्य-
श्रोत्र आदिनाथ श्रीदीपङ्कर बुद्धः क्षुत्तृषार्त्तात्
सामर्थ्यहीन कपीनां घोषणां श्रुत्वा तेषां
हिताय सुखाय अनुकम्पापुरस्कृत्य, अकनिष्ठ
भुवनात् नेपालमण्डले प्रसन्नशीलनाम विहारे
अवतीर्णः, सप्त शीलवान्, गुणवान्, धैर्यवान्
महाभिर्क्षु पुंगवश्चसाकं तद्विहारान्निष्क्रम्य
याति, प्रभयाऽभियुक्तैः सस्तद्वनं सर्वप्रभयाऽभि
भातिश्चेति ।

थर्नलि उगु समये पञ्चज्ञानया शरीर जुया यावत्
संसारे सकलमत्वं प्राणियागु वाचा न्हायपनं ताया
विज्यान्ना आदिनाथ श्री दीपङ्कर बुद्धं नयेत् अन्न, तोनेत
लः मदुगुलि दुःख जुया हालेगु सामर्थ्य मदया च्वपि
माकत सः सुक सुक श्री त्रिरत्न शरण धका हालो च्वंगु
शब्द ताया, ध्यान दृष्टि विचार याना स्वया थुमिगु दुःख
सीका, दया तया धुमित हित सुख यायया कारणे
अकनिष्ठ भुवनं नेपाल मण्डले प्रसन्न शील धका नांजुया
च्वगु विहारे क्वहाँ विज्याना शीलवान्, गुणवान्,

धैर्यवान्पि न्हयम्ह महान् भिक्षु पुङ्गवपि सहित याना उगु
विहार पिहाँ विज्याना थःगु शरीरं अत्यानन्द सुख
दायकगु रश्मि प्रकाश याना, किंशुकवने सकभनं खय्का,
न्हयम्ह भिक्षु पुङ्गवपि ल्यूल्यू तथा विस्तार पूर्वक गमन
याना उगु किंशुकवने द्वाहाँ विज्यात ।

करुणात्मक आदिनाथ श्री दीपङ्कर बुद्धयागु रश्मि
अत्यन्त जाज्वल्य मानगु तेज वनस सकभनं खःगु प्रभावं
उगु वने शीतलगु वायु बहे जुया किञ्चित् जल वृष्टि नं
जुल । लता-लहरा, स्वांमा-सिमा, दक्ख बांलाना स्वां
होया, फल सया, तृण-गुल्म इत्यादि फुक बाउंसे च्वना,
सिमा पत्तिकं झंग पक्षि गणपि जुना मधूर स्वर हाला
च्वगु शब्द तायदया बल । थाय् थासे अष्टांग गुण
सयुक्तगु लखँ पूर्ण जुया च्वगु वुँगा पुख् नं खने दया
अति मनोरमगु स्वर्गया नन्दनवगीचा समानं उगु किंशुक-
वने शोभित जुया सकभनं शीतलगु फसंकया आनन्दमय
जुयावल ।

थनंलि वनस वासयाना दुःख कष्ट भोग याना च्वपि
माकत मध्ये मुख्यतः ज्ञानाकर माकनं भिक्षुपि सहित याना
उगु वने द्वाहाँ विज्यात आदिनाथ श्री दीपङ्कर बुद्ध भगवान्

यात यानंनिसें खन, खने मात्रं मनस अति हर्षमान याना
थःगुं अनुमति पालनो याना च्वर्पि सकल माकत मुह्ना हता
हतासं ब्वां ब्वां वना भगवान् श्री दीपङ्कर बुद्धयात स्वचाः
चाउला चरणकमले शिर भोपुया सकसिनं मिखां खोवि
हायका दुःख प्रकट याना थुगु प्रकारं चिन्तियात ।

शानाकर प्रभुष्व सकल भाकतसें चिन्तियाथु यथ्ये खः—

भो भगवन्, हे नाथ ! छलपोल गर्थिद्व धाःसा— सकल
सत्त्वप्राणिपिन्त उपकार याय्गुलि मालीक जुया विज्यायिद्व ।
अज्ञानरूपी अन्धकारं तोपुया, छुं मखना, छुं मसिया
च्वर्पि अन्धातयत्त ज्ञानरूपी तःप्वागु मत जुया सकभनं
ज्योति जाज्वल्य मानगु तेज प्रकाश याना खय्का, सद्धर्म
ज्ञानोपदेश विया विज्यायिद्व । सन्साररूपी समुद्रं तरे
जुया मोक्ष वनेगु लँ मखना च्वपिन्त मोक्ष वनेगु लँ क्यना
विज्यायिद्व । नय्गु, त्वनेगु, पुनेगु मदया च्वपिन्त तथा
वास मदया च्वपिन्त नय्गु, त्वनेगु, पुनेगु पुरे याना वास
दयका विज्यायिद्व । दुःख दरिद्रपिन्त करुणा दृष्टि स्वया,
धनाद्य याना, सुखि ज्वीका, आनन्द याना विज्यायिद्व ।
ततः च्वकं भय त्रास ज्वीका वने च्वना दुःख कष्ट भोग
याना च्वर्पि पशु पक्षि तयत्तनं थुमिगु दुःखं मुक्त याना

विज्यायिह । रोगी तयत् निरोगी याना अन्न नयमखंपिन्त
 अन्न नयगु दयका, लःत्वने मखंपिन्त लःत्वनेगु दयका,
 लाता लाती ज्यो पाक, वै तयत्तनं खँ ल्हायगु वाक व्यक्त
 ज्वोका, खँ ल्हाय फयका, पागल मज्जीका, ज्ञान बुद्धि
 मदुपिन्त ज्ञान बुद्धि बिया उद्धार याना विज्यायिह ।
 हे भगवान् ! छलपोल सर्वज्ञ जुया सत्व प्राणिपिनिगु दुःख
 स्वयेमफया, करुणावन्त जुया, स्वयं थः हे विज्याना दुःखि
 प्राणिपिन्त उद्धार याना विज्यायिह । छलपोलं जिपिथ्यं-
 जारिपि पशु जाति माकत जुया नयगु, त्वनेगु, वासं च्वनेगु
 स्थान इत्यादि अन्न, लः, नयगु, त्वनेगु, मदया कथुगंका
 मूर्च्छा ज्वीका ताःकालं संकष्ट पीडा ज्वीका च्वनारिपि
 पापी तयगु दुःख कष्ट सीका खंका, जिमितनं उद्धारयाय्या
 कारणे थन विज्यात, हे भगवान् ! छलपोलं जिमित याकनं
 उद्धार याना विज्याहुँ ।

नमामि ते जगन्नाथ सदाते शरणं ह्यऽहम् ।

चन्तव्यं मेऽपराधं च यन्मया प्रकृतं पुरा ॥

भो भगवान्, हे जगन्नाथ ! छलपोल्यात जि सदासर्व-
 कालसं नमस्कार । भो भगवान् ! निश्चय नं सदाकालेसं
 छलपोल यागु शरणे जि च्वनेगु जुल । भो जगन्नाथ !

न्हापा जिं छुछु अकुशल पाप कर्म याना वयागु दु, छुछु अपराध याना वयागु दु, थ्व फुक जिगु अपराध क्षमा याना, उद्धार याना विज्याहुँ । थथ्ये मालीक ज्ञानाकर माकनं श्री दीपकर बुद्ध भगवान्यात स्तोत्र याना विन्ति याःगु खना, मेमेपिं माकत फुकसिनं थःथःपिनि सःसःथे म्हति म्हति स्तोत्र याना विन्तियात ।

भो भगवन्, सर्वज्ञनाथ ! जिपिं थुलिमछि पशु जाती माकतसें न्हापायागु जन्मसं छुछु अकुशलगु पाप कर्म याना वयागु दु, व जिमिसं मस्यू । आः जिपिं थ्व वनान्तरे माक जुया जन्म कया, नयेगु, त्वनेगु हे छुं मदयका आपालं दुःख कष्ट भोग याना च्वने धुन । आः थर्निनिसं छलपोलं जिमिगु उपरे करुणातया उद्धार याना विज्यायगु अवस्था जुल धका सकल कपिगणपिसं विन्तियात ।

इत्युक्त्वा तत्क्षणां तच्च वनंगत्वा सः वानरः ।
गृहीत्वा पनसं पक्वं फलं तस्मै प्रढोकितमित्यादि ॥

थथ्ये सकसिनं विन्तियाय् धुंका अन दक्व माकया मालीक जुया च्वंझ ज्ञानाकर माक क्षण मात्रं वने द्वाहाँ

वना उख्ये थुख्ये चाःहिला स्वःजुल, मेमेपि माकत नं
 मालीकनापं ल्यू ल्यू वन। अले अन ज्ञानाकर माकनं तःमागु
 सिमाय् तःगोगु पाकये जुया च्वंगु फँसि छगः सया च्वंगु
 खन, व फँसि फल खनेवं ज्ञानाकर माकया मन लय् लय्
 ताया सिमास तिन्हुया थाहाँ वना, फँसि फल छगः खाना
 ज्वना, सिमां क्वहाँ वल। अले मेपि माकतसेनं हता-हतासं
 फयां फुथे व्यां व्यां वना वने दुगु, सया च्वंगु अंव, हल,
 बिहल, केरा, अं तथा कटहर, पासि, बसि, तु, लँ, सकि
 इत्यादि वने दु दुगु फल खाना, स्कन्द मूल लिना ज्वना
 वया थःपिनि मालीक जुया च्वंम्ह ज्ञानाकर नापं श्री
 दीपङ्कर आदि बुद्ध भगवान् बिज्याना च्वंगु थासे वल।

थनंलि ज्ञानाकर माकनं श्री दीपङ्कर आदि बुद्ध
 भगवान् यागु मुखमण्डल स्वया चिन्तियात।

भो भगवन् ! जि पशु जाती जुया च्वनाम्ह माकनं
 छुं दान याय् मफु, थ्व वने सया च्वंगु फल फँसि छगः
 जिगु श्रद्धां छलपोलयात थौं चढे याय् त्यना कृपा तया
 कया बिज्याहुं।

थथे चिन्ति याना किंशुकवने माकतय् मालीक
 जुया च्वंम्ह बोधिसत्व स्वरूपम्ह ज्ञानाकर माकनं निपा

ल्लार्ति नं तःगोगु फँसि फल छगः ज्वना श्री दीपङ्कर
आदि बुद्ध भगवान् यात फँसि फल दान यात । व दिन
श्रावण शुक्लया अष्टमी जुया च्वन ।

थनंलि ध्व हे स्वया मेमेपि माकतसेनं मालीकं दान
याध्यें थःथःपिसं खाना, लिना ज्वना वयागु अंब, हल,
विहल, केरा, अँ इत्यादि म्हरति म्हरति दानयात ।



श्रीदीपङ्कर सम्यक्सम्बुद्ध भगवान् तथागतयात श्रावण शुक्लया
अष्टमी खुन्दु किशुकवने बोधिसत्व स्वरूप ज्ञानाकर
माकनं फँसि फल दान यागु चित्र ।

युगु अवस्थास्य श्री दीपङ्कर बुद्धं दानं कायत्त बोना
विज्यागु वाक्यं धन्यं स्वः

धात्री हरीतकी रम्भा चूतं च पनसाऽधिकम् ।
स्कन्द मूलादिकं दानं यथेप्सितं फलं लभेत् ॥

युलि वाक्य बोना दानं काय् धुल्लेलि

अथ सो भगवान् दीपङ्कर बुद्धः प्रहर्षो-
ऽभयमुद्रया आशीर्वादं दद्यात् करुणान्वित
मानसरित्यादि ।

थर्नालि ध्वसपोल श्री दीपङ्कर बुद्ध भगवान्या अत्यन्त
हर्षमान जुया करुणा दृष्टिं स्वया, जवगु ल्हार्ति अभय मुद्रा
क्यना आशीर्वाद विया, पुनर्वार माकया मालीक जुया
च्वंभ्द ज्ञानाकर सहित मेमेपि सकल माकतपुगु ख्वाःस्वया
आज्ञा दयका विज्यात ।

हे कपि गणनायक, ज्ञानाकर ! तथा हेवानरगणपि !
छिपिं सकलं धन्य धन्य स्वः । साधु साधु धयापि छिपिं हे
स्वः । छिपिं युगु तःधंगु किंगुक्वने च्वना दुःख सिया
च्वंगुया फल थर्निनिसं सफल जीमा, जित थौं छिपिं

मालीकंनिसैं चाकरतसमेत सकसिनं फंसि फल आदि
अंब, हल, विहल, केरा, अँ इत्यादि बने दुगु फल, स्कन्द
मूल दान यागु पुण्यया प्रभावं छिपि सकसियां मनं तुनागु
(यथेप्सित फल याकनं प्राप्त ज्वीमा, थौं हे स्वयं दयमा,
पशुजुया जन्म काय् म्वालेमा, भिंगु गति, भिंगु कुले,
भिंगु स्थाने सप्त वृद्धि परिपूर्ण जुया वास याना च्वने
दयमा ।

सप्त वृद्धि धैगु न्हय्गु प्रकारया भिंगु दु, छुं छुं धाःला-

आयुः वृद्धिः यशो वृद्धिः वृद्धि प्रज्ञाः सुखस्तथा ।
आरोग्य धन सन्तान सन्तु ते सप्त वृद्धयः ॥

आयुवृद्धि धैगु- आयुः बढे ज्वीगु १, यशोवृद्धि
धैगु- जश बढे ज्वीगु, भिंगुनां सकभनं प्रचार ज्वीगु २,
प्रज्ञा वृद्धि धैगु- ज्ञान वृद्धि बढे ज्वीगु ३, वश्यं सुख
वृद्धि धैगु- सुख ऐश्वर्य बढे ज्वीगु ४, आरोग्य धैगु-
रोग मज्वीगु ५, धन वृद्धि धैगु- सम्पत्ति, धन बढे ज्वीगु ६,
सन्तान वृद्धि धैगु- सुपुत्रपि सन्तान बढे ज्वीगु ७, थ्व
न्हय्गु वृद्धि जन्म जन्म पत्तिकं ज्वीमा । थुगु हे जन्मय
मनुष्य जुया भिंगु शुभ कर्म याना बने फग्मा धका

आशीर्वाद विया, पुनर्वार सकल माकया वथानयात स्वया
आज्ञा दयका विज्यात ।

हे वानरगणपि ! छिपि सकलें थुगु वनया नायक जुया
च्वंम ज्ञानाकर मालीकं उपदेश व्युगु भिगु खँ न्यना वया
ल्यू ल्यू उद्धार ज्वीमा धका सकल पशु जाती वानरगणपिन्त
शुभाशीर्वाद वियाविज्यात । उगु समये ज्ञानाकर सहित सकल
माकतसें तथाऽस्तु तथाऽस्तु धका प्रणाम याना च्वन ।

थनंलि थ्वसपोल श्री दीपङ्कर बुध्दं थः शिष्य न्हय्म्ह
भिक्षुयागु स्वाः स्वया आज्ञा दयका विज्यात । हे भिक्षुपि !
थ्व वने माकते मालोक जुयाच्वंम्ह ज्ञानाकर धैम्ह छम्ह श्री
क्रकुलन्द तथागतया शिष्य ज्योतिपाल बोधिसत्व खः ।
गुरुयागु उपदेश न्यना थ्व वने माकयो अवतार कया
सकल माकतय्त रक्षा याय्त वया च्वम्ह खः । थ्व भविष्ये
(कलिस शाक्यमुनि तथागत धाय्का सकल प्राणियात
कल्याण ज्वीगु, सध्दर्म हानोपदेश विया विज्याइ तिनिम्ह
खः, छिमिसं सीकि धका थुलि खँ आज्ञा दयका थ्व वनस
क्षगभर विश्रामयाय् धका विश्राम याना विज्यात ।

इतिश्री कपिदाऽवदाने किशुकवने श्री दीपङ्कर बुद्धायः बोधिसत्व
रूप ज्ञानाकर कविना पनस फल दान द्वितीयोध्याय ॥२॥

अथः ज्ञानाकरादि वानराः
मानवदेह प्राप्त कथा

थनलि ज्ञानाकर आदि माकत मनुष्यया शरीर
प्राप्त जूगु खँ ।

तत्र चंक्रामते बुद्धं वानरारवलोकनाः ।
अगच्छन् पृष्ठतो सर्वे मुनेर्तस्मात्तु गाहने ॥
ततोऽपतन्त सर्वेऽपि जीर्णकूपे भयानके ।
लोकधातुस्तदग्राऽस्त सहायाऽपि महोग्रहः ॥

थनलि उगु वने माकत सकलें श्री दीपङ्कर आदि
बुद्ध भगवानयात चाःउला लिहाँ वंगु बखते सकसियां
थःथःगु मती थथिनइह प्रभू, दीपङ्कर बुद्ध भगवानयात
झासं न्हिप्यं क्यना गथे वने, थ्व झीगू कर्तव्य मसु
धका विचार याना माकत सकलें लिक्थं लिक्थं वन ।

श्री दीपङ्कर आदिनाथ बुद्ध भगवानयागु प्रभावं
अन वनया मध्ये पुलांगु जीणजुया च्वंगु, महाभयानकं

तःजाजुया च्वंगु वँतू छगः प्रादुर्भाव जुल । व वँतूयागु
आश्रय दु कि स्वगेयागु सुख भांग समान फल बिया
उध्दार यायिगु ।

थुगु समये लिक्थं-लिक्थं वंपि ज्ञानाकरनिसें फुक
माकत वहे वँतूथी कुतु वन ।

थ्व बेलस माकत सकलें थुगु वँतूथी कुतु वने मात्र
थुमित लखं तोपुया ई-ई पना मृत्युज्वीगु सम्भवं त्रासजुया
सकसिनं त्रिरत्न नमोच्चारण याना, थःथःगु बाहु बलं
ति-ति न्हुया सना विशब्द-विशब्दं हाल । भो भगवान् !
थन जिपि सकलें मृत्यु ज्वीन, छलपोलं जिमित याकन
रक्षा याना बिज्याहुँ धका लाय्-लाय्बुया खोया
हाला च्वन ।

ते विलापाः रवं श्रुत्वा गतवान् सः मुनीश्वरः ।
तान्दृष्ट्वा वानरान्सर्वानाराच्छागच्छ चोक्तवान् ॥

उगु समये तूथी कुतु वंपि माकत एवं प्रकारं ख्वया
हाला हःगु कोलाहल शब्द श्री मुनीश्वर दीपङ्कर बुद्ध
भगवानं ताया, माकतय्गु दुःख सीका हतासं भिक्षुपि

सहित विज्याना व वंतूथी क्वस्वया विज्यासेलि अन
तूथी कुतुंबना च्वंपि माकतयगु दुःख वेदना खना धुमित
भलसा चिया आज्ञादयका विज्यात ।

हे वानर गणपि ! छिपि ग्याय्मते-ग्याय्मते, छुं
धन्दा काय्मते, श्री त्रिरत्नयागु नांका छुं हे ज्वीमखु ।
थथे आज्ञा जुया तूथी ल्हाः क्वछोया थाहाँ वा-थाहाँ
वा धका न्हापालाक ज्ञानाकर माकयात ज्वना तूथीं
थकाल । अनलि हानं मेमेपि माकतयेत नं थकाल ।
थ्व्वेलस वसपोलया अनुयायी न्हय्त्त भिक्षुपिसं नं तूथी
ल्हाः क्वछोया माकतयत्त ज्वना तूथीं च्वे थकाल ।
अनलि व माकत फुकं तूथीं च्वे थकालिसे वानरया
रूपं मुक्त जुया शुद्धगु सुन्दर रूपगु मनुष्यया शरीर
प्राप्त जुल ।

थनंलि ज्ञानाकर अति विस्मय चाया पासापि सकसितं
सम्बोधन याना धाल ।

अहो आश्चर्य ! धन्य-धन्य खः झीगु भाग्य, हे
पासापि आः झी न्हापायागु माकया शरीर गन वन ?
क्षण मात्रं झीगु पाप मुक्त जुया फुककं मनुष्ययागु शरीर

प्राप्त जुल । ध्व फुक्कं शीसं श्री दीपङ्कर आदि बुद्ध
भगवान्यात फँसि आदि फल, स्कन्ध-मूल दान यानागु
पुण्यया प्रभावं जूगु ख; धका छिमिसं सौकि ।

थुलि खँ पासापिन्त न्यंका थः न्होच्चना मेपिं
सकलें ल्यू ल्यू तथा श्री दीपङ्कर आदि बुद्ध भगवान्या
पाद कमले त्रि प्रदक्षिणा यानालि ज्ञानाकरं पुलिं चुया
ल्हाः हाजलपा थुगु प्रकारं विन्तियात ।

त्वं कतो त्वं च बन्धु जगति शुभददं

प्रेमदाता त्वमेव ।

नाथत्वं सौख्यदाता परम गुरुनिधिं

त्वं अहं वै नमामि ॥

रात्रौ केचित्प्रदीपोऽनल तपन निधौ

शीतवाणी प्रदत्वं ।

रोगे भैषज्यदाता कलुष प्रहरणं

त्वं भवावधे प्लवञ्च ॥

हे भगवान् सर्वज्ञ गुरु ! जिमित रक्षा यायगुलि कर्ता
 जुया विज्याह्न छलपोल खः । जिपि सकलया वन्धु
 नं छलपोल खः । जगते शुभ कल्याण जीगु अति बुद्धि
 विया सकलयात प्रेम याना, करुणा तथा रक्षा याना
 विज्यायिह्न नं छलपोल हे खः । अनाथया नाथजुया
 सुख ऐश्वर्य आनन्द बीगुलि दाता जुया विज्याह्न
 परम गुरु छलपोल हे खः । नाना प्रकारया (निधि)
 नवरत्न आदि संयुक्त जुया च्वंगु पर्वतथ्यं आपालं
 सम्यक्सम्बोधि ज्ञानं संयुक्तजुया विज्याह्न छलपोलयात
 जि नमस्कार । हानं औंसिया रात्रिस अन्धकारं रूयूंसें
 च्वंगु समये तःप्वागु (दीप) मत समान जुया विज्याह्न
 छलपोल खः । छोया च्वंगु मी कुतुं वना च्वनां च्वने
 मफ्यक दाह जीका, अगाढगु गाले अथवा पर्वते—ज्वले
 लाना च्वं पि पापी प्राणिपिन्त शीतलगु रश्मि खय्का
 पुण्य हसीगु धर्मोपदेशया अमृतवाणी प्रदान याना
 रक्षा याना विज्यायिह्न छलपोल खः । पुनर्वार राग,
 इष, मोह, मय्यं, काम, क्रोध, लोभ, तृष्णा इत्यादि
 थ्व च्यागुलि याना पङ्कतिया भवचक्रयागु जाले
 ततःक्यंका सन्साररूपी समुद्रे कुतुं वंका पाप कर्म याना,
 जन्म, जरा, व्याधि, मृत्यु जुया दुःख सिया च्वं पिन्त

धुजोगु जालं याकनं मुक्त जीगु सद्वर्म ज्ञान धर्मो-
पदेश वियो सन्साररूपी समुद्रं उत्तरे जीगु तथा निर्वाण
पद प्राप्त जीगु अमृत वाणीया वास दान याना
विज्यायिद्ध छलपोलयात कोटिधा प्रणाम याना धका
शिर कोलुना प्रणाम याना च्वन ।

थनलि श्री दीपङ्कर आदि बुद्ध भगवानं थथे ज्ञानाकरं
थःत प्रशंसा याना आदर पूर्यक विन्ति याना प्रणाम याना
च्वंगु खना अत्यन्त खुसि जुया मुमुन्हिला आज्ञा दयका
विज्यात ।

भो ज्ञानाकर युष्माभिः पुण्यार्जनोपायं
प्रयत्नं कुरुध्वं । तत्पुण्यात्परं नान्यं । अधुना
मे फलदत्त मात्रेण यूयं मानवदेह भूतं सद्य ।

हे ज्ञानाकर प्रभृति सकल शिष्यर्षि ! छिमिसं पुण्य
कमाय याय्गु उपाय दान धर्म यायेगुलि उत्साह या ।
दान धर्म तोता याकनं फल बीगु उपाय मेगु छुं मदु ।
छिमिसं जितः थ्व वने दुगु फँसि आदि फल, स्कन्द-
मूल मात्र श्रद्धा दान याःगुलि हे छिर्षि सकलें याकनं
आः थुगु हे जन्मे वानर देह मुक्त जुया, मनुष्य देह प्राप्त

जुल । दानयागु प्रभाव धुजोगु धका छिमिसं सीकि,
बांलाक धवीकि ।

भूमि दानाद्भवेद्भोग्यं विद्याश्च प्रभुतां भवेत् ।
भाग्यं गुणादि शिल्पश्च सर्वसौख्यश्च पुरायतः ॥

हे ज्ञानाकर ! हानं छं भूमि दानयाय् फय्मा ।
भूमि दानयानागु पुण्यं महदैश्वर्यं सुख भोग प्राप्त ज्वी,
शास्त्रस निपुण जुया सकलया मालीक ज्वी, महाभाग्य-
मानी ज्वी । दान धर्म याःगु पुण्यया प्रभाव आपालं गुण
ज्ञान पराक्रम वृद्धि जुया सदाकालसं आनन्द सुख
प्राप्त ज्वी ।

हे ज्ञानाकर ! छं सदां दान पुण्य याःगुलि तत्परमु
चित्त ज्वीमा ।

भो ज्ञानाकर कामोर्थी नाम नगरे स्रार्थ-
वाह पुत्रो भविष्यसि त्वमिति, इत्युक्त्वा सः
भगवान् गतवान् । ततः षष्ठ्यन्तरे कल्पे
श्री दीपङ्कर सम्यक्संबुद्ध भगवान् समाधि
स्थितोऽभूत् ।

हे ज्ञानाकर शिष्य ! छ महाज्ञानि खः । छ थुगु
जन्म लिषा कामार्थी धैगु नगरे सार्थवाहया कुले सार्थवाह
पुत्र धायका जन्म जुया भिगु कर्म जक याना सकलयात
उद्धार याय्गु कामना ज्वीमा धका शुभाशीर्वाद बिया,
श्री दीपङ्कर तथागत आदिनाथ बुद्ध भगवान् उगु किंशुक
वन तोता न्हापा विज्यानागु स्थान प्रशन्नशील महाविहारेतुं
लिहाँ विज्याना, छुं वखते-वखते, हानं-हानं पिहाँ
विज्याय्गु याना स्वीगु कल्पान्तर तक योग चर्यास
चवनेगु वाञ्छा याना समाधि योगे चवना विज्यात ।

इति श्री कपिदाऽवदाने ज्ञानाकरादि वानराः कपि जन्म
मुक्त्वा मानवदेहं प्राप्तं तृतीयोऽध्यायः ॥ ३ ॥

अथ ज्ञानाकर गृह निर्माण कथा

थनंलि ज्ञानाकरं छेँ दयकुगु खँ ।

ततः सो वानाराधीशो ज्ञानाकराख्य मानवः ।
परिवार जनैः सार्धं समामन्त्र्यैवमब्रवीत् ॥

थनंलि किंशुक वने वानरपिनि मालीक जुया च्वंछ
ज्ञानाकर मनुष्य देह जुया नं न्हापायाथ्येँ हे मालीकतुं
जुया मेपि परिवारपि सकललिसे मिले जुया च्वंच्वन ।
छन्हु सकल पासापित सःता धाल—

हे पासा, दाजुकिजापि ! थौं जि छगू खँ धायत्यना
छिपिं सकसिनं न्य । व छु खँ धाःसा— आः झीपिं सकलें
न्हापायार्थेँ माकत मखुत, मनुष्य जुल । आः झीपिं
थन यक्को दु, ध्व वने झीपिं थथे जक च्वनां मजिल ।
वा वै, फय् वै, गन वने, गन च्वने ज्वी ।

मनुष्य देह गृहं विना कथं वशेत् ।

मनुष्यया शरीर छेँ मदय्कं गथे च्वने । वास याय्गु
स्थान धैगु पशु-पंक्षि कीट-पतंगार्दि सकलयात हे माला
च्वन । उर्कि आः झीसं उद्योग याना छेँ दय्के माल ।
थ्व वने सिँ, लता-लहरा यक्व दु, व ध्यना हया थःथःपि
च्वनेत वास स्थान छेँ दय्के माल । थथे जक च्वनां
मजिल । आः झी थःथःपि च्वनेत गृह निर्माण याय्नु
धका सकल पासापिन्त थथे धया ज्ञान-बुद्धि विया
व किंशुक वने छेँ दय्केगु विचार याब ।

थनलि न्हापां ज्ञानाकरं उगु वनयागु सिँ, लता-
लहरा, स्यावला ध्यना हया, छेँ दय्केत माःगु सकतां
ज्वरे याना, थः च्वनेत ज्याछिक थमं हे ज्या याना छेँ
दय्का क्यन ।

थ्व वेलस ज्ञानाकरया सेवक जुया च्वंपि किंशुक
वनवासी सकल मनुष्यपिसं थःपिनि मालीक जुया च्वं
ज्ञानाकरं वनयागु सिँ, लता-लहरादि छेँ दय्केत
माःमाःगु ध्यना हया थः च्वनेत छिक छेँ दय्का क्यंगु
खना धाल ।

अहो साधु ज्ञानाकर ! धन्य-धन्य खः धका सकसिनं
प्रशंसा याना व हे रीतं सकसिनं थःथःपि च्वनेत छेँ
दयक्यत छु छु कयाहये माःगु खः व फुकं कया हया,
छेँ दयक्यत माःगु सारदाम सकतां तयार याना, थःथःपि
सकसियां सदां च्वनेत छिक छे दयका वास याना
च्वन ।

थनंलि ज्ञानाकरादि सकल परिवार पासापि उगु
वने च्वना नया, त्वना, वास याना च्वच्वं प्यला-खुला
दसेलि छन्हु हानं ज्ञानाकरया मती थथे बिचार लुल ।

अहो जि थथे जक थ्व वने गुलि तक च्वना च्वनेगु,
आः जि गन वनेगु, गन च्वनेगु, थ्व वनयागु दुःखं
मुक्त जुया वनेगु खँ स्वैके न्यनेगु, आः थुगु समये जि
बुद्धिमानल सत्पुरुष छल पासा दयके माल धका बिचार
याना च्वन ।

उगु वखते परचित्त ज्ञान सिया बिज्याल श्री दीपङ्कर
बुद्ध भगवानं महाज्ञानिद्ध बुद्धोपासक पुरुष थः शिष्य
छल सःता किंशुक वने वास याना च्वल ज्ञानाकरयात
नापलाना निगू-प्यंगू ज्ञान बिया वा धका माक्व खँ
वनो किंशुक वने छोया हया बिज्यात ।

आर्य पुत्र बुद्धोपासकं श्री दीपङ्कर बुद्ध भगवानयागु
वचन शिरे धारणा यांना उच्च बुद्धोपासक वने व्यापार
यांना जूझर्थे च्वंक थुगु वनया समीपस ध्यंक वन ।

तदा ज्ञानाकरेण चान्यत्रेण प्रदेशेनागत
मेकं महापुरुषं दृष्ट्वा तस्मै सादरेण स्वकीय
विहार मानीय फलमूलादि भोजनमर्पणं प्रकृत्य
निवेदयामास ।

उगु समये ज्ञानाकरं थुगु वनया समीपस वःम्ह मेगु
देशयाम्ह महापुरुष छम्ह खना, हतासं ब्वां वना उम्ह
महापुरुषयात आदर तया, थः च्वनागु थासे ब्वना हया
थःकेदुगु फलमूलादि चीजवोज भोजन याका विन्ति
यात ।

भो महापुरुष ! छलपोल सु खः, गन वनेत विज्यानागु,
छलपोल थन वने विज्यानागुया छुं कारण दुला ? थथे
धका ज्ञानाकरं न्यसेलि आर्यपुत्र महापुरुषं धाल ।

आर्यदेशादागतोऽहं व्यापारार्थे देशान्तर
भ्रमणञ्च ।

हे मानव ! जि आर्य देशयोम्ह खः । छुं व्यापारया
निर्ति देश-विदेश, ग्राम, वन, जङ्गल, पर्वत भ्रमण
याना चाःचाःहिला जुया, जि मेपि पासापिनं दु,
छखेलात, जि याकचा जक जुल, थौं जि थन लात, जि
छम्ह आर्य पुत्र खः । उकिं ज्ञानि गुणी सज्जनपिनिगु
सत्संगत याना, ततःधंपि गुरुपिनिगु उपदेश न्यना, छुं
भतीभती सयका-सीका तयागु नं दु दयां छुयाये,
प्वाःया लागी, थः कुटुम्बया लागी थये चाःचाःहिला
ज्वी माल ।

छि सु खः, छिगु नां छु ? थ्व वने च्वना गुकथं
व्यवहार याना च्वना ? थये धका आर्य पुत्रं न्यसेलि
ज्ञानाकरं धाल ।

भो आर्य पुत्र ! जि छम्ह वनवासी दुःखी मनुष्य
खः । जि थन वने आपाल पासापि दु, ज्ञानयागु
अनुभव दुपि छम्ह हे मदु, थथिनपि पासापि नाप संगत
याना थुजोगु वनान्तरे भ्रमण याना जीविका याना च्वना ।
जि थौं महाभाग्यमानि जुल, छलपोलथेंजाम्ह कल्याणमित्र
पासा चूलात । आः छलपोलं जित थ्व वनयागु दुःखं
मुक्त ज्वीगु उपाय कना विज्याहुं । भो मित्र (पासा) !

आः यत्नित्सैं क्षीर्षि निम्ह पासा जुल, जि मित्र थः जुल
धको परस्पर निम्हस्या दुःख सुख खँ लहाना च्वन ।

तदा ज्ञानाकरो मानुष्य चरित्रं-आचारं
पृच्छति । भो मित्र ! मनुष्येण सत्कर्म कथं
चरितव्यं वदस्व ।

उगु बखते ज्ञानाकरं मनुष्ययागु चरित्र-सदाचार
शुद्धि न्यन । भो मित्रजु ! मनुष्य धैषिसं सुख्यगु भिगु
कर्म गथ्य याना ज्वोमा ? छु याःसा भिगु ज्वी ?

ततो महामित्रेण पुरुषेण मानुष्य

शुभ चरित्र कथयामास ।

थनलि ज्ञानाकरया मित्र जुया विज्याह्व आर्य पुत्र
महापुरुषं मनुष्ययागु शुभचरित्र शुगु प्रकारं उपदेश विल ।

मानुष्य पुण्यतः प्रातः सन्सारे त्रिभवेष्वपि ।
चतुरशीति लक्षाणि विद्यते जीवजन्तवः ॥

भो मित्रजु ज्ञानाकर ! एकचित्त याना न्यना
विज्याहुँ । थ्व सन्सारे स्वर्ग, मर्त्य, पाताल आदि यावत्

लोकधातुस जन्म जुया दुःख-सुख भोग याना च्वं पि
 प्राणि पि च्यप्यंगू लाख योनी नाना प्रकारया जीवात्मा पि
 दु, थुलि मध्ये छुं पुण्ययागु अनुभावं गुलि गुलि प्राणि पि
 मनुष्ययागु योनी जन्म जुया मनुष्य धायका च्वन । थ्व
 मनुष्य धायका च्वनागुया सारगु तिसा ज्ञान खः । ज्ञान
 निगू दु, सुज्ञान व कुज्ञान । कुज्ञानं क्वय् लायि सुज्ञानं
 च्वय् लायि । कुज्ञानं सन्साररूपी समुद्रं दवे ज्वी ।
 सुज्ञान सन्साररूपी समुद्रं पारतरे ज्वी । मध्ये कि ख्वाले
 च्वंगु मिखां न्हावे च्वंगु जक खनी, ज्ञान मिखां ला
 सन्सार फुकं हे खनी । किन्तु न्हापा जुया वंगु, लिपा
 ज्वीगु, आः जुया च्वंगु थ्व फुकं खनीगु हे ज्ञान मिखां
 खः । हे मित्रजु ! न्यना बिज्याहुँ । थ्व सन्सारे स्वर्ग,
 मर्त्य, पाताल, त्रैलोक्य भुवने सुख ज्वीगु हे कुज्ञान
 त्वःता, सुज्ञान खंका, पुण्य कर्मयाय् फयके माः ।
 पुण्य बराबर तःधंगु धन मेगु छुं मदु । छायाःसा-
 पुण्य बिना मनुष्य जन्म काय् धेगु दुल्लेभ ज्वी धका
 न्हापा जुया बिज्या पि तथागतपिसं आज्ञा दयका
 वंगु दु ।

सन्सारे दुःखं व्याप्त जुया च्वंगु सुगू प्रकारया गति
 दु । छु छु गति धाःसा- देवगति १, दैत्यगति २,

मनुष्यगति ३, तीर्त्यकगति, पशु पंक्षि कीटाणु आदि ४ प्रेतगति ५, नरकगति ६ । ध्व हे सुगूयात पद्गति धायि । ध्व पद्गतिस भ्रमण याय् म्वालीगु उपाय मत ज्ञानं खंका पुण्योपार्जन (धर्मकमाय् याये माः । धर्म निगू प्रकारया दु, गथ्ये धाःसा- लोकोत्तर धर्म व लोकायन धर्म । ध्व निगुलि दुने मने हाकुका अहंकार व ममतां पिने जक यचुका लोकायन धमे कयना ज्वीगुलि पद्गति मार्ग तरे ज्वी मखु । गथ्ये धाःसा- होमंगु थले (घले) लः तय्थ्ये ज्वया वनि ।

लोकोत्तर धर्म धैगु गथ्ये धाःसा- दुने मनेनं पिनेनं यचुका अहंकार व ममता मयासे जगतोहिताय सुखाय, लोकानुकम्पाय) जगत् प्राणीपिन्त हित ज्वीगु व सुख ज्वीगु तथा लोकपिन्त अनुकम्पा कृपा व करुणा तथा न्हापां शिक्षा ज्ञान) दान बीगु, बीकेगु अनुकम्पा धैगु हे करुणा व कृपायात धायिगु खः । करुणा व कृपा धैगु हे प्राणीया उपरे अहिंसा धर्म च्वना शान्तिवादी ज्वीगु । होमंगु थले (घले) लःतय्थ्ये ज्वया वनि मखुगु । पद्गति मार्ग तरे ज्वीगु, पद्गतिस मला- यिगु थुगु धर्मयात लोकोत्तर धर्म धायि । थजोगु सीका धमे याय्त बिना शिक्षा मदय्कं याय् फैमखु । उकि न्हापां

शिक्षा प्राप्त याना, लोकोत्तर धर्म ह्मसीका धर्म याय्फत
धाःसातिनि उत्तम धर्मे लाना, पट्गतिं छुतय् जुया संसारं
मुक्त ज्वी । श्व हे मुख्यगु ज्ञान श्वीका याय्गु मानव
कर्तव्य खः ।

भो मित्रजु ! हानं न्य- पट्गति मध्ये देवजातीया
स्वभावं संसारे जन्म कावया च्वंपिनि स्वाभाविक थथे ज्वी-
शुद्धाचार शुद्ध शरीर सुन्दर शुलक्षणं युक्त ज्वी, धर्म
शरीर नम्रता ज्ञानिगुणिक तथा शिक्षित व सत्यधारी ज्वी,
विशेषं सत्वगुण स्वां, फल, स्कन्द-मूलाहार पञ्चामृत दुरु,
घ्यो, कस्ति, चिनि, धौ जक भोजन याय्गु प्रेम ज्वी ।

दैत्य व राक्षसया स्वभावं जन्म कावया च्वंपिनि
स्वाभाविक गथ्ये ज्वी धाःसा- असत्य व अधर्मी जुया
मोह व तृष्णा, अहंकारी तथा लोभ चित्तं अति कामी
ज्वी, आपालं भयङ्करगु तमोगुण ला, हि, मदिरा आदि
अमल जक भोजन याय्गु प्रेम ज्वी ।

मनुष्य जातीया स्वभावं जन्म कावया च्वंपिनि
स्वाभाविक गथ्ये ज्वी धाःसा- सर्वदा दान पुण्य याय्गुलि
चित्त जुया च्वनि । देव, गुरु, माता, पिता, प्राचीन

धर्म शास्त्रस अति भक्ति ज्वी, सुन्दर शरीर लक्षणं संयुक्त ज्वी, सत्य कर्मस शूरीर ज्वी, मधुरता नम्ररूपं खँ ल्हाना लोक प्रिय ज्वी, शील स्वभाव बांलायि, क्षान्ति धर्मे च्वना आनन्दरूपं परोपकारी जुया शिक्षित ज्वी, मदिरा, मांस अश्रिय ज्वी ।

तीर्थ्यक जातीया स्वभावं जन्म कावया च्वंपिनि स्वाभाविक गथ्ये ज्वी धाःसा— शिक्षित ज्वीमखु, शिक्षित पिनिगु खँ नं न्यनी मखु, छुं अहंकारी अशिक्षित ज्वी, दुर्गन्ध श्वास, दुर्गन्ध वस्तु नय्गुलि प्रेम ज्वी, देव तथा गुरु, धर्म शास्त्रस एकचित्तं भाक्तियाय्त थाकुया च्वनि ।

प्रेतगति भूत, प्रंत, पिसाचया स्वभावं जन्म कावया च्वंपिनि स्वाभाविक गथ्ये ज्वी धाःसा— सदानं क्रोध मुख खिउँ रुवा ज्वी, परया नं थःनं दुःख ज्वीगु जक ष्या याना ज्वी, भिंगु शुभ कर्म व धर्म कार्यस विमुख ज्वी, बहु आहार जुया न्हागुं नय्गुलि प्रेम ज्वी, नवगु पुलांगु ध्वगीसा नं नय्गुलि घृणी ज्वीमखु । नय् जक दःसा न्हागु नं इच्छा यायि ।

नरक गतिया स्वभावं जन्म कावया च्वंपिनि स्वाभाविक गथ्ये ज्वी धासा— अलक्षण (विरूप) ज्वी,

आपालं आहार तचो ज्वी, सदानं असंतोषी ज्वी, भिगु शुभकर्मस तथा धर्म कार्यस नयेगु, त्वनेगु इत्यादि मंगल कार्यस कर्चिंगः ल्वापु याना, भिगु ज्या स्यंका बो, कुसंगत व कुज्ञाने जक भुले ज्वी, भिगु खँ न्यने मन दैमखु, मभिगु खँ न्यनेगुलि, मभिगु खँ ल्हाय्गुलि चतुर ज्वी, अमल नय्गुलि अति इच्छा याना, ज्ञान बुद्धि भ्रान्ति ज्वीका सुयानं स्वये मयेका ज्वी ।

आदौ विवर्जयेत्पापं दुष्ट मित्रानुरागतः ।

सन्मित्रेभ्योऽनुरागेन संचरस्व शुभेवृषे ॥

हे मित्र ! मनुष्य जन्म जुया न्हापां याय्मागु कर्म थ्व खः कि पाप कर्म तोता, असत्य कर्म याय्गुलि, असत्य खँ ल्हाय्गुलि जक चतुर जुया च्वंर्पि दुष्टजनपिनिगु संगत (अनुराग) याय्गु तोता, सत्कर्म यायिर्पि, भिगु जक खँ ल्हायिर्पि, सःस्युर्पि जक सत्मित्रर्पि संगत याना सत्य कर्मस निपुण जुया, भिगु मार्गस पलातया, पुण्य याना ज्वी फय्केमाः । हानं शुद्धाचार जुया मैत्री, करुणा, मुदिता, उपेक्षा धैगु चतुर्ब्रह्म विहार प्रकाश याना सद्वर्म ज्ञान तथा सद्वर्म चर्येस च्वना, परयात कल्याण

ज्वीगु जक ज्या याना अथवा याका सत्कर्मस उद्योग
 याना ज्वीमाः, थुगु ज्ञानयात तथागत ज्ञान धायि । थुजोगु
 ज्ञान ह्मसीका षट्गति चक्रे लायिगु लोकायन धर्म मयासे
 उत्तमगु लोकोत्तर धर्म याना ज्वीगु मनुष्यया छगु
 शिक्षितरूपं तःधंगु कर्तव्य खः धका भगवान् बुद्धपिसं
 आज्ञा दयका वंगु शास्त्रे कनातःगु दु । ध्व खँ बांलाक
 ध्वीका नित्य अनित्य विचार याना सद्वर्मे पला तथा
 ज्वीगु स्व ।

थुगु प्रकारं तथागत ज्ञान अमृतोपदेश व्यूगु
 न्यना, ज्ञानाकर प्रभृति अन वनवासी मनुष्य सकलया
 मन बोध जुया विन्ति यात ।

धन्य धन्य, छलपोल ! छलपोलं थुगु अमृतोपदेश
 व्यूगु खँ सत्यमेव सद्वर्म तःधंगु ज्ञान खः धका जिमिसं
 सीके धुन, जिपिं सकसिगु मन सन्तोष जुल ।

हे आर्य पुत्र ! जिपिं न्हापा ध्व वने माक जुया
 च्वनावले थुगु वने अनावृष्टि जूगुलिं जिमि छुं हे
 नयगु, त्वनेगु आहार चूमलाना दुःख भोग याना
 उरुयें थुरुयें भ्रमण याना च्वना । उगु अवस्थाय गृह्य
 करुणां युक्त जुया विज्याह्व श्री दीपङ्कर बुद्ध भगवान्

थन विज्याना जिमित रक्षा उद्धार याय्त वसपोलया
शरीरं रश्मि प्रकाश याना जिमित खय्का विज्यात ।
अले जिमिसं हतासं वना वने सया च्वंगु फँसि, फलमूलादि
खाना हया वसपोलयात दान याना । थ्वबेलस श्री
दीपङ्कर बुद्ध भगवान् खुसि जुयो जिमित आज्ञा जुल,
थौं छिमिसं जित फलमूलादि दान यात, थुगु पुण्यं
छिपिं सकलें याकनं मनुष्यदेह प्राप्त ज्वीमा धका आशीर्वाद
विल । जिमिसं वसपोलया चरणकमले भोपुया तथाऽस्तु
धका प्रदक्षिणा याना । अले श्री दीपङ्कर बुद्ध भगवान्
व वसपोलया ल्यूल्यू विज्यापिं न्हय्छ शिष्यपिं सहितं
थुगु स्थानं लिहाँ विज्यात ।

थनंलि जिपिं सकलें श्री दीपङ्कर बुद्ध भगवानयात
फल स्कन्दमूलादि दान यानागु पुण्यया प्रभावं वसपोलया
आशीर्वादं मनुष्यदेह प्राप्त जुल । अले जिपिं सकलें थ्वहे
वन खण्डे छेँ दय्का वास याना च्वना । उकिं जिमिसं
मनुष्यया कर्तव्य याय्गु ज्याखँ इत्यादि छुं मस्युगुलिं
छलपोलयाके न्यना, दया कृपा तया जिमित भिंनु खँ
कना विज्यात । थ्वहे दान पुण्यया प्रभावं थुगु हे
जन्मस मनुष्य जुया थुजोगु ज्ञान रूपी अमृत सद्वर्म

उपदेश न्यने दत् । आः हानं जिमित दयातया छलपोलया
मुखद्वारं भिगु मोक्ष वनेगु मार्ग, उत्तमगु ज्ञान कना
विज्याये माल धका पुनः विन्ति याना च्वन ।

थुगु प्रकारं ज्ञानाकरं विन्ति याःगु खँ न्यना आर्य
पुत्र खुसि जुया मेमेगुनं दानपारमितादि पट्पारमितायागु
खँ कन ।

हे मित्रजु ! संसारे दान धर्मयानागु पुण्य सर्वदा
कल्याण ज्वी । मध्ये धाःया— सिमास सँगु फलथ्ये
सिमा दतले वरावर फल सया हे च्वनि, बथ्ये हे धका
सीकि । फल दान याःगु प्रभावं तत्कारणं मनुष्य जुल,
आः हानं पिण्डपात्र अथवा धन द्रव्यनं दान थायूगु सो-
दान यानागु पुण्यया प्रभावं दान पारमितां पूर्ण जुया
महासुख प्राप्त ज्वी धका बारम्बार श्री दीपङ्कर तथागतं
आज्ञा जुया विज्यागु दु । वसपोलया शिष्य मध्ये छद्म
जि नं खः न्यना विज्याहुँ ।

दानेन पापं प्रशमन्ति नित्यं

शीलेन स्वर्गमुपयान्ति शीघ्रं ।

क्षमाघ्नराणां तपशी भवन्ति

धनार्जनं वीर्यबलं लभन्ति ॥

निर्वाण ध्यानेन पदं प्रयान्ति

प्रज्ञा बलेन विजयन्ति चाशु ।

एतेन पुण्येन फलेन सर्वं

पारं प्रयान्ति मनसा प्रसिद्धम् ॥

दान यानागुलि, पाप फुनावनि । पञ्चशील अथवा
अष्टशील धारणा यानागुलि, याकनं स्वर्गस वास वाय्दै ।
क्षमा धर्मस च्वनागुलि, तप यानागु तुल्य पुण्य प्राप्त ज्वी ।
धन दुर्थे परयात कल्याण ज्वीगु, रक्षा ज्वीगु ज्या याना
वीकत धाःसा, ततःधंगु वीर्य पराक्रम संयुक्त ज्वी । एक-
चित्तं ध्यान यानागुलि, निर्वाणपदे लायि । प्रज्ञायागु बलं
याकनं चतुर्मार जितेयाय फुल्ल ज्वी । शुजोगु सीका दान,
शील, क्षान्ति, वीर्य, ध्यान, प्रज्ञा श्व खुगू पदपारमितां
पूर्ण ज्वीगु ज्ञान सीका अथवा ज्ञानं खंका नित्य चर्या
यायफत धाःसा सन्साररूपी समुद्रं पार जुया अर्हत् पद
प्राप्त ज्वी अथवा तथागत हे नं ज्वीफु ।

भो मित्रजु ! पूर्व रूपस दान याना थें हानं बराबर
दान यायगु स्व । यथाक्रमं षट्पारमितां पूर्ण जुया लिपा
सम्यक्सम्बुद्ध पदवि लाना जगत्हित यायफै । याकनं
थुगु चर्या याना जगत्हित यायफुल्ल ज्वीमा धका थुलि धया
हर्ष याना बेला कया आर्य पुत्र लिहाँ विज्यात ।

थुलि आर्य पुत्र मित्रजुं सदुपदेश (भिगु) खँ न्यंकुगु
फुक पासापि मुंका, एकाचित्तं स्मरण याना फुकसियां
छगु मन याना कक्क दान धर्म याना ताकालनं सुख
भोग याना, छन्हुया दिने ज्ञानाकर मृत्यु जुया वन ।

थनंलि दानयागु पुण्ययानुभावं थुगु देह त्वःतालि
कामार्थी नगरे सार्थवाहया कुले जन्मकावन धका जेतवन
महाविहारे विज्याल्ल श्री शाक्यमुनि भगवानं शालिपुत्र,
महामौद्गल्यायण, आनन्द, काश्यप तथा सुचेतन, सुनन्द
भिक्षु प्रभृति सकल सभालोकपिन्त थुगु खँ आज्ञा दयका
विज्यात । थुगु खँ न्यना सकलया चित्त बोध जुया
धन्य-धन्य श्री दीपङ्कर तथागत, धन्य-धन्य आर्य पुत्र,
धन्य-धन्य ज्ञानाकर धका प्रशंसा याना च्वन ।

इतिश्री कपिदाऽवदाने ज्ञानाकर, सार्थवाह कुले जन्म
वर्णनोनाम चतुर्थोऽध्यायः ॥ ४ ॥

अथ धर्मश्री बालक कथा

थनंलि धर्मश्री बालकयागु खँ ।

पुनर्वार श्री भगवानयाके शालिपुत्र महास्थविर भिक्षुं
चिन्ति यात ।

भो भगवन् ! छलपोलं बने वास याना ख्वद्व ज्ञानाकर
कामार्थी नगरे सार्थवाहया कुले जन्म काःवन धका आज्ञा
दयका विज्यात । थुद्व ज्ञानाकर सार्थवाहया कुले जन्म
जुसँलि उगु अवस्थाय् वं लु लु यात । व खँ छलपोलं
थन जि प्रभृति सकल सभालोकपिनिगु चित्त बोध ज्वीक
आज्ञा दयका विज्याहुँ ।

थथे शालिपुत्र भिक्षुं चिन्ति याःगु न्यना श्री भगवानं
शालिपुत्र प्रभृति सकल भिक्षुपि तथा मेमेपि सकल सभा-
लोकया ख्वाः स्वया आज्ञा दयका विज्यात ।

हे भिक्षुपुंगव, शालिपुत्र ! हे सभालोकर्षि ! ज्ञानाकर
कामार्थी नगरे सार्थवाह्या कुले जन्म जुसेलि उगु अवस्थाय्
वं याःगु वैगु संक्षिप्त जन्म-चरित्र कन्ये, छिपि सकसिनं
एकचित्त याना न्य ।

तद्यथा— युगु खं गध्ये धाःसा.—

ततः कामार्थी नगर्या भुवनानन्दो नामः
सार्थवाहो, धनकनकसमृद्ध कोष्ठकोष्ठांगार
सम्पन्नोऽभूत् । तस्य भार्या लोकवासिनीति ।
सा लोकवासिनी सयनोपविष्टे सत्य स्वप्नं
पश्यतिस्म ।

थनंलि कामार्थीधका नां जुया च्वंगु छगू नगरे आपालं
धनद्रव्य, सुवर्ण, रत्नादि वृहिं कोष्ठकोष्ठांगारे परिपूणे जुया
महाधनाद्य जुया च्वंद्द, सकल लोकपिन्त करुणा कृपा
दुम्ह, लोके सकभनं नां प्रख्यात जुया च्वम्ह, महाज्ञानी,
शीलवन्त, धर्मात्मा, सदां दान धर्म याय्गुलि तत्पर जुया
च्वंम्ह, भुवनानन्द धैम्ह सार्थवाह महाजन छम्ह दु ।
वया स्त्री सत्यवती, अत्यन्त सुन्दरीम्ह, देव, गुरु, मातृ,

पितृ भक्तिम्ह, स्वामि भक्तिम्ह, शास्त्र भक्ति जुया सदा
कालसं दान धर्म यायगुलि जक रस जुया च्वंम्ह, लोकवा-
सिनी धका नां जुया च्वंम्ह, धुमि निम्ह स्त्रीपुरुष आनन्द
पूर्वक महासुख सम्भोग याना काल दिन हना च्वन ।

थनंलि छन्हुया रात्री व लोकवासिनी महाजननीया
घना च्वंगु समये भिगु स्वप्ने खन ।

ततो सा लोकवासिनी स्वप्नादुत्थाय
भुवनानन्द सार्थवाह स्वःपत्ये यथा स्वप्ने दृष्ट
तथा वृत्तान्त निवेदया मास ।

थन व लोकवासिनी महाजननीया न्ह्यलं चासंलि
दना थ; स्वामि भुवनानन्द सार्थवाह महाजनयात थमं
गध्ये स्वप्ने खन, अथे फुक कना धाल ।

भो स्वामी ! यौया रात्री जि स्वप्ने खंगु छगू छित
बिन्ति याय्, छि न्यना दिस, भि मभि जि छुं मस्यू ।
जि स्वप्ने खंगु गध्ये धाःसा—

भुवन सकल शोभाः श्रीयुताः शुद्धरूपाः ।
दिविभुवि सुरवन्द्याः अद्भुता दान दाताः ॥

मम उदरि प्रविष्ट सत्य धर्म प्रयुक्ताः ।
प्रभवति ममचित्ते तत्प्रभावात्प्रसन्नाः ॥

सकल भुवनस शोभायमान ज्वीक तेज प्रकाश जूम्ह,
श्री ऐश्वर्यं संयुक्तज्ञ, अत्यन्त सुन्दर शुद्ध रूपम्ह, पृथ्वी
आकाशया सकल देव मनुष्यपिसं वन्दना याय् योग्यम्ह,
अद्भुतं दान याय्गुलि दाताम्ह, थर्धिनम्ह महापुरुष बालक
छम्ह जिगु गर्भे प्रवेश जुल । भो प्रभु ! थुलि जि स्वप्ने
खनेव थुक्कियागु प्रभावं जिगु शरीरयात महासुखानन्द प्राप्त
जुल । न्हापा-न्हापायागु खँ दक्कं लुमना वल, हानं अनेक
प्रकारया ज्ञान गुण, सत्य धर्मया कथा नं लुमना वल ।
भो प्रभु ! आः जि थर्निनिसे परमेश्वर त्रिरत्न सुमरणा
याना आनन्दं एकान्तस च्वनेगु इच्छा जुल धका गथे थमं
स्वप्ने खन वथ्यंतुं सकतां थः स्वामियात कन ।

इति भाय्योदितं श्रुत्वा भुवनानन्द धीमता ।
मनसोत्साहसंजातो महानन्दो व्यवस्थितः ॥

थय्ये थः स्त्री लोकवासिनीं विन्ति याःगु खँ न्यना
बराबुद्धिमानज्ञ भुवनानन्द सार्थवाहया मती अत्यन्त
उत्साह बढे जुया थः स्त्री लोकवासिनीयात धाल ।

हे प्रिये स्त्री, हे लोकवासिनी ! छ धन्य खः, छ आम स्वप्ने खंगु मभिगु मखु, भिगु शुभ स्वप्न धका छ सीकि । आः झीगु मनोरथ पूर्ण ज्वीन, छाप् धाःसा— छंत अति शुभदायकगु स्वप्न क्यन, ध्व स्वप्न तच्चोकं हे भिगु खः । छंगु मती छुं विषाद यायमते, छं आः छुं धन्दा कायमते, झीगु कुले रत्न समानं सुन्दरद्व सुपुत्र जन्म ज्वीगु जुल । थनिनिसें छंगु शरीरे गर्भधारणा जुल । छंगु मती छु इच्छा जुल, उगु पुण्य कर्म दान धर्म याना च्वँ । छं कंगु खँ न्यना जिगु मन अत्यन्त हर्ष जुल, आःतिनि जिगु मनोरथ पूर्ण ज्वीगु जुल । छाप् धाःसा— झी धन सम्पत्ति यको दु, सन्तान मदु, उकिं न्हिथ दुःख मन जुया शोक सन्ताप जुया च्वंगु ताःकालं दत । थौं जित छं शुभ-मङ्गलगु खँ न्यंकल, आःतिनि छंके पुत्ररत्न गर्भवास यात धका हर्षमान याना निद्व स्त्री पुरुषया भि-भिगु खँ ल्हाना, नसनेवं नित्यया थें, थःगु कुलधर्म-कुलाचार मतोटुसे माःमागु कर्म याना निद्व स्त्री-पुरुषयां हर्षमन याना, नित्य अनेक प्रकारया धर्मस चित्त तया आनन्द सुख पूर्वक दान धर्म याना च्वन ।

थनंलि क्रमशः नवम मास पूर्ण जुया दशम मास

क्यसेलि लोकवासिनी महाजननीया गर्भ आनन्द सुख
पूर्वक भिगु सुवेलास सुपुत्र बालक जन्म जुल ।

गर्थिनद्व सुपुत्र बालक धाःसा— गथ्ये स्वप्ने खन
वथ्ये सुन्दरद्व सकल लक्षणं संयुक्त जूद्व, अति कोमल
शरीर त्यागी स्वभाव दुद्व, थर्थिनद्व सुपुत्र बालक जन्म
जूगुलि भुवनानन्द सार्थवाहया मनस अति हर्षमान जुया
बालकया ख्वाः स्वया, अहो ! धन्य-धन्य जिगु भाग्य
धका मनस हर्षोत्साह वृद्धि याना, याचक, बाल, वृद्ध,
संन्यासी, योगी, भिक्षु, ब्राह्मण, वज्राचार्यादिपिन्त दान
प्रदान याना दीप (मत) च्याका उत्सव यात ।

थतंलि खुन्ह दुखुन्ह जातकर्मयात माक्व सामाग्री
तयार याना गुरु, पुरोहित, ज्योतीष सहित सकल
ज्ञाति वन्धुवर्गपिन्त निमन्त्रण याना विधिवत जात कर्मया
पूजा आरम्भ याना शुभवेलास नामाकर्ण यायत भुवनानन्द
सार्थवाहं गुरु-पुरोहित, ज्योतिष सहित सकलें दुषाय् जि
पुत्र ध्व बालकयात लु नां तय्गु योग्य जी धका न्यन ।

ततः गुरु प्रभिति सर्वेजनाश्च धर्मश्री
बालकेत्युच्यते ।

थनलि गुरु-पुरोहित, ज्योतिष सहित अन दुपि
ज्ञाति-बन्धुवर्गपि सकसिनं श्व धर्म यांना दुह्न बालकया
नां धर्मश्री बालक धका नां छुयगु योग्य, उकिं श्व
बालकया नां धर्मश्री बालक धका शुभवेलास नामाकर्ण
यांना विधिविधानथ्य पूजा धुका गुरु-पुरोहित, ज्योतिष
पित दान दक्षणादि विया, भोजन याका, सकल ज्ञाति
बन्धुवर्गोपिन्त नं सन्तोष जुयिक भोजन याका बेला
विया छोट ।

क्रमथ्ये हानं खुठा दस्यलि जंको क्रिया अन्न प्रासन)
यांना, श्री कुलदेवता दर्शन याका, गुरु-पुरोहितादि
सकल ज्ञाति बन्धुवर्गपित भोजन याका सन्तोष यांना
छोट । थुगु प्रकारं सकलयात सन्तोष यांना नित्य गुरु,
जाचक, मिश्र, संन्यासी युमित दान प्रदान यांना दिन
हना च्वन ।

एवं प्रकारं दिन वितये यार्या व धर्मश्री बालक शुक्ल
पक्षया चन्द्रमा बढये जूथे न्हिन्हिछिया बढये जुया वया
व बालकयात अनेक विचार संचार यांना लहिना तल ।

कथःथ्य पिदफुना न्याद दस्यलि सद्गुरुद्वारा विद्या
अध्ययन याकुस्यलि अति शिक्षित जुया ववं च्याद पुना

गुदं क्यंवेले छन्दु थःगु छे यां पिने छगू थासे पांशु (धू),
मुना द्रं चिना धू द्रं या च्वे थः च्वना क्षिता च्वन ।

अथ तत्समये श्री दीपङ्कर आदिवुद्ध
चोवरवस्त्र परिधाय पिण्डपात्रमादाय श्रावण
शुक्लाष्टम्यां प्रशन्नशील महाविहारान्निष्क्रम्य
कामार्थी महानगर्यां भिक्षुसंघे सार्द्धं गतवान् ।

थनंलि उगु समये श्री दीपङ्कर तथागत आदिवुद्ध
भगवान् चीवर वस्त्रं पुना पिण्डपात्र ज्वना थः शिष्यपि
भिक्षुसंघपि सहित याना श्रावण शुक्लया अष्टमी दिनखुन्दु
प्रसन्नशील महाविहारं पिहाँ विज्याना, कामार्थी धका
ना जुया च्वंगु महानगरे द्वाहाँ विज्यात ।

श्री दीपङ्कर आदिवुद्ध भगवान् गुगु प्रकारं विज्यात
धाःसा— द्वात्रिंश लक्षण धैगु स्वीनिता लक्षण, अशीति
व्यञ्जन धैगु चयेता प्रकारया अङ्ग लक्षणं संयुक्त याना,
गभस्ति धैगु शरीरयागु रश्मि (तेज) प्रकाश याना, उगु
नगरे सकभनं शीतलगु सुगन्ध वासनो दुगु वायु बहे याना
गथ्ये पूर्णिमा खुन्दु रात्री निर्मलगु आकाशे चन्द्रमा उदय
जुया सकल लोकयात आनन्द ज्वी, वध्यं सकल लोकयात

आनन्ददायकगु रश्मि प्रकाश याना मुसुहुँ न्हिला हस्ति
गमनं पलाछिना चंक्रमण याना विज्यात ।

ध्व बेलस कामार्थी नगरवासी लोकरूपसं श्री दीपङ्कर
आदिवुद्ध भगवान् विज्यागु खना हता हतासं धूप, दीप,
सिन्दूर, लाजाश्वत ज्वना वना, धूप थना, दीप च्याका,
सिन्दूर लाजाश्वत होला, श्री दीपङ्कर तथागत आदिवुद्ध
भगवानयात दण्डवत् प्रणाम याना, गुलिं लोकरूपिं लाहात
हाजलपा विन्ति याना स्वया च्वन । गुलिसिनं मार्गस
पञ्चसुगन्ध हाहा याना वया च्वन । गुलिसिनं वसालाया
वया च्वन । गुलिं गुलिं लोकरूपिं श्री दीपङ्कर तथागत
आदिवुद्ध भगवानया ल्यूल्यू न्बोन्बो च्वना अनेक वाद्य
थाना जय शब्द उच्चारण याना म्ये हाला, महोत्सव जात्रा
याना देश दुने यथाक्रमं द्वाहाँ विज्याकल ।

थनंलि उगु देशवासी दान धर्मे श्रद्धाभाव दुर्पि
सज्जन महानुभावपिसं श्री दीपङ्कर आदिवुद्ध भगवान देश
दुने चंक्रमण याना विज्यागु खना, थःथःगु छ्ये इया;
पत्ति धूप-दीप च्याका, इयाले च्वना अनेक प्रकारया
स्वां, जीस्वां, चमेलिस्वां, पलेस्वां, उफोस्वां, द्वाफोस्वां
इत्यादि सिन्दूर, ताये, आखे होला हल । गुलिसिनं

पञ्चामृत पञ्चोपहार पूजा जोल तालाका पूजा याः बल ।
गुलिसिनं थःथःगु छे या लुखापिने च्वना थःथःगु छ्ये दुगु
पिण्डपात्रादि वा, छो, कयगु, निसला केशु, फल
स्कन्दमूलार्दि समर्पण याना, श्रीदीपङ्कर आदिवुद्ध भगवान्
विज्यागु स्वया च्वन ।

थुगु प्रकारं महोत्सव जात्रा याका कामार्थी नगरे
भ्रमण याना ववं क्रमशः धर्मश्री बालकया धू मुना दूँ
चिना धू दूँ या द्योने थः च्वना क्षिता च्वंगु थासे ध्यन ।

उगु समये श्री दीपङ्कर आदिवुद्ध भगवानं धर्मश्री
बालक धू दूँ या द्योने च्वना छ्ये धुलं किका क्षिता च्वंगु
खना वैगु न्होने विज्याना आज्ञा दयका विज्यात ।

देहि त्वं शिशु किञ्चित् त्वमग्रेऽत्राहमागम ।
त्वयाचित्त विशुद्धेन दत्वाशा मे प्रपूरय ॥

हे बालक ! छ क्षिता च्वनाला ! थौंया दिने छंगु
ल्हार्ति छुँ दान काये धका भिक्षुसंघपि मुंका जि थन
वया, जि वयागु सिस्ति याय् मते, यत्किञ्चित् न्हागु हे
जुमां चित्त शुद्ध याना दान व्यु, छं जित छु दान व्युगु
खः व जि आदर पूर्वक कया जिपि सन्तोष जुया वने,
विलम्ब याय् मते, याकनं जिगु मनोरथ पूर्ण याना छो ।

इति भगवतादिष्टं श्रुत्वा सः बालक सुधीः ।
दीपङ्करं ससंवञ्च सम्पश्यंचैवमब्रवीत् ॥

थथ्ये श्री दीपङ्कर आदिवुद्ध भगवानं आज्ञा दयका विज्यागु खँ न्यना, धुल्ल बुद्धिमानल्ल धर्मश्री बालकं आदर पूर्वक प्रणाम याना, भिक्षुपंचर्षि मुंका विज्याम्ह श्रीदीपङ्कर आदिवुद्ध भगवानयागु ख्वाः स्वया लाहात हाजोजलपा विन्ति यात ।

भो भगवान् ! जि मचा खः आः जि थन म्हिता च्वना, छलपोलयात दान याय्त योग्यगु वस्तु जिके छुं महु, आः जि बालकं छलपोलयात छु दान याये, छलपोलयात श्रद्धा तथा जि दान याय्मागु अवश्य खः खयां छुयाय्, जिके दान याय्गु वस्तु छुं महु, हे प्रभो ! छलपोलयात जिगु काय, वाक, चित्तं सास्ताङ्ग कोटि प्रणाम याना, छलपोलं जित क्षमा याना विज्याहुं धका विन्ति याना च्वन ।

इत्युक्तं वचनं श्रुत्वा भगवान् पुनरुक्तवान् ।
किञ्चित्त्वं देहि मे बाल ममाशा परिपूरय ॥

थथ्ये धर्मश्री बालकं विन्तियागु खँ न्यना, हानं श्री दीपङ्कर आदिवुद्ध भगवानं आज्ञा दयका विज्यात ।

हे बालक ! छं चित्त शुद्ध याना न्हागु हे जूसां
 'किञ्चित् मात्र' दान व्यु, जित जक मसु जिगु ल्यूल्यु
 वःपि भिक्षुपिन्तनं दान विया जिगु आशा पूर्ण या ।

श्रुत्वेति वचनं तस्य धर्मश्री पुनरुक्तवान् ।
 मय्यस्ति पांशु मात्रं च वस्तुरन्यो न विद्यते ॥

अथ्ये श्री दीपङ्कर आदिवुद्ध भगवानं आज्ञा दयका
 विज्यागु वचन न्यना, धर्मश्री बालकं हानं विन्ति यात ।

भो भगवान् ! थन जि धुले म्हिता च्वनाम्हसिके
 छलपोलयात दान यायत् योग्यगु मेगु वस्तु छुं मदु ।
 आः थन जिके केवल थ्वहे धू जक दु ।

तमेव दान मिच्छामि क्षमस्व परमेश्वर ।

प्रेमयित्वा मयादत्तं प्रतिगृह्ण महाविभो ॥

हे महाविभो ! आः जि छलपोपयात थ्वहे धू
 जूसां दान याय्गु इच्छा याना, छलपोलं क्षमा याना,
 थ्व जि दान यानागु धू प्रेम याना कया विज्याहुँ ।

इत्युक्त्वा च सः धर्मश्रीः प्रहर्ष मनसा ततः ।

गृहित्वा साञ्जलि तस्मै प्रदत्तं पांशु श्रद्धया ॥

धुलि चिन्ति यानालि धर्मश्री बालकं थः मिहता च्वनागु
धू द्वय च्वगु धू निपा लाहार्ति पासलं कया अत्यन्त हर्षगु
मन याना श्रद्धा युक्तगु शुद्ध चित्तं श्री दीपङ्कर आदिवुद्ध
भगवानं ज्वना विज्यागु पिण्डपात्रस धू स्वपास तथा बिल।
अनं लिपा वसपोलया भिक्षुसंघपिन्तनं हार्ति छम्हु छम्हु
पिण्डपात्रस धू तथा बिह धुस्यंलि श्री दीपङ्कर आदिवुद्ध
प्रभृति सकल भिक्षुसंघपिनिगु स्वाः स्वया चिन्ति यात ।



श्री दीपङ्कर आदिवुद्ध भगवान प्रमुख वसपोलया भिक्षुसंघपिन्त
धर्मश्री बालकं पांशु (धू) दान यागु चित्र ।

हे प्रभो ! थौंया दिने जि बालकं छलपोलपिन्त
किञ्चित् धू मात्र दान याना, छलपोलपिसं थ्व धू मात्र
दान यानागुलि कृपा तयो प्रसन्न जुया विज्याय माल
धका विन्ति यात ।

क्षणमात्रमिदं पांशुः स्वर्णं प्रादुर्बभूव च ।
पुनरन्येभ्यः संघेभ्यो प्रदद्यात्पांशुमुष्टि च ॥
तच्च पांशु तदा तत्र विविधान्नमभूत् क्षणे ।
नमो बुद्धाय धर्माय संघाय चात्रवीत्तदा ॥

थुगु बखतम धर्मश्री बालक श्री दीपङ्कर आदिवुद्ध
भगवानयागु पिण्डपात्रस तया व्यूगु धू दक्कं सुवर्ण चूर्ण
जुल । पुनर्बार भेपिं भिक्षुसंघपिन्त स्मृति छम्हु छम्हु तया
व्यूगु धू नं नाना प्रकारया वृद्धि, वा, जाकि छो, माय्,
म्वा, कय्गु इत्यादि फल, अंब, हल, केरा, स्कन्दमूलादि
जुया बल । थ्व स्वया अन च्वंपिं लोकपिं सकलें अद्भुत
आश्चर्य चाया स्वया च्वन । थ्वबेलस धर्मश्री बालक श्री
दीपङ्करादि आर्य संघपिनिगु ख्वाः स्वया, बुद्धाय नमः,
धर्माय नमः, संघाय नमः धका नमस्कार याना श्री
दीपङ्कर आदिवुद्ध भगवानयागु चरणकमले शिर भोपुया
विन्ति याना च्वन ।

श्री दीपङ्कर तथागत आदिवुद्ध भगवान् अत्यन्त
हर्षमान जुया धर्मश्री बालकयात् थना शिरे जवगु ल्हाः
तया आशीर्वाद विया विज्यात् ।

साधु साधु महाभाग भद्रं भवतु ते सदा ।
सर्वानन्दाऽरि विजित दीपावत्यां नराधिपः ॥
नृपकुलेऽव पैथिव्यां भविष्यतु सदा सुखमिति ।

साधु-साधु, धन्य-धन्य, हे धर्मश्री बालक ! छं
सदा सर्वदा कालसं कल्याण ज्वीमा, छ जित थ्व धू दान
याःगु क्षग मात्रं सुवर्ण चूर्ण जुल । थ्व जूगु फुककं
अट्टा तथा भक्तिया प्रभावं जूगु खः । आः छं थ्व धू
दान याःगु खःसां सुवर्ण चूर्ण दान याःगु तुल्य जुल ।
केवल हानं मेनेपि संबपिन्त धू दान याःगु नं अन्न,
वृहि इत्पादि दान याःगु तुल्य जुल ।

थुगु दानयागु पुण्यं याकनं थुगु जन्मप कल्याण
जुया थुगु जन्मं लिषा छ दीपावती नगरे नृपकुले सर्वानन्द
राजा धायेका जन्म ज्वीमा, उगु बखते दुष्टगण शत्रुपिन्त
धर्म जिते याना सुनानं सम्युनिगु ततःधगु पिण्डपात्र
प्रदान (पञ्चदान) सम्यक् धर्म याय् फय्मा, सर्वदा

सुखानन्दैश्वर्य जुया जगत् प्राणीपिन्त हित याय् फय्मा
धका आशीर्वाद विया थुंगु स्थानं लिहाँ विज्याना
न्हापायागु स्थान प्रसन्न शील महाविहारेतुं विज्यात ।

थनलि धर्मश्री बालकं श्री दीपङ्कर आदिवुद्ध भगवानं
शुभाशीर्वाद व्युगु न्यना मती अत्यन्त हर्ष याना, श्री
त्रिरत्न शरण धका नामोच्चारण याना, श्री दीपङ्कर
भगवानयात लुमंका थःगु छेँ वना, मां-बौयात थमं
याना वयागु खँ वृत्तान्त कना आनन्द सुख वास याना
ज्वन धका थुगु खँ श्री शाक्यमुनि बुद्ध भगवानं श्रावस्ती
नगरे जेतवन महाविहारे विज्याना, आनन्द भिक्षु, शालि-
पुत्र, महामौद्गल्यायण, काश्यप भिक्षु प्रभृति भिक्षुसधर्षि,
अनाथपिण्डिक महाजन प्रमुख सकल सभालोक गणपिन्त
खँ धक्का, न्यंका, धर्मोपदेश विया विज्यात ।

थ्व खँ न्यना, भिक्षुपंगव शालिपुत्र महाभिक्षुं हानं
श्री शाक्यमुनि भगवानयाके प्रश्न यात ।

भो सर्वज्ञ शाक्यमुनि भगवान् ! थनंलि श्री दीपङ्कर
तथागत गन विज्यात ? धर्मश्री बालकं छु कर्म यात ?
अनं लिपा गन जन्म काःवन ? लिपायागु जन्मे वं छु छु
दान धर्म यात ।

थय्ये शालिपुत्र मिश्रुं प्रश्नयागु खँ न्यना, श्री
शाक्यमुनि भगवानं सकल सभालोकपिन्त चित्त बोध
यायेया कारणे पुनर्वार आज्ञा दयका विज्यात ।

हे महाज्ञानि, शालिपुत्र ! थ्व खँ जि छिमित विस्तार
पूर्वक कने, छिमिसं एक चित्त याना न्य ।

थनंलि श्री दीपङ्कर आदिवुद्ध तथागत कामार्थी नगरं
लिहाँ विज्याना प्रसन्नशील महाविहारे सकल शिष्यपि
मुंका सभामण्डल दयका विज्यात । उगु अवस्थाय्
सुनन्दादि मिश्रुगणपि सकसियां मती धर्मश्री बालकं धू
मात्र दान व्यूगु सुवर्ण, वृहि, फल इत्यादि जुया वःगुलि
आश्चार्य चाया श्री दीपङ्कर तथागतयागु ख्वाः स्वया
लाहात होजलपा प्रणाम याना थुगु प्रकार विन्ति यात ।

भो भदन्त, सर्वज्ञनाथ ! छलपोलयाके जिमिगु मती
अद्भुत आश्चार्य जूगु खँ छगू विन्ति याय् त्यना, व छु
खँ धाःसा— धर्मश्री बालकं छलपोलयात धू दान याःगु
क्षण मात्रं सुवर्ण चूर्ण जुल तथा जिमित व्यूगु धूनं नाना
प्रकारया वृहि, फल, स्कन्दमूल जुया बल, युक्रियागु
कारण गथ्ये अथवा छु हेतुं जुल थ्व खँ जिमित यथार्थ
रूप कना विज्याहुं ।

थथ्ये सुनन्दादि भिक्षुगणपिसं विन्ति याःगु खं न्यना
 श्री दीपङ्कर तथागत आदिबुद्ध भगवान् मुसुहुं न्हिला
 सुनन्दादि भिक्षुगणपि सकल सभालोकपिनिगु ख्वाः स्वया
 आज्ञा दयका विज्यात ।

हे भिक्षुसंघ, सकल सभालोकपि ! थुगु विषये छिपिं
 छुं आश्चार्य चाय् म्वाः ।

केवलं भावयेद्धर्मं रक्षचित्तेन साधुना ।
 चित्तानु रक्षभावेन सर्वसिद्ध्यन्ति मानवाःरति ॥

हे भिक्षुगणपि ! थ्व खं छिमिसं बांलाक थ्वीकि ।
 केवल चित्तयागु खं खः । छिमिसं सिया च्वंगु नं खः ।
 तथापि छिमिसं जिके न्यन, आः जि थुकियागु खं विस्तार
 पूर्वक कन्ये, छिमिसं एकाग्र चित्त याना न्य ।

हे भिक्षुगणपि ! थ्व सन्सारे यावत्प्राणिजनपिनि
 पाप-पुण्य, अकुशल-कुशल, मर्भिगु-भिगु ज्वीगु केवल
 थःथःगु चित्तया प्रभावं ज्वीगु खः । पाप धैगु असत्य,
 कुसंगत, कुकर्मयागु चित्तं उत्पत्ति ज्वी । पुण्य धैगु सत्य,
 सत्संगत, सुकर्मयागु चित्तं उत्पत्ति ज्वी । व कुकर्म-
 सुकर्म धैगु सुनां याइगु, थःथमं हे याइगु खः । थ्व

सन्सारे प्राणिपि, कुण्ठती वना दुःख भोग याइगु छुकिं-
 राग, द्वेष, मोह, माया, काम, क्रोध, लोभ, तृष्णादि
 च्यागू दु । थ्व फुक कुसंगत व अभिमान तथा अहं-मम,
 जि, जिगु, जित धैगु ममतां पिह्णै । थुकिं याना प्राणि
 पिनि थःथःगु चित्तं मखु-मखुगु कर्म याई, थुजोगु कर्म
 याःपिसं पिने-पिने धर्म धका दुने चित्त रक्षा मज्जुगु,
 श्रद्धाभाव मदुगु, ममतां जक अनेक दान धर्म याई वा
 याना ज्वी, थुजोपिसं पिने-पिने यको हे दान धर्म
 याना ज्वां, दान धर्म याःगुया कामना सफल ज्वी मखु,
 निष्फल हे ज्वी । थ्व फुक अहं-मम धैगु अज्ञानं मात्र
 याःगु धका छिमिसं सीकि । थय्ये अज्ञानं सुवर्ण हे दान
 याःसानं धू दान याःगु ज्वी । हानं गुम्हं प्राणि सुगती
 वना सुख भोग याइगु छुकिं थ्व हे राग, द्वेष, मोह,
 माया, काम, क्रोध, लोभ, तृष्णादि थ्व च्यागू कुसंगत
 व अभिमान तथा अहं-मम, जि, जिगु, जित धैगु फुक
 तोता, मभिगु, मखुगु कर्म मयासे, सत्संगतयागु द्वारं
 शिक्षित जुया, श्रद्धाभावभक्ति संयुक्त याना काय, वाक,
 चित्त शुद्ध याना यत्किञ्चित् न्हागु हे दान याःसां, धू
 हे मात्र दान याःसानं सुवर्ण रत्नादि अनेक प्रकारया
 वस्तु ज्वी ।

हे भिक्षुगणपि ! थुगु ज्ञान छिमिसं सीकि । धर्मभी
 बालक छुं कामना मयासे निष्कामना याना, काय, वाक्,
 चित्त शुद्ध याना, भद्धाभावं झीत धू दान याःगु जूया
 निरति क्षण मात्रं सुवर्ण चूर्णादि, हानं बृहि, वा, छो,
 कय्गु; फल अंव, हल, केरा; स्कन्द-मूल सकि, हि,
 लें इत्यादि जुल ।

हे भिक्षुगणपि ! चित्तयागु खँ सीकेगु तसकं थाकु,
 यको दु, कनां साध्यगु मखु, मुख्यगु ज्ञान थुलि हे खः ।
 छिमिसं थ्वीकि- कुसंगत व कुज्ञानं दान धर्म याय्व अधमे
 लाई । सुसंगत व सुज्ञानं दान धर्म याःसा उत्तमे लाई ।
 उकीं कुसंगत व कुज्ञान तोता धर्म-कर्म दान-पुण्य यात
 थाःसा उगु उत्तम धर्म तत्कारणं सकल ज्या-खँस
 शुभफल प्राप्त छुया अनुत्तर (उत्तर वीगु मदुगु) सम्यक्स-
 म्बोधि ज्ञान लाना निर्वाणपद प्राप्त ज्वी ।

हे भिक्षुगणपि । थ्व सन्सारे सकल सत्वप्राणिया
 शरीरे ज्ञानेन्द्रिय व कर्मेन्द्रिय निगूया झिगू इन्द्रिय दैच्वन ।
 झिगू इन्द्रियया ज्ञानेन्द्रिय न्यागू व कर्मेन्द्रिय न्यागू ।
 ज्ञानेन्द्रिय धैगु न्यागू छु छु था.सा- चक्षु, श्रोत, घ्राण,
 जिह्वा, त्वक् ।

थ्व न्यागुलिं लु लु याइ धाःसा- चक्षु इन्द्रिय धैगुलिं
मिखां अनेक रूप खंका विचार याइ १, श्रोत इन्द्रिय
धैगुलिं न्हाय्पनं अनेक शब्द तायेका विचार याइ २,
घ्राण इन्द्रिय धैगुलिं न्हासं अनेक सुगन्ध व दुर्गन्ध नताय्का
विचार याइ ३, जिह्वा इन्द्रिय धैगुलिं म्यं चाकु, फाकु,
पाउं, पालु, खायु, चिसवा समेत याना पदरस खुगू
प्रकारया स्वाद (सवा) थ्वीका विचार याइ ४, त्वक्
इन्द्रिय धैगु छ्यंगुलिं नायु, क्वाचु, ख्वाउं, क्वाः
विचार याइ ५ ।

कर्मेन्द्रिय धैगु न्यागु लु लु धाःसा- वाक्, पाणि,
पाद, पायु, गुह्य ।

थुकिं लु लु याइ धाःसा- वाक् इन्द्रिय धैगु म्हुतुं
क्चन ल्हाना ज्याखँ याइ १, पाणि इन्द्रिय धैगु ल्हार्ति
भिगु वा मभिगु ज्या याइ २, पाद इन्द्रिय धैगु तुर्ति
भिगु वा मभिगु थासे वनी ३, पायु इन्द्रिय धैगु गुदद्वारं
मल व वायु त्याग याइ ४, गुह्य इन्द्रिय धैगु लिंग अथवा
भग मैथुनादि कमे याइ ५ ।

थ्व ज्ञानेन्द्रिय न्यागू व कर्मेन्द्रिय न्यागू निगुलिं
मिले ज्वीवले दशेन्द्रिय ज्ञिगू इन्द्रिय ज्वी ।

ध्व क्षिगू इन्द्रिययात चित्तं अधय् याना काव, वाक,
चित्तं सत्संगत भिगु, कुसंगत मभिगु कर्म याइ ध्व
फुकं चित्तयागु ज्या ज्वी ।

चित्तयात नं ज्या अधय् याइल्ल स्मरण धैल्ल ज्ञान दु,
सत्संगतं सुज्ञान प्राप्त ज्वी, कुसंगत कुज्ञान प्राप्त ज्वी ।
सत्संगतं प्राप्त जूगु ज्ञानं खंका अहंकार, अभिमान, ममता
मयासे दानधर्म याःगु फुकक उत्तमे लाना श्रद्धाभक्तिया
बलं धू जक दान याःसानं सुवर्णादि रत्न ज्वी ।

कुसंगतं प्राप्त जूगु कुज्ञानं अहंकार, अभिमान, ममता
पाछाया दानधर्म याःगु फुकं अधमे लाना श्रद्धाभक्तिया
बल मदुगुलि सुवर्णादि दान याःसानं धू हे समान ज्वी ।

चतुर्दानं प्रदास्यामि षट्कर्मन्तु दिने दिने ।

दान याय् धैगु नं प्यता प्रकारया भेद दु छु छु
धाःसा— १ अर्थ दान, २ मन्त्र दान, ३ क्रिया दान,
४ विद्या दान । अर्थ दान धैगु धनद्रव्य कुटुंबादि दान
याय्गु, मन्त्र दान धैगु देवतादिपिनिगु सुमन्त्र न्यंकेगु,
क्रिया दान धैगु भिगु ज्या-खं स्यनेगु, विद्या दान धैगु
शिक्षा व विद्या स्यनेगु ।

दानं षट्कर्म धैगु खुगू कर्म दु लुलु धाःसा— १ दान,
२ शील, ३ क्षान्ति, ४ वीर्य, ५ ध्यान, ६ प्रज्ञा । ध्व
खुता ज्या याकील्लनं सत्संगत द्वारा चित्तं हे याइगु खः ।

दानं चतुर्विधं प्रोक्तं दारिद्रस्य शिशोरपि ।
सुपात्रं च सुचित्रं च विशेषं दान सद्वरम् ॥

विशेष उत्तम पुण्य प्राप्त जीगु दान प्यता प्रकारया
दु, गथे धा सा— दुःखि दारिद्र याचकादि रोगीपिन्त
बीगु १, बालकपिन्त बीगु २, सुपात्र धैपि योगी, साधु,
त्यागी, सज्जन, ब्रह्मचारी, भिक्षु, वज्राचार्य, ब्राह्मणादिपिन्त
बीगु, सुचित्र धैगु देव, गुरुपिन्त बीगु व लँदय्केगु, सतः,
हिंति, तूँ, बूंगा, घाट, पुखु, देवालय, विहार, देवस्थान,
देवमूर्ति, पुस्तक दय्केगु अथवा जीर्णोद्धार योय्गु तथा
विद्यालय दय्केगु समेत प्यता प्रकारया दान धर्म याय्गुनं
सत्संगत द्वारा चित्तं हे याइगु । चित्तयात भिगु कर्म
याकील्ल नं ज्ञान खः, ज्ञान धैगु हे सत्संगतं दैगु खः ।
क्रमशः श्रद्धां दान धर्म याइगु प्रभावं धू जक दान याःसा
नं रत्नादि सुवर्ण जुया अन्त्ये महासुख प्राप्त जी । ध्व
धर्मश्री बालक पूर्वजन्मनिसें सत्संगतद्वारा ज्ञान धारण
याना बल्ल खः । उकिं ध्व बालकं श्रद्धाभक्ति तथा दान

याःगु धू जक जूसानं थुजोगु प्रभाव क्यन । थुकी लु
संखा मदु धका श्री दीपङ्कर तथागत आदिबुद्ध भगवानं
मुनन्दादि भिक्षुगणपिन्त आज्ञा दयका विज्यात ।

ध्व हे खँ श्रावस्तीनगरे जेतवन महाविहारे श्री
शाक्यमुनि भगवान सकल सभालोकपिन्त स्वया शालिपुत्र
महाभिक्षुयात खँ ध्वका थःगु पूर्वजःमयागु महिमा थुगु
खँ धर्मोपदेश विया विज्यात ।

इति श्री कपिदाऽवदाने धर्मश्रीबालक जन्मे श्रीदीपङ्कर तथागताय
पांशु प्रदान वर्णनो नाम पञ्चमोऽध्यायः ॥ ५ ॥



अथ सर्वानन्द नृप कथा

थनंलि सर्वानन्द राज्ञयागु खँ ।

पुनर्वार शालिपुत्र, महामौङ्गल्यायणादि श्रावकसंघ
भिक्षुगणपिसं श्री शाक्यमुनि भगवानयाके विन्ति यात ।

भगवन् सः त्रिजगच्छुद्धः शिशु धर्मश्रिना पुनः ।
तज्जन्मान्तरादानं किंकिं दातव्य विस्तरात् ॥
तत्सर्वं भगवन् ब्रूहि सर्वसत्त्वार्थं हेतुना ।
कृपया स्मान्समालोक्य समुद्धर्तुं भवाविधना ॥

भो भगवन् ! स्वंगूलोके उज्ज्वलद्वय धर्मश्री बालकयागु
खँ वृत्तान्त न्यनेगु जिमि अति इच्छा जुल । पुनः व
बालक गुलि म्वात ? अनं लिपा गन जन्म काःवन ?
लिपायागु जन्मे व बालकं दानपारमितायागु छु छु ज्या
यात ? छु वस्तु दान यात ? हे भगवन् सवेज्ञ ! थन
जि प्रभृति सकल सभालोकपिनिगु मन बोध याय्या कारणे
सन्साररूपि समुद्रे दुना दुःखभोग याना च्वपिं प्राणिपिन्ति

रक्षा याय्या कारणे, उद्धार याय्या कारणे छलपोलं
सकल सत्वप्राणिया उपरे दया-कृपा तया, थन सकल
सभालोकया धर्मश्री बालकं दान याःगु दानपारमितायागु
खँ धर्मोपदेश न्यनेगु इच्छा याना च्वंगु व धर्मश्री बालकया
पुनः जन्मयागु खँ थन सकल सभालोकपिनिगु मनोरथ
पूर्ण ज्वीक विस्तार पूर्वक आज्ञा दयका विज्याहुँ ।

थथ्ये भिक्षुपंगव शालिपुत्र, महामौङ्गल्यायण प्रभृति
श्रावकसंघ भिक्षुगणपिसं चिन्ति याःगु खँ न्यना श्री
शाक्यमुनि भगवानं शालिपुत्र, महामौङ्गल्यायणादि सकल
सभालोकपिनिगु ख्वाः स्वया आज्ञा दयका विज्यात ।

हे महाज्ञानि शालिपुत्र ! हे सकल भिक्षुगणपि !
हे सकल सभालोकपि ! छिमिसं धर्मश्री बालकया पुनः
जन्मयागु खँ न्यने इच्छा जूसा जिं छिमित व्यक्त याना
कने छिमिसं एकाग्र चित्त याना न्य । व धर्मश्री बालकया
पुनः जन्मयागु खँ गथ्ये धा सा— व धर्मश्री बालक उगु
अवस्थास दीर्घायु मजू झिनिदँ दुबले हे मृत्यु जुया वन ।

दीपङ्करादिश्च ससाधिकेभ्यो

पांशुप्रदानाच्छि शुजन्मनि प्राक् ।

तस्मात्प्रदानाद्भुवि शक्रतुल्यो

दीपावती श्री नृपतिर्वभूव ॥

दीपावत्यां महानगर्यां सुशीलानन्द राज्ञ

स्त्री शीलावती गर्भा जातः सर्वानन्दो नाम

नरपतिरभूत् । तस्य भार्या सर्वागुणालंकृता

परिशुद्ध मानसादेवी सौन्दरी धर्मावती

समापन्नः ।

हे भिक्षुगणपि ! व धर्मश्री बालकं कर्मानुसार न्हापा

यागु जन्मस किंशुक वने च्वना श्री दीपङ्कर आदिवुद्ध

भगवानयात (पनस फल) फसि दान यात । अन लिपा

कामार्थी नगरे धर्मश्री बालक धायका जन्म जुया श्री

दीपङ्कर आदिवुद्ध भगवानयात पुनः वसपोलया श्रावक

संघगणपि भिक्षुपिन्तनं श्रद्धा भावभक्ति तया, मती छुं

कल्पना मतसे एकचित्तं पांशु धू इत्यादि दान यागु

पुण्यया अनुभावं, अनं लिपायागु जन्म दीपावती नगरे

सुशीलानन्द माहाराजाया स्त्री सत्यवती जुया च्वंक्ष

शीलावती महारानीया गर्भं जन्म जुया लिपा इन्द्र तुल्य

पराक्रमं संयुक्त जुया च्वंक्ष सर्वानन्द राजा धायेको श्री

त्रिरत्न भक्ति, महाकरुणा चित्त, पुण्य शरीर, शान्त स्वभाव
जुया, सदानं दान धर्मस उद्योग याना प्रजावत्सल जुया
सकल प्राणीपिन्त अति दया-कृपा तथा सकसिनं धन्य-धन्य
धका प्रशंसा याका आनन्दं सुख भोग याना च्वन ।

ध्वसपोल सर्वानन्द महाराजाया स्त्री सकल गुण ज्ञानं
संयुक्त जुया, शुद्धचित्त शान्तरूप अति सुन्दरी सुलक्ष
जुया च्वन्न धर्मावती धैर्य महारानी जुया च्वन ।

सदां राजा-रानी निह्य स्त्री-पुरुष स्नेह व प्रेम प्रीति
तथा महासुख आनन्दं (काल) दिन हना प्रजालोकपिन्त
स्वीतनं छुं हे दुःख मज्जीक आनन्दं प्रतिपाल याना,
राज्यैश्वर्य सुखभोग याना च्वन ।

तस्मिन्समये दीपङ्कर भगवान् तथागत
संम्यक्संबुद्ध प्रसन्नशील महाविहारे विहरतिस्म ।
तदा तेन सर्वानन्द नृपेण श्रीदीङ्कपर भगवते
ऽर्हते संम्यक्संबुद्धाय पिण्डपात्र दाने चित्त
मुत्पादयतिस्म ।

उगु समये श्री दीपङ्कर तथागत अर्हत् संम्यक्संबुद्ध
आदिबुद्ध भगवान् दीपावती नगरया समीपस प्रसन्नशील

महाविहारे यः शिष्यपुङ्गव सुनन्द महाभिक्षु प्रभृति श्रावक
संघ भिक्षुगणपि, उगु देशया राजा-प्रजा तथा मन्त्री,
सार्थवाह, महाजनपि इत्यादि, हानं मेमेपि अनेक सभा-
लोकपि मुंका सद्धर्म ज्ञान धर्मोपदेश विया विज्यात ।

युगु समये श्री दीपङ्कर आदिवुद्ध भगवानं उपदेश
विया विज्यागु वसपोलयागु अमृतवाणी सद्धर्म ज्ञान उपदेश
न्यना, सर्वानन्द राजां वसपोल श्री दीपङ्कर तथागत अर्हत्
संम्यक्सम्बुद्ध आदिवुद्ध भगवानयात, वसपोलया शिष्यवर्ग
श्रावकसंघ भिक्षुगणपिन्तनं दानपारमिताया रूलं पिण्डपात्र
दान याय्माल धका मतीं चित्तना याना राजदरवारे लिहाँ
चया थःगु अन्तपुरे द्वाहाँ वना अनित्य लुमंका व्वन ।

थुगु अवस्थाय सर्वानन्द राजां अनाथ दुःखि दारिद्र
पिनिगु दुःखि स्वये म्वालेमा धका मनं चिन्तना याना
विचार यात ।

अनित्य संसार सुखंसकोष-

मनित्य पुत्रं च सुहृत्सदारा ।

अनित्य राज्यं सहभृत्य सैन्यं

नानाद्यलंकार विचित्र वस्त्रं ॥

सर्वमनर्थमपि शाश्वतं तत्

क्षणेन प्राणं पतति स्वयं च ।

वृत्तं यथा पक्कफलं पतन्ति

तथाहि संसार शरीर मेव ॥

श्व संसारे नित्य धैगु पदार्थ छुं हे मखना, श्व संसार हे अनित्य खः । सुखभोगादि ऐश्वर्य्य धैगु न अनित्य खः । हानं अनेक वस्तु धन इत्यादि न अनित्य खः । स्त्री, पुत्र, पुत्री, इष्टमित्रादि, पासा, त्वाय तथा मां, अबु समेत अनित्य । सैन्य सिपाही, प्रजालोक न अनित्य । तिसा वस, अलंकार सकतां अनित्य । अनित्य धैगुया अर्थ नाश जुया मदया वनीगु खः । गथ्ये सिमास मयाच्वंगु फल पाके जुया थःथमं कुतूबै, वध्यें छन्हु प्राण वायु नं शरीर तोता पिहौ वनी । शरीर नं छुं ख्यले मदया धोः गिगु नवैगु धका याकन मशाने यंका उनाछोइ, वाकि दुगु खरानि, क्वं भस्मनं लखे चुइका छोइ, छन्हु श्व संसार हे नं लखं तोपुया विनास ज्वीतिनि धासैलि सार धयागु नित्यगु वस्तु पुण्य विना मेगु छुं हे मखना । अध्यया कारणे श्री दीपङ्कर भगवानयात निश्चयनं जि दानपारमिताया रूलं पिण्डपात्र दान याना

प्रजागणपिन्त क्यनेगु जुल धका मती तथा सर्वानन्द
राजां थ; स्त्री धर्मावती महारानीनाप सल्हा यात ।

हे प्रिये धर्मावती स्त्री ! जि नित्यगु छगू खँ धाय्
त्यना छु धाःसा- थ्व संसारे सुखभोग जक याना च्वनेगु
अनित्य खः । थःगु शरीर, स्त्री, पुरुष, पुत्र, पुत्री आदि
स्त्रीयात पुरुष, पुरुषयात स्त्री न अनित्य, थ्व संसार हे
अनित्य तिनि । उकिं नित्यगु पदार्थ दान-पुण्य बिना
मेगु छुं हे मद्दु, पुण्य छगू जक हे नित्य खः । तस्मात्
अध्येया कारणे श्री दीपङ्कर भगवान प्रभृति सकल संघयात
जि दानपारमिता रूलं पिण्डपात्र दान याये त्यना ।
मनुष्य जन्म धैगु नं बराबर जूवै कि मवै, थुगु नरदेहस
कामभोगादिस जक भुले जुया च्वनेगु मनुष्यया कर्तव्य
मखु । मनुष्यया कर्तव्य संसार ममुद्रं पार ज्वीफैगु
अनात्म ज्ञान थ्वीका पुण्य मार्गे पलाछिना ज्वीगु खः ।
आः थुलि चेतना दुबले झीसं भिगु कमे याना वनेगु
चिन्तना याय् माल ।

थुलि थः स्वामीं नित्यगु खँ आज्ञा जूगु न्यना
धर्मावती रानी खुसी जुया स्वामीया खाः स्वया मुसुमुसुं
न्हिला बिन्ति यात ।

भो स्वामी, महाराज ! छलपोलं आज्ञा दयकुगु खँ
 सत्य वचनया खँ खः, जि निश्चयनं पालना यायगु जुल ।
 छलपोलया इच्छा थें श्री दीपङ्कर तथागतयात पिण्डपात्र
 दान यायेगुलि विस्तार याना विज्याय म्वाल, तत्कारणं
 थुगु ज्या सिद्ध याना विज्याहुँ धका निह्न स्त्री-पुरुषया
 हपे याना खँ ल्हाय् धुंका सुबुद्धि मन्त्रीयात सःता
 आज्ञा दय्का विज्यात ।

हे महामन्त्रीजु ! जिमि निह्नसियां चतुर्मास प्यला
 तक पञ्चशील, अष्टशील कया उपोषट् व्रत यानालि
 श्री दीपङ्कर तथागतयात पिण्डपात्र दान यायेगु इच्छा
 जुल, थुगु ज्यायात माःगु सामाग्री पुष्प, धूप, दीप,
 गन्ध, रस, नैवेद्य, फलमूलादि. पक्वान्न (मधि), बृहि,
 दक्षिणा इत्यादि तयार या । थ्व व्रत याना दान याय्गु
 छुक्रिया निरन्ति धाःसाः— अन्धकारस मत च्याकेथ्ये,
 रात्रिस पूर्णचन्द्रमाथ्ये, दिनस सूर्य्यथ्ये, नयत्त्वने मदुल्ल
 दुःखियात धन सम्पत्ति चूलावैथ्ये, परलोकस मोक्षगति
 मिले ज्वीगु, थुजोगु उत्तमगु संपत्ति लाये दैगु । हानं
 अज्ञानयात ज्ञान प्राप्त ज्वीगु, धर्म, अर्थ, काम, मोक्ष
 थ्व प्यंगू चतुर्वर्ग फल लाये दैगु, सम्बोधि ज्ञान लाना
 प्राणीपिन्त हित याय् फैगु ज्ञान वृद्धि यायेगु कामनां

थय्ये सर्वानन्द राजां आज्ञा जगु खँ न्यना सुबुद्धि
मन्त्रीं राजायात प्रणाम याना राजाया आज्ञार्थे दीपावती
नगरस सकभनं घण्टाघोषण याना सकल प्रजालोकपिन्त
खवर बिल ।

११थ्ये खवर बिल ११:२५१:—

भो प्रजालोकगणपि ! श्री सर्वानन्द महाराजाया
आषाढ शुक्लया पूर्णिमा खुनुंनिसे कार्तिक शुक्लया पूर्णिमा
(चतुर्मास) प्यला तक प्रसन्नशील महाविहारे बना श्री
दीपङ्कर भगवान, वसपोलया शिष्य प्रभृति आर्य्यगणपिन्त
पूजाभाव याना पञ्चशील, अष्टशील कया उपोषठ व्रत
धारण यानालि पिण्डपात्र दान याय्गु इच्छा याना
विज्यात । उकिं माहाराजायागु मनोरथ पूर्णयाय्या
कारणे थन दीपावती नगरया सकल देशवासीपि मिले
जुया जगत् कल्याण ज्वीमा धैगु चित्त याना आषाढ
पूर्णिमाखुनुं निसे कार्तिक पूर्णिमा तक प्यला (चतुर्मास)स
न्हिधं प्रातःकाले प्रसन्नशील महाविहारे बना भगवान श्री
दीपङ्कर तथागतयात पूजा याना पञ्चशील तथा अष्टशील
कया वसपोलंनिसे संघगणपिन्त यथाश्रद्धा पिण्डपात्र
द्रव्यलपा मङ्गलोत्सव याना उपोषध व्रत धारणा याय्त

प्रसन्नशील महाविहारे वने माल । श्वे छुया निन्ति
याय् त्यगु धाःसा— देश पवित्र व देशवासी प्रजागणपिनि
सकलया सुखंश्चर्य ज्वीमा अन्त्ये प्राणिपिं नरक भोग
याये म्वालेमा, नरक्य वात याना च्वपिं पापीतय् न
याकनं पार मोचन जुया नरकं मुक्त ज्वीमा । हानं हानं
नरक भोग याये म्वालेमा, सकलयात मोक्षगति प्राप्त
ज्वीमा धैगु कारणे श्वज्या याना विज्यायत्यगु स्वः धका
छिमिसं सीकि । तथा सकसिनं थय्येहे मनं चिन्तना याना
धर्म याय्गु स्व । चनुर्मास पूर्णजुसेलि महाराजाया दरवारस
भगवान् विज्याका पिण्डपात्र दान याय्गु इच्छा याना
विज्यात । उकिं आः प्रसन्नशील महाविहारे वनेत छिमिसं
शुद्ध वस्त्रं पुना श्रद्धाभक्ति तथा, गच्छे अनुसारं पूजा
याय्गु, दान याय्गु सामाग्री ज्वना राजकुलस वये माल
धका खबर बिल ।

एवं प्रकारं भिगु खबर व्यूगु न्यना सकल प्रजालोक
पिनि चित्त हर्ष याना, प्रातःकालस न्हापां दना शुचि
स्नान याना शुद्ध वस्त्रं पुना पूजा याय्गु तथा दान याय्गु
सामाग्री ज्वना प्रसन्नशील महाविहारे वनेत राजदरवारया
पिने वया मुना च्ववल ।

थुगु समये सर्वानन्द माहाराजाया मती हर्षमान याना नाना मङ्गल वाद्य थाका राजा-रानी, मन्त्री, प्रजारण सहित प्रसन्नशील महाविहारे वना श्री दीपङ्कर आदिवुद्ध भगवान दर्शन याना प्रणाम याय् धुंका, शील कया पूजादि याना, दान-प्रदान याना चतुर्मास पर्यन्त एवं प्रकारं दीपावती नगरवासी महाराजा सर्वानन्द, महारानी धर्मावतां, मन्त्रो तथा प्रजालोकर्षि सहितं उपोषट् व्रत धारणा याना निर्विघ्नं थुगु ज्या सिद्ध यानालि तथा दरवारेनं दान याय्गु ज्या याना महामङ्गलोत्सवं व्रत कार्य्य याना च्चच्चं हानं मेगु श्रावण महिना थ्यसेलि मन्त्रीयात अधय् याना पिण्डपात्र दान याय्गु स्थाने पूर्वदिशास मङ्गल द्वार ध्वाका तया दानशाला दय्के बिया थाय्थासे वितान, उख्येलिका ध्वज, पताका, चामल तया किंकिनी जाल प्यना छाया दानशालास पूजाया सामाग्री पुष्प, धूप, दीप, गन्ध, रस-नैवद्य, फलमूलादि । दान याय्गु सामाग्री सुवर्ण द्रव्य, खिखिलिका, पिण्डपात्र, चीवर वस्त्र, क्षीर भोजन, पञ्चामृत, रसपान । हानं सा, सल, किसि, रथ इत्यादि सकतां तयार याका अनंलि प्रजागणर्षि सकलें मुंका पुष्प, धूप, दीप, गन्ध, रस-नैवद्यादि, पूङ्ग ताम्बूल, दक्षिणा आदि नाना प्रकारया पूजा सामाग्री ज्वना श्री दीपङ्कर

भगवान् निमन्त्रणा यायेत प्रसन्नशील महाविहारस वना
श्री दीपङ्कर संम्यक्सम्बुद्ध भगवानयात त्रिप्रदक्षिणा याना
अष्टाङ्ग प्रणाम यायधुंका पूजादि याना पृथिवीस पुलिंचुया
थगां न्यया, ल्हाहात हाजलपा सर्वानन्द महाराजां
थय्ये विन्ति यात ।

भो भगवान् ! छलपोलयात वारंवार प्रणाम, जिगु
राजगृहस विज्याना दानशाला पवित्र याना विज्याय माल ।
दानपारमिताया रूलं पिण्डपात्र दान याय्गु इच्छा याना
छलपोल व छलपोलया संघ सहित आर्य्यगणपि मुंका
थनिं प्यन्हु श्रावणकृष्णया त्रयोदशीखुनु पातः समयस
दीपावती नगरे पादार्पण याना जिमिगु उपरे कृपा तया
विज्याहुं धका धया ताय्, आखे, द्वाफोस्वां स्वपास होला
विन्ति याना च्वन ।

थनलि श्री दीपङ्कर भगवान् मुसुहुं न्हिला सर्वानन्द
राजाया ख्वाः स्वया आशीर्वाद विया आज्ञा जुल ।

हे राजन् सर्वानन्द ! छ धन्य खः, श्रद्धामक्ति तया
निमन्त्रणा याःवल छंगु मनोरथ पूर्णःवीमा, श्रावक संघ
तया आर्य्यगणपि मुंका जि थनिं प्यन्हु श्रावणकृष्ण
त्रयोदशीखुनु निश्चयनं वयेगु जुल ।

मध्ये श्री दीपङ्कर आदिवुद्ध भगवानं आज्ञा जगु
 न्यना सर्वानन्द राजा, रानो, मन्त्रो, पूजागण सकल
 खुसि जुया अष्टाङ्ग पूणाम याना निमन्त्रणा याःवर्षि
 सकल अतं लिहाँ वन धरुा एवं प्रकारं कलियुगम श्री
 शाक्यमुनि बुद्ध भगवानं श्रावती नगरे जेतवन महाविहारे
 विज्याना सकल सभालोकपिन्त आत्ता दय्का विज्यात ।

इतिश्री कपिदाऽवदाने सर्वानन्द नृप जन्म परिहृपात्र
 दानार्चनाय दीपङ्कर निमन्त्रणो नाम षष्ठोऽध्यायः ॥ ६ ॥



अथ सर्वानन्द नृपेण पिण्डपात्र दान कथा

थनलि सर्वानन्द राजां पिण्डपात्र (पञ्चदान) यागु खँ ।

तदनु महाराजा पौरजनान्समाहूय सम्यक्
दिक्षु मार्गं सिञ्चयन्तिस्म, पिण्डपात्र सत्का-
राय । ततः पौरजनैः शुचिगन्धोदकैः चतुर्षु
दिक्षु मार्गं सिञ्चयित्वा नाना सुगन्ध पुष्प धूप
दीप गन्धादीन् संयोजयामास ।

थनलि सर्वानन्द राजां प्रजागणपिन्त सः ता दीपावती
नगरया चतुर्दिगस मार्गं शोधनयाका दीपङ्कुर भगवान् यात
पिण्डपात्र दान यागुलि सत्कार यागु कारणे खबर बिल ।
महाराजाया आज्ञा न्यना प्रजागणपिसं थाय्थासे सकभर्न
शुचि याना, अष्टसुगन्ध धूप थना, शुद्ध निर्मलगु लखं हाः हा
याना, थाय्थासे पूर्णघट तया, छत्र ध्वजा पताका चाम-
रादि अष्टमङ्गल चिन्ह दिगमाला पुष्पमाला क्रिकिनी जाल
प्यना चित्र-विचित्रया प्रतिमा बोया मार्गपत्ति स्था, ताय्,
आखे सिन्धुरं संयुक्तयाना छाया बांलाका तल ।

हानं दान शालास दान यायुगु ज्वलं फुकं तथा मदु
धैगु छुंहे मदेक सकतां पूर्णज्वीक तयार याना तल ।
गुलिं लोकपिसं नव बाजा, पञ्चताल बाजा, शंख भेरी,
म्वाहाली, काहा, बासुरी पुया, वीणाथाना अनेक देवबाजा
इत्यादि थानां प्याखं हुला च्वन । गुलिसिन धारणी पाठ
स्तोत्रादि स्तुति च्वना मङ्गलोत्सव याना च्वन ।

पूर्व दिशास मङ्गलद्वारं तिसैं दान यायुगु स्थान दान
शाला थ्यंक बसालाया शोभायमान याना तल ।

थुगु अवस्थास निमन्त्रणा व्युगु दिनया प्रातः समयस
दीपङ्कर भगवान् थःसंघ आर्य श्रावक भिक्षुगणपि मुङ्का
थः च्वनागु प्रशन्नशील महाबिहारं प्रस्थान याना पञ्चरस्मि
तेज सकभणं खय्का दीपावती नगर भ्रमण याना विज्यात ।
थुगु समये आकाश मार्गं देवतापिसं दुंदुभि बाजा थाना
भेरी पुया पुष्प वृष्टि याना हल ।

थुगु बख्ते श्री दीपङ्कर भगवान् प्रभृति आर्य
श्रावकसंघ भिक्षुपि सकलें क्रमशः गमण याना दान शालास
पूर्व दिशाया द्वारे कथःथ्यें थ्यकः विज्यात । सर्वानन्द
राजां आदौ पादार्घ्य (लिचाय्केगु) याना यथाक्रमं

दान शालास द्वाहाँ विज्याका सकलयात यथायोग्यगु
आश्रमस विज्याकल ।

सुवर्ण रत्नाङ्कित पिण्डपात्रं

चिन्तामणि रसान्वित पायसंच ।

संपुज्य संख्याय सुवर्ण पत्रैः

शनसहस्राणि प्रयोजयन्ति इत्यर्थः ।

अनंलि विधि पूर्वक पूजा याना नवरत्नादि सहितगु
सुवर्ण पिण्डपात्र शास्त्रानुसारं यला दो सुकमेल, दालचिनि,
दाख, नैक्या, छारा, बडां, प्यस्ता, मिश्री धुजोगु च्याता
मसला सहित याना दुरुस पाक याना तःगु पायस (क्षीरं)
पूर्ण याना श्री दीपङ्कर भगवान्यात पिण्डपात्र दान यात ।
अनंलि आर्य्य श्रावक संघ भिक्षुपिन्तनं पायसं पूर्णगु पिण्ड-
पात्र दान याना तथा निमन्त्रणास विज्यापि सकलयातं
दान शालास तयार याना तःगु फुक दान याय् धुंका श्री
दीपङ्कर आदिवुद्ध प्रमुखं सकलयात निरामिप-पायस क्षीर
भोजन, पञ्चामृत रस पान याके धुंका नुचाय्का मुखसुद्धि
ग्वा, ग्वे नं बीधुंका श्री दीपङ्कर भगवान्या अग्रस च्वना
सर्वानन्द राजां ल्हाः निपां हाजलपा क्षमा फोना, पाप देशना
पुण्यानुमोदना इत्यादि याना सन्तोष याना विज्यात ।

दान कया विज्यापि सकसिन शुद्ध रूपं मधुर शब्दं एक
स्वर याना दान गाथा बोना विज्यागु जय मङ्गलघोष
न्यना, देवतादिपिसं हर्षोत्सुक याना आकाश मार्गं
दीपावती नगरस अमृत जलं सिचन याना हल ।

थनलि श्री दीपङ्कर आदिबुद्ध भगवानं अनित्य विषये
छुं धर्मोपदेश बिया आशीर्वाद बिया आज्ञा जुल ।

सिद्धिर्भवतु ते राजन् तवेच्छा परिपूर्णतः ।

अर्हत् बुद्ध पदं प्राप्य शीघ्रं गच्छतु निर्वृत्तिम् ।

हे राजन् ! गुह्य सत् ज्ञानि ज्ञानं खंका श्रद्धा भाव
भक्ति तथा एकाग्र चित्तं दान पुण्य कर्म यायि । उल्ल
ज्ञानियात तःधंगु पुण्य प्राप्त ज्वी । थौं भिगु दिनस एक
चित्तं श्रद्धा भक्ति तथा पाट पट्टाम्बर बसालाया आदौ
पादार्घ्य याना, यथाक्रमं पूजा याना तथा दक्ख जातया
अन्न, वृहि, फल मूलादि सहितं दान दक्षिणा, पिण्डपात्रस
पायस (क्षीर) पूर्ण याना दान यात । हानं निरामीष
क्षीर भोजन पञ्चामृतादि रसपान याक्कुगु पुण्यानुभावं थमं
छुतक वाञ्छा यानागु खः व फुकं पूर्ण ज्वीमा, अन्त्ये
क्रमानुसारं अर्हत्त्व बुद्ध प्राप्त जुया याकनं निर्वृत्ति पद

लाय्मा धका थय्ये शुभाशीर्वाद विया गुगु रूपं विज्यागु
खः उगु हे रूपं प्रशन्नशील महाविहारेतुं लिहाँ विज्यात ।

तत्र समये दीपावत्यां महानगर्यामेका
स्त्री लक्ष्मीथकुं नामाऽस्ति । सा स्त्री महा
दरिद्री धन-जन किञ्चित् नास्ति । एकस्मिन्
दिवसे तया मनसि चिन्तयामास । इदानीमहं
महा दरिद्री, धन-जन किञ्चित् वस्तु न मे गृहे ।
श्री दीपङ्कराय बुद्धाय पूजा, पिण्डपात्र दानञ्च
करोम्यहं कथं ।

थुगु अवस्थास दीपावती नगरे छल्ल कन्यादान
मज्झिम्ह ब्रह्मचारीतिनिम्ह लक्ष्मीथकुं धका नां जुया च्चल्ल
तसकं दुःखिम्ह महादरिद्री बाजा बल्ल आर्य्यपुत्री उपासिका
किसानी मिसा छल्ल दया च्चन । थ्वया जहान् परिवारपि
सुं मदु, याकःचल्ल जुया च्चन । थ्व दरिद्री लक्ष्मीथकुं मिसां
छल्लु थःगु मनं चिन्तना यात । छु चिन्तना यात धाःसा-
जि धन हीन, दुःखिनी दरिद्री, छ्ये नय्गु त्वनेगु वस्तु छुं हे
मदया च्चन, जहान धकानं सुं मदु, फगत् याकःचान्हिन्हि
छिया मेपिनिगु बुं ज्या योना जीवन हना च्चना ।

सर्वानन्द राजां याध्यै जि नं तथागतपिन्त पिण्डपात्र
छक दान याय्गु इच्छा जुल। आः जि गथे याय्? जि धाःसा
धन हीन, दु खिनी। थय्ये जूसां न्हागु याना नं भति-भति
अन्नमुंका जूसां दान याय्। थौंला कन्हेला मृत्यु ज्वी मानिगु
थ्व शरीर। संसारे नित्यगु वस्तु छुं हे मखना, दान धर्म
याय् फको जक नित्यगु खः धका विचार याना—हे भगवान्
तथागत श्री दीपङ्कर बुद्ध! जिगु मनोरथ याकनं पूर्ण ज्वीमा
धका नित्य स्मरण याना न्हिन्हि बुं वना छोमा सिनाहया
गबले वामानं सिनाहया शरीरं अति दुःख सिया कपाःया
चःति पालिस हाय्का कष्टनया च्वन। एवं प्रकारं अलसी
मचासे मुंका तःगु किञ्चित् अन्न वा, छो इत्यादि दान
याय् धका भालपा अष्टमी पत्ति पर्व पर्व कालस उपवास
च्वना भक्ति याना स्वीतनं मकसें गोप्य याना प्रातः
कालस प्रशन्नशील महाविहारे वना श्री दीपङ्कर भगवान्
दर्शन याना शील कया लिपा जुले जुया च्वन।

थ्वैगु चित्ते च्वंगु खं श्री दीपङ्कर भगवानं सिया, थ्वैगु
ख्याः स्वया न्हिला बिज्यात। थ्व लक्ष्मीथकुं मिसाया
लाजथ्ये ज्वीका मछाला भगवान् प्रभृति सकलयातनं
प्रणाम याना हतासं थःगु छेँ लिहाँ वना विचार यात कि
थौं जित स्वया श्री दीपङ्कर भगवान् न्हिला बिज्यात, जिगु

मने च्वंगु खँ अवश्यनं थ्वसपोलं सीका विज्यात । जिं थ्व
ज्या यानां हे तोते धका इच्छा याना, श्रावण शुक्लया
अष्टमी खुन्हु उपवास च्वना पिण्डपात्र दान याय्त तयार
यानालि भगवान् निमन्त्रणा वीत सुयाके सल्हा याय् धका
अलमले ज्वीका छेँ माःमाःगु ज्या याना च्वन ।

थ्व खँ सर्वानन्द राजां योका, थुजोङ्ग दरिद्रोङ्ग याकः
चाङ्ग मिसां हे भगवान् यात निमन्त्रणा याना पिण्डपात्र
दान याय् धका इच्छा यात धाम्यलि जिनें दान याय् धका
इच्छा याना श्री दीपङ्कर भगवान् यात सर्वानन्द राजां
न्हापालाक निमन्त्रणा याना विज्यात ।

राजायागु निमन्त्रणानुसारं थ्वसपोल दीपङ्कर तथागत
प्रशन्नशील महाविहारं प्रस्थान याना संघ आर्य्य भिक्षु
सहित याना दीपावती नगरस दुहाँ विज्याना थुल्ल लक्ष्मी
थकुं श्री दारिद्रो वहु कष्टं मुंका तःगु वस्तु दान याय्त
तयार जुया च्वन धैगु ध्यान दर्ष्टि खंका, न्हापालाक थुल्ल
लक्ष्मीथकुं ब्रह्मचारी मिसाया थास श्री दीपङ्कर भगवानं
दान काः विज्यात । थ्व भक्तिजन मिसां थःगु छेँ क्वसं श्री
भगवान् दीपङ्कर विज्यागु खना खुसि जुया हथार चाया
व्वां व्वां क्वहाँ वया चरणकमलस भोपुया पादाध्यं विया

पूजा याना थके दुगु वस्तु किञ्चित् मात्र जूसां श्री दीपङ्कर
भगवान् तथागतयात व वसपोलया आर्य्य भिक्षु संघपिन्त
नं श्रद्धा भक्ति तथा शुचि नियम याना उपवास च्वना
श्रावण शुक्लया अष्टमी खुन्हु प्रातः समये वा. छो, वृहि,
अन्न इत्यदि तथा निगामप क्षार पूर्ण यानागु पिण्डपात्र
नं दान यात ।



श्री दीपङ्कर भगवान् यात तथा आर्य्य भिक्षु संघे न्तिन
दीपावती नगरस लक्ष्मी थकु' ब्रह्मचारी स्त्रीनं
क्षीर पूर्य्यगु पिण्डपात्र दान यागु चित्र ।

एवं प्रकारं दुःखिनी छद्म मिसां श्रद्धा भक्ति तथा
 पिण्डपात्रे निरामिष क्षीर पूर्ण याना दान याःगु खना
 श्री दीपङ्कर भगवान् खुसि जुया श्रद्धा दान काय् धुंका
 जन्म-जन्मस सद्वर्म ज्ञान प्राप्त जुया मोक्ष गति लाय्मा
 धका शुभाशीर्वाद विया विज्यात ।

लक्ष्मीथकुं ब्रह्मचारी मिसां तथाऽस्तु धका त्रिप्रद-
 क्षिणादि याय् धुंका प्रणाम याना जिगु मनोरथ थों पूर्ण
 जुल धका अत्यन्त खुशि जुया च्वन । थथ्ये भक्ति तथा
 दान याःगु खना सोया च्वंपिं अथवा न्यंपिं सकसिनं थ्व
 दुःखिनी लक्ष्मीथकुं ब्रह्मचारी मिसायात धन्य धन्य धका
 प्रशंसा याना च्वन ।

तदनन्तर अनं प्रस्थान याना श्री दीपङ्कर भगवान्
 सर्वानन्द राजाया थास विज्यात ।

महाराजा आश्चर्यचाया श्री दीपङ्कर तथागतया
 चरणस भोवुया ल्हाः हाज्वलपा चिन्ति यात ।

भो भगवन् सर्वज्ञ नाथ छलपोल निमन्त्रणा यानाद्ध
 जि खः, जिगु थास न्हापालाक विज्याना दान मकास्ये
 छ ॥ दुःखिनी मिसाया थास न्हापालाक विज्याना दान

कया विज्यात, जि खना छुं दिक् जुया विज्याना ला ?
जिजा छुं अपराध यानागु मद्ध्यं च्वं । थुकीयागु हेतु
गथ्ये खः आज्ञा दय्का विज्याहुं ।

एवं प्रकारं महाराजां विन्ति याःशु न्यना, श्री दीपङ्कर
तथागतं आज्ञा दय्का विज्यात ।

हे राजन् ! थुकी छं छुं दुःख ताय मते, संखा नं छुं
काय् माःगु मद्दु, छ खना जि दिक् ज्वीमागु नं मद्दु, जि
दिक् जुयागु नं मस्सु, छं छुं अपराध याःशु नं मद्दु, जि
थन हे वे धका वयागु नं खः । कारण छगू छु धाःसा-
थुद्ध मिसाया थःहे नय्गु तोनेगु आहार चूमलाद्ध, सुं जहान
परिवार धकानं मद्दुद्ध, उकीसनं विवाह मजुसे बाजा बने
धुंक्कूम्ह ब्रम्हचारी जुया दुःखसिया च्वंम्ह मिसा खः । वं
थःगुहे शरीर दुःख सिया कष्टनया कपाया चःति पालिस
हाय्का उमेर बने धुंक्कूम्ह उकीसनं मिसा जाति परया बुँ
ज्या याना वामा, छोमा सिना हया, बहु परिभ्रम व अति
कष्टं कमाय् याना तःगु वस्तु दान याय् धका चिन्तना
याना च्वंगुनं ताकालं दत्त, केवल थ्व मिसां अष्टमी पर्व
कालस उपोषढ व्रत धारण याय्ध्यं मनं व्रत याना धन
मदुसां श्रद्धाभक्ति तया, थौंया दिनस दान याय् धका

तयार जुया चन । दुःखिन्ह जूया निन्ति छुं हिकमत
 याय् मफु, अनाथ सुं साहिता नं मदु । दुःखिया दैव
 साहिता ज्वी । उकिं जि श्वयागु छेँक्वे वयागु खना
 हतासनं क्वहाँ वया आदर तया श्रद्धाभक्ति पादार्य्य
 पूजादि क्रम याना जि व आर्य्य भावक संघ भिक्षुपिन्तन
 श्व दुःख मिसां पिण्डपात्र निरामिष क्षीरं पूर्ण याना दान
 यात । उकिं जि श्वयागु श्रद्धाभक्ती न्हापालाक ग्रहण
 यानागु खः ।

छगू खँ हानं श्व मिसां थें थुलि तक परिश्रमं दुःख
 सिया कमाय् याना तःगु वस्तु, धन द्रव्य इत्यादि मखुगुलि
 लिपा जक वसां छुं सन्देह मदु धका विचार याना थन
 वयगु लिपा लात खः । थुकी आश्चर्य्य ज्वीमागु छुं मदु,
 दुःख मन याय् मागु नं मदु । एवं प्रकारं काय कष्ट
 धैगु हे श्व खः सीकी धका आज्ञा दय्कुगु खँ न्यना काय
 कष्ट, तप तथा परिश्रमगु धन सम्पत्ति दान याःगु विषये
 खँ श्वीका महाराजा सर्वानन्द खुसि जुया आर्य्य संघ
 भिक्षुपिसं सहित याना विज्याम्ह तथागत श्री दीपङ्कर
 भगवान्यात लक्ष्मीथकुं ब्रम्हचारी मिसां दान याःगु दिन
 श्रावण शुक्लया अष्टमी खुन्हु हे पुनर्वार सर्वानन्द राजां
 श्री दीपङ्कर भगवान् प्रमुख आर्य्य संघगणपिन्त पादार्य्य

याना योग्यानुसारं दान शालास विज्याका न्हापायानागु
थें विधिवत् पूजा याना पिण्डपात्रस क्षीर पूर्ण याना द्वितीय
(निकःगु) पञ्चदान याना विज्यात ।

श्रद्धानुसारं व्यूगु दान काय् धुंका सर्वानन्द राजा
तथा अनच्चर्षि सकलयात सद्बर्नोपदेशया खँ कना,
आशीर्वाद बिया भगवान् श्री दीपङ्कर तथागत राज
दरवारया दानशालां पिहाँ विज्याना न्हापा च्वनागु
स्थान प्रसन्नशील महाविहारेतुं लिहाँ विज्यात ।

थनंलि सर्वानन्द राजां विचार यात । गध्ये धाःसा-
काय कष्ट याना दान पुण्य याःगुयात तप धाइ । तप
समान तःधंगु पुण्य मेगु मदु । केवल दानपारमितां पूर्ण
याय्त शरीरं दुःखसिया तप समानगु काय कष्ट याना
कमाय् यानागु धनं छकःनं दान धर्म याय् माल धका
चिन्तना याना थःस्त्री महारानी धर्मावतीनाप सल्हायाना
साधारण मनुष्य थें च्वक थःगु राजगृहं पिहाँ विज्याना
ग्राम—ग्रामान्तरस चाःउला विज्यात ।

थनंलि छगू गामे ज्येष्ठ महीनास लोहकार (कौ)
छम्हसिया मिया रापस च्वना नग्वारा ह्याउँक छुया तःगोगु
नमुगलं दाया म्ह छम्हं चःति सोसो वय्का ज्या याना

च्वंगु खन । उगु समये सर्वानन्द राजां थुगु ज्यार्थे काय
कष्टगु ज्या मेगु जिं मखना धका मती तथा लोहकार
(कौ) या ज्या याना च्वंगु थासे द्वाहाँ विज्याना
आज्ञा दय्कल ।

हे लोहकार ! छ याना च्वंगु ज्या खना जिं नं ज्या
यायगु इच्छा जुल । छं जित्तः छगू-निगू ज्या यायगु ब्यू ।

थथ्ये साधारण छल्ल मनून ज्या यायगु ब्यू धाःगु न्यना
लोहकारं धाल । हे मनुष्य ! छि सु, गनं बैल्ल, छिगु नां
छु, छिगु छ्येँ गन ? छिं थ्व ज्या याय् फैला ? थाक्ती ।

थथ्ये लोहकारं धाःगु खँ न्यना पुनः राजां धाल ।
हे लोहकार ! जि थ्व देशया राजा खः, छं ज्या याना
च्वंगु खना जि अत्यन्त खुसि जुल । उकिं आः जिं छकः
नं छं याना च्वंगु ज्या यायगु इच्छा जुया छं थाय् ज्या
याय् धका गोप्यरूपं थन वया थ्व खँ स्वैतनं कने मते ।

थथ्ये राजां आज्ञा जूगु खँ न्यना लोहकारं प्रणाम
याना विन्ति यात- भो महाराज ! छलपोलं थ्व ज्या
याय्त थाकुई । छाय् थुजोगु कष्ट नया विज्याय् त्यना ?
थ्व कार्य्य छलपोलं याय् फैमखु ।

पुनः राजां आज्ञा जुल, श्व ज्या जि निश्चयमेवं
याय त्यना, ज्या धैगु यायां फयावं, ज्या याय फैमसु
धैगु लु नं दैमसु छंसीकी । जि काय कष्ट याना कमाय्
यानागु द्रव्यं छकः दान धर्म यायगु इच्छा जुल इत्यादि
माक्व खं कना लोहकारयात चित्त बुझे याना राजा व
लोहकार (कौ) मिले जुया गोप्यरूपं ज्या याना बिज्यात ।



सर्वानन्द राजां काय कष्ट हसीकेत लोहकार (कौ) नापं
चवना धर्मं कौ ज्या याना बिज्यागु चित्र ।

सर्वानन्द राजा लोहकारया छ्ये विज्याना ज्यायायवं
 न्हापाया चौभागं ज्या चूलाना धन सम्पत्तिनं बुंगाले
 लः बुया बह थें बढे जुया बल । एवं प्रकारं खुलातक
 ज्या याना विज्याबले आपालं धन-द्रव्य (रूप्य) दां प्राप्त
 जुस्येलि राजाया मती आःला जि न्हापायाथ्यें श्री
 दीपङ्कर बुद्ध भगवानयात पिण्डपात्र दान याय्त (रूप्य)
 दां गात धका भाःपा, राजां लोहकार (कौ) यात
 आज्ञा दय्का विज्यात ।

हे लोहकार ! छंगु दयां जि नं थ्व काय कष्टगु ज्या
 याना जिगु इच्छा पूर्वक धन (रूप्य) दां कमाय् याय्
 धुन । आः जिगु मती इच्छा जूथ्यें श्री दीपङ्कर भगवान
 यात पूजा, पिण्डपात्र दान याय्त गात । आः जि
 दरवारे लिहौ वना दान धर्म याःवने, छनं वया छुं दान
 धर्म याःवा । जि छन्त निमन्त्रणा विया हय्गु जुल ।
 दान धर्म यानागुलि तःधंगु पुण्य लाभ ज्वी । शीसं थुगु
 जन्मस कमाय् यानागु धन सम्पत्ति न्हाको हे दुसां तोता
 वने मानि धका छं सीकि । परलोकस धन सम्पत्ति कल्याण
 यायि मखु, पुण्य कमाय् याना तय् कत धाःसा जक
 कल्याण ज्वी । उकिहे जि नं थ्व काय कष्ट याना द्रव्य
 (रूप्य) छकः मुंका युगु हे द्रव्य दान याना, पुण्य लाभ

याना परलोकस कल्याण ज्वीका परयात नं सुख बी धैगु
इच्छा याना । हे लोहकार ! छं थ्व खँ सद्धर्मोपदेशया
खँ खः धका सीका मेपिन्त नं कनेगु सो । एवं प्रकारं
लोहकार (कौ) यात उपदेश बिया चित्त बुझे याना, थःगु
राजगृहस लिहाँ बिज्याना, थःस्त्री धर्मावती महारानीयात
वृत्तान्त खँ कना बिज्यात ।

हे प्रिये, धर्मावती ! जिं काय कष्ट याना कमाय्
यानागु धन-द्रव्य खर्च याना हानं छकः न्हापायाथ्ये
पिण्डपात्र दान (पञ्चदान याये धका तःचोकं शरीरं
कष्ट नया केहि धन कमाय् याना हय् धुन । थुगु धनं
पिण्डपात्र दान याय्गु जुल । थ्व ज्याय् छ नं काय
कष्ट याना ग्वाहाली याय् मा धका आज्ञा जुल ।

थय्ये थः स्वामी आज्ञा जगु थुगु खँ न्यना महारानी
खुसि जुया विन्ति यात । भो प्रभू स्वामी ! छलपोल
जुलं धन्य धन्य खः, छलपोलया मनोरथ पूर्ण याना
बिज्याहुं । थुगु कार्य निर्विघ्नं सफल ज्वीमा, जिं नं
थुगु ज्या याय्गुलि तत्पर जुया ग्वाहाली याय् । स्वामीया
भिगु कार्य याय्गुलि विघ्न याय्द्वि अथवा याय् मते
धका गनीद्वि, मभिगुलि याकीद्वि स्त्री, असत्यद्वि मिसा

खः । मभिगुलि गना, भिगुलि थमं धदत विया कार्य्य
याकील्ल स्त्री, सत्यल्ल मिसा खः । छलपोल थुगु ज्या
यायगुलि तत्पर याना विज्याहुँ । थथ्ये महारानीं सुवचनं
विन्ति याःगु खँ न्यना महाराजा खुसि जुया आज्ञा जुल ।

हे प्रिये, धर्मावती ! धन्य धन्य धाय छन्त खः ।
आः थुगु कार्य्य तत्कारणं यायगु जुल धका थुलि
आज्ञा जुया मन्त्री प्रभृति मेमेपिं नं प्रजागणपिं सःना
आज्ञा दय्का विज्यात ।

हे महामन्त्री, प्रजागणपिं ! जि हानं न्हापा याना थें
पिण्डपात्र दान याय् त्यना, थुगु कार्य्यस छिमिसं माक्व
सामाग्री तयार याना ग्वाहाली याना ब्यू । थुगु पुण्यं
सकलया जयमङ्गल ज्वीमा । एवं प्रकारं आज्ञा जगु खँ
न्यना मन्त्री प्रभृति प्रजागणपिं सकसियां सतो हर्षमान
याना तथाऽस्तु हे महाराज, छलपोलया मनोवाञ्छा पूर्ण
जुया जयमङ्गल ज्वीमा ।

जिमिसं थुगु भिगु कार्य्यस पक्कनं ग्वाहाली याय्
हुं धन्दा कया विज्याय् स्वा धका विन्ति याना (पञ्चदान)
पिण्डपात्र दान याय्गु कार्य्यस माक्व सामाग्री तयार
याना न्हापाया दुगल्ली बाँलाक दान याय्गु स्थान दान

शाला तयार यांना पुनर्वार मन्त्री प्रभृति सकल प्रजापि मिले जुया विन्ति यात ।

भो महाराज ! छलपोलं आज्ञा जगु थें जिमिसं मामागु सामाग्री फुकं तयार याय् धुन स्वया विज्याहुं । थथ्ये सकसिनं विन्ति यागु सँ न्यना महाराजा सुसि जुया सकभनं विचार यांना स्वयालि मामापिन्त मामागु चीज-बीज बिया चित्तबुझे यांना विज्यात ।

धुगु अवस्थास सुज्ञविज्ञपि गुरुपिनिगु वचन न्यना, महाराजां माक्व देवतादिपिनिगु प्रतिमा बोयेका, ध्वजा पताकादि चिंकिनी जाल प्यना, थाय्थासे पूर्णघट स्थापना यांना शास्त्रानुसारं दानशालास चतुर्माहाराजापिनिगु चिन्ह धृतराष्ट्र, विरूढक, विरुपाक्ष, कुबेर, ध्वंजराज, खड्गराज, छत्रराज, वीणराज इत्यादि प्रतिमा खाया, हानं दशदिग लोकपालगणपिनिगु चिन्ह पूर्वे इन्द्र वज्र चिन्ह १, दक्षिणे यमराज अंकूश चिन्ह २, पश्चिमे वरुण नाग चिन्ह ३, उत्तरे कुबेर तःसि चिन्ह ४, अग्नये अग्नि देवता मुलाषा चिन्ह ५, नैऋते यक्षराज खड्ग चिन्ह ६, वायुन्ये वायु देवता पताक चिन्ह ७, ईशाने महादेव त्रिशूल चिन्ह ८, उद्धं ब्रह्मा तुफि चिन्ह ९, अधो पृथिवि कलश चिन्ह १० । एवं प्रकारं चिन्ह दुगु प्रतिमा इत्यादि खाया

हानं अष्टमङ्गलया प्रमाणं श्रीवच्छ नागपाश चिन्ह १, पुण्डरीक पलेस्वां चिन्ह २, ध्वज चिन्ह ३, पूर्ण कलश चिन्ह ४, चामल चिन्ह ५, मच्छयुग्म तुयुपिं छजो न्या चिन्ह ६, छत्र चिन्ह ७, दहिनावर्त शङ्ख चिन्ह ८, अर्द्ध चन्द्र चिन्ह ९, सूर्य चिन्ह १० खाया थायथासे दीपावली, अष्टसुगन्ध धूप थना, अत्यन्त शोभायमानं तयार याना, प्यन्हु न्हो यथाविधि आर्यगणपिन्त, लक्ष्मीथकुं व लोहकार सहितं निमन्त्रणा याना दान याय्गु दिन श्रावण शुक्लया अष्टमीखुन्हु प्रातः समये श्री दीपङ्कर तथागत आदि आर्य संघ भिक्षुगणपिं आवाहन याना बिज्यात ।

थुगु आवाहन (निमन्त्रणा) स श्री दीपङ्कर तथागत आदि सकल आर्य भिक्षुगणपिं मुना प्रसन्नशील महाविहारं प्रस्थान याना दीपावती नगरस थ्यंक बिज्यात ।

थनंलि सर्वानन्द महाराजां न्हापाया थें दीपावती नगरया पूर्व द्वारनिसें वसालाया राजगृहे दानशालास थ्यंका श्री दीपङ्कर भगवानंनिसें यथाक्रमं पादार्घ्य बिया (लिचाय्केगु) विधि दुतहया शुद्धगु आशने बिज्याका सुवर्णादि नवरत्नया चूर्ण सहित पोतासं मण्डल चोया यथाविधि रूप पूजादि याना क्रमानुसारं अन्न, वृहि,

परिपूर्णगु पिण्डपात्र, हानं पायस (क्षीर) क्षीर जां पूर्णगु
सुपिण्डपात्र दान (पञ्चदान) तथा फलमूलादि, पक्वान्न
(मधि), चीवर वस्त्र, गृह, क्षेत्र, हस्ति, अश्व रथ, सूचीसूत्र
(मृलसुका), रज्जु (खिप), ग्वल वास, कुसा, तुतां, क्वापा
लाकां, पीठ (क्वपु), पञ्चामृत रस पान (साखति) इत्यादि
पुनः सुवर्ण नवरत्नादि दान-दक्षिणा चिया बिज्यात ।



सर्वानन्द महाराजां कायकष्ट याना लोहकार नाप मिले जुया
ज्या याना कमाय् याना हःगु धन द्रव्यं स्वकःगु
पिण्डपात्र (पञ्चदान) प्रदान याःगु चित्र ।

तत् पश्चात् दुरुस पाक यानागु क्षीर भोजन याका
मुख प्रक्षालन (नुचाय्का) मुख शुद्धि ग्वा, मसला
बिया, पाप देशना, पुण्यानुमोदना याना राज दम्पती
सहित मेमेपि मन्त्री, प्रजालोकपि सकलं छत्राः खेरं तथा,
मुख्य भक्तिजनद्वय लक्ष्मीथकुं ब्रह्मचारी महारानीया नापं
तथा, महाराजं आदरपूर्वक पुलिचुया फेतुना, श्री दीपङ्कर
तथागतया अग्रे च्वना एवं प्रकारं विन्ति यात ।

भो भगवान् ! छलपोलयामु सुवचनमृत न्यना जि नं
काय कष्ट तप याना कमाय् यानागु छुं द्रव्य (रूप्य दां
खर्च याना, थौं छलपोल प्रभृति भिक्षु आय्य संवराणपिन्त
पिण्डपात्र द्रव्यलपा क्षीर भोजन याकागु खः, थुकी
द्रव्यं इत्यादि छुं दुसा क्षमा याना बिज्याहुं । थ्व हे
लक्ष्मीथकुं ब्रह्मचारी मिसायागु श्रद्धा भावभक्ति खना जि
नं हानं छकः थुगु कार्य्य यानागु खः ।

एवं प्रकारं काय कष्ट याना कमाय् याना हःगु
धन-द्रव्यं पिण्डपात्र दान याःगुलि श्री भगवान् दीपङ्कर
तथागत अत्यन्त हर्षमान याना, सर्वानन्द राजा प्रभृति
सकलया खाः स्वया मुमुहुं न्हिला शुभाशीर्वाद बिया
आज्ञा दय्का बिज्यात ।

हे राजन् ! धन्य धन्य छ, छं काय कष्ट याना दुःख
सिया, शरीरं परिश्रम याना कमाय याःगु धन-द्रव्य सुपात्रे
दान यात, थुगु पुण्यानुभावं छंगु मनोरथ पूर्ण ज्वीमा, लिपा
सम्यक्सम्बुद्धया ज्ञान लाना, बुद्धपद लाना लोक रक्षा थाय्
फय्मा । थुगु धर्मया प्रभावं तःधंगु कीर्ति यश, प्यंगु
युगसं स्थीर ज्वीमा, हानं मेमेपिं सकसिनं थथ्ये हे थुगु
धर्म बरावर थाय् फय्मा इत्यादि दान यागु छगु छगूया
पुण्य फल कना, अन च्वंपिं सकलयात सहाय्य फंगु
शान्ति ज्वीगु बोधिज्ञान शान्ति ह्यसोगु अनात्म ज्ञान
निर्वाण मार्ग सद्वर्णपदेश बिया, सकलयात चित्त बोध
साना शुभाशीर्वाद बिया बिज्यात ।

थुगु बेलास, श्री दीपङ्कर आदि बुद्ध भगवान् याके
सर्वानन्द राजा पुनर्बार थुगु प्रकारं विन्ति यात ।

भो भगवान्, जगत् गुरु, सर्वज्ञनाथ ! थ्व पिण्डपात्र
दान यानागुया पुण्य प्रभाव गुलि दु ? गथ्ये-गथ्ये खः ।
न्हापा-न्हापा सुनां-सुनां पिण्डपात्र दान (पञ्चदान) याना
गुवन ? थुगु खं छलपोलं जि प्रभृति थन लक्ष्मीथकुं, मन्त्री
पञ्चालोक सकलयात बोध थाय्पा कारणे, विस्तार पूर्वक
आज्ञा दय्का बिज्याहुं धका विन्ति यात ।

थध्ये राजां विन्ति याःगु खँ न्यना श्री दीपङ्कर
आदिवुद्ध भगवानं राजा प्रभृति मन्त्री, लक्ष्मीधकुं सकल
प्रजालोकयागु ख्वाः स्वया आज्ञा दय्का विज्यात ।

हे राजन् ! थुगु पिण्डपात्र दान (पञ्चदान) यागु
विषये थुगु खँ जि छिमित संक्षिप्त रूपं कने, छिमिसं
एकचित्त याना मन तथा न्य ।

एव खँ गध्ये धाःसा—

सुवर्णं रूप्यं विविधं धातुजं मृन्मयं वा,
शाल्योदनैः सुपरि पूर्णं सुपिण्डपात्रं ।
भक्त्या ददन्ति सततं जिनसाधिकेभ्यः,
स्यात्तस्य पुण्यमसमं फलमप्रमेयम् ॥

गुह्य ज्ञानि भक्तिजनं यथाविधिरूपं दानशाला दय्का
श्री स्वयम्भू तथागत आदि आवाहन याना, नियम पूर्वक
थुगु सद्धर्म ज्ञान ह्यसीका संम्यक्संम्बुद्ध चर्य्यस समताज्ञान
आर्य्य धर्म प्रकाश याना, दानपारमितादि पूर्ण ज्वीगु
तथागत बुद्ध ज्ञान लाना तरे ज्वीगु, महायान धर्म पिण्ड
पात्र दान, थुगु संम्यक् धर्मस लुँ, वह, सिजः इत्यादि

धातुया वस्तु अथवा चायागु जक जूसोनं (भूगोल प्रमाण) या पिण्डपात्र दयाका थुगु पिण्डपात्रस पायस (क्षीर पूर्ण याना नित्य अथवा ततःधंगु पर्वकालस तथागत आदि भिक्षुगणपिन्त तथा थुजोपि आर्य्य जिन सांघिकगणपिन्त श्रद्धाभक्ति तथा दान यायि, थुगु पिण्डपात्र दान याःगुया पुण्य फल अप्रमेय थुलि दु धका प्रमाण बीगु मदु । गध्ये सागर समुद्रस फिगोल थुलि दु धका प्रमाण बी फैमखु, वध्यंतुं थुगु पिण्डपात्र दान याःगुया पुण्य फल थुलि दु धका प्रमाण बी फई मखु ।

यद्यपि थुगु सम्यक् आर्य्य धर्मस पायस (क्षीर) हे जक पूर्ण याय्मा धेगु नं मदु । शालीओदन उत्तमगु (अन्नसहितगु क्षीर जा) पिण्डपात्रस पूर्णयाना सु ज्ञानि सज्जनं दान यायि वा भोजन याकी, वयात अप्रमेय पुण्य फल प्राप्त ज्वी ।

पुनर्वार श्रद्धाभक्ति दुह दायकं थुजोगु सम्यक् आर्य्यधर्मस पिण्डपात्र दान याःगु ग्राहकं कया, अनेक प्रकारं घृणा याना भोजन मयासे बांछोत धाःसा, थुजोपिन्त तःचोकं पापं लिप्त ज्वी, थुजोपिन्त आर्य्य जिनसांघिक धाय्गु लायेक मज्जू ।

बुद्धिमान् सःस्यूपि शिक्षितपिसं थुजोगु सम्यक् आर्य्य महायान धर्मस दान याःगु पायस (क्षीर) क्षीरजा इत्यादि

भोजनयायि, थुजोपि आर्य्य जिनसांधिक धायगु लायेक ज्वी ।
 थुपिजिनसांधिक सज्जनपि उद्धलोक) स्वर्गलोकस वास याः
 वनी । उकिं थुजोगु कर्मस दान याःगु पायस (क्षीर) अथवा
 शालिओदन (अन्नसहितगु क्षीरजा महाऽमृत भाःपा भोजन
 यायमा । थ्व चिकिचा धंगु भाग्य प्राप्त ज्वीगु मखु ।

न्हापा सत्ययुगे थुगु सम्यक् चर्य्य आर्य्य महायान
 धर्म पिण्डपात्र दान पञ्चदान तथा सम्यक् धर्म इत्यादि
 सर्वसत्त्व प्रियदशन बोधिसत्त्वं गन्धवती नगरे याना वन ।

अनंलि स्वर्णवती देशे स्वर्णकेतु राजां थुगु आर्य्य
 सम्यक् धर्म याना वन, तथा थ्वया पुत्रपि पुष्पकेतु, रसकेतु,
 द्वीपकेतु, चन्द्रकेतु, सूर्यकेतुपिसं याना वन ।

त्रेतायुगस रत्नकोशवती देशे सर्वज्ञमित्र पादाचार्य
 गुरुया उपदेश न्यना, उगु देशया राजा रत्नकेतु महाराजां
 थुगु आर्य्य सम्यक् धर्म पिण्डपात्र दान याना वन ।

तथा वन्धुमती देशे वसुवन्धु महागुरुया उपदेश
 न्यना, उगु देशया राजा इन्द्रपृष्ठ महाराजां नं थुजोगु
 सम्यक् आर्य्य धर्म पिण्डपात्र दान याना वन ।

थुजोगु सम्यक् आर्य्य धर्म दानपारमितादि पूर्ण ज्वीगु
 महायान धर्मस मुख्य पापया मूल हिंसादि कर्म (परव्राणीया

जीव घाटक) यायगु तोता अष्टशील अथवा दशशील
पालन याना, जगद्धिताय सुखाय लोकानुकम्पाय ज्ञानं
खंका याय फय्के माल । थुगु धर्मे थःनं, परनं कल्याण
जुया तत्कारणं उद्धार जीव धका आज्ञा दयका राजा प्रजा
सकलयात आशीर्वाद विया दानशालां पिहाँ विज्याना
पुसन्नशील महाविहारेतुं लिहाँ विज्यात ।

थनंलि सर्वानन्द महाराजा, धर्मावती महारानी, सुबुद्धि
मन्त्री प्रभृति पूजालोक सकलयां श्री दीपङ्कर आदि बुद्ध
भगवानं आज्ञा दयका विज्यागु सदमोपदेश भिगु सँ न्यना
खुसि जुया, हानं थुगु धर्म यायगु वाञ्छा याना प्रजा-
पिनिगु सहयोग कया, सत्य, व्रता, द्वापर तथा कलि प्यगु
युग उदय जूगु प्रमाणं क्रमानुसारं कार्तिक शुक्लया जुगादि
नवमी, माघ शुक्लया पुन्ही, वैशाख शुक्लया अक्षय तृतीया
श्रावण शुक्लया अष्टमी वा श्रावण कृष्णया त्रयोदशी खुन्हु
थुजागु पर्व-पर्वकालस श्री दीपङ्कर आदिबुद्ध प्रमुख वसपोलया
शिष्य भिक्षु संघपिन्त निमन्त्रणा याना पिण्डपात्र प्रदान
याना, बारम्बार श्री दीपङ्कर भगवानं न्यगु आशीर्वाद
फया, पुनर्बार हानं माघ संक्रान्ति (ध्यो, चाकु, हामो सन्हू)
खुन्हु श्री स्वयम्भू, श्री दीपङ्कर आदिबुद्ध प्रमुख वसपोलया
शिष्य भिक्षु संघपिन्त निमन्त्रणा याना सम्यक् संबुद्ध चर्य्य

आर्य्य सम्यक् धर्म दानपारमितादि पारंगत ज्वी फैगु महा-
यान धर्म प्रकाश याना सकल लोकपिन्त क्यना विज्यात ।

उगु समये श्री दीपङ्कर सम्यक्सम्बुद्ध भगवानं राजा
रानी मन्त्री प्रभृति सकल पूजालोकपिन्त शुभाशीर्वाद विया
बेला कया लोक हितया निम्ति शीलवान् गुणवान्पि
भिक्षु संघपिन्त थनतुं तोता वसपोल श्री दीपङ्कर आदिबुद्ध
भगवान् न्हापा गुगु प्रकारं गनं नेपाल मण्डल ललित
पट्टन नगरे उपस्थित जुया विज्यागु खः, उगु हे प्रकारं थः
न्हापा विज्याना च्वनागु अकनिष्ट भुवनेतुं लिहाँ विज्याना
जगतोहिताय सुखायया निम्ति छुं बेला-वखतस पिहाँ
विज्याय्गु याना निरन्तर समाधियोगस च्वना विज्यात ।

थनंलि सर्वानन्द राजां दीपावती नगरया प्रजागण-
पिन्त सुख आनन्द याय्या कारणे सुविज्ञ अष्ट सिद्धिदुर्षि
वज्राचार्य द्वारा नवनाग साधन याना तःधंगू पुखु छगू-
हिति गृधाः, तूं गुंगः दय्के विया, थुलि धुस्यलि वास्तु
सहित विहार निगू शोभायमान ज्वीक लक्षणं पूर्ण याना
निर्माण याना विज्यात ।

निगू विहार मध्ये छगू विहार प्रथम शील महाविहार
धका नामाकरण याना, पूर्वाऽभिमुख याना भूतकाल न्हापा

जुया विज्याह धका अशोभ्य तथागतया मूर्ति स्थापना
याना विज्यात ॥ १ ॥

हानं छगू विहारे पद्मश्रीनाम महाविहार धका नामा-
करण याना उत्तराऽभिमुख याना समयानुकूलं विज्यायिह
आदिवुद्ध श्री दीपङ्कर तथागत भगवानया मूर्ति स्थापना
याना विज्यात ॥ २ ॥

पुनर्वार हान श्री दीपङ्कर तथागत भगवान् विज्याना
धर्मोपदेश त्रिया, शील प्रदान याना विज्यागु दीपावती
नगरया समीपस च्वंगु पुलांगु प्रसन्नशील विहार नं न्हापा
स्वयानं धाँलाक जीर्णोद्धार यानालि अत्यन्त मनोरम
ज्वीक गुंगः चैत्य सहित लक्षणं सयुक्त याना, गुंगूतला
(गुंत पौ । जाय्का थुगु देवालये उत्तराऽभिमुख याना
भविष्यकाल (लिपा कलि) स सप्त तथागतं क्वय् च्याह्म
भगवान् तथागत जू विज्यायिह मैत्री बोधिसत्वया मूर्ति
स्थापना याना विज्यात ॥ ३ ॥

एवं प्रकारं देवालय विहारादि स्थापना याय् धुस्यंलि
नित्य पूजादि कर्म याय्ग विधिसूचकं दय्का, पुलांगु जीर्णो-
द्धार यानागु प्रसन्नशील महाविहारे श्री मैत्रीय बोधिसत्वया
अग्रस श्री धर्मधातु व स्वयंभू चैत्य छगः नं स्थापना याना,
थुगु स्थाने अहोरात्र चैत्य व्रत दंका, थमनं दना, आश्विन

शुक्लया पुन्हीखुन्दु उगु स्थाने पुलंगु स्वयम्भू, चैत्य, देवा-
वतार इत्यादि बुद्ध मूर्ति दक्ष प्रदक्षिणा याना, पूजा याना,
थुगु महायान सद्वर्मचर्या लिपा ध्यंकं स्थीर ज्वीमा, सकल
सत्त्वप्राणीया जयमङ्गल ज्वीमा धका थुगु वॅला विधि न
न्हापालाक थन न्यायका क्यना विज्यात ।

थुगु प्रकारं दीपावती नगरस सर्वानन्द महाराजां
धर्मावती महारानी, मन्त्री आदि सकल प्रजालोकपि
सहित याना जगत्हिताय जगत्सुखाय लोकानुकम्पाय
कामना याना, लिपा ध्यंकं थुगु सद्वर्म चर्या स्थीर ज्वीमा,
थुगु धर्मया प्रभावं प्रजालोक सकलयां आनन्द जुया उद्धार
ज्वीमा धका मनं भाःपा, ताकालं दिन हना दान प्रदान
याना च्वच्चं छन्हुया दिने सर्वानन्द राजा स्वर्गवास जुया
विज्यात । थनंलि स्त्री धर्म क्षस्यूद्ध धर्मावती महारानी
स्वामीया देह नापं च्वना सहगामी सती वन ।

अथ स नीयते राजा सदारा सह मन्त्रिभिः ।
आकाशे वायुना पुष्प ययुः स्वर्गं भ्रम यथा ॥

उगु समये आकाशमार्ग पुष्पवृष्टि याका, राजा रानी
निष्कं पुष्प विमाने च्वना स्वर्गलोकं च्वय् तुषिता भुवने वास
याः विज्यात । थुगु धर्म सकलया जय कल्याण जुल ।

लिपा लक्ष्मीथकुं, मन्त्री प्रभृति मृत्यु जुया वस्यंलि
गथ्ये आकाशे फसं स्वां व्वय्का यनी वथ्यंतुं पुण्यर पी वाथु
नाप भ्रमण याना क्रमशः स्वर्गवास याः चन धका जेतवन
महाविहारे विज्यात्त श्री शाक्यमुनि भगवानं शालिपुत्र
महाभिक्षु प्रभृति सकल सभालोकपिन्त कना विज्यात ।

हे शालिपुत्र ! ध्व दीपावती नगर, न्हापा थन श्री
दीपङ्कर भगवान् दीप स्वरूप जुया अकनिष्ट भुवनं (आकाश
मार्ग) क्वहाँ विज्याना ज्वःगु स्थान जूया निन्ति दीपावती
नगर धका थौं तक नां प्रख्यात जुया च्वन ।

थुगु नगरया समीपस च्वंगु प्रसन्नशील धका नामो-
च्चारण जुया च्वंगु महाविहारे श्री दीपङ्कर आदिबुद्ध
भगवान् उपस्थित जुया विज्यासॅलि ध्वसपोल विज्याकेत
ल्लिक हानं मुशीलानन्द महाराजां निर्माण याःगु, उगु
विहारे विज्याना श्री दीपङ्कर आदिबुद्ध भगवानं सकलयात
प्रशन्न याना, पुनः शील पूदान याना विज्यागु स्थान
जूया निन्ति, थौंया अद्यापि पूसन्नशील महाविहार धका
नां प्रख्यात जुया च्वन तिनि ।

अनंलिपा सर्वानन्द राजां वास याना, थुगु विहार
हानं बांलाक दय्का, गुँतपौ तथा जाय्का, थुगु विहार

(देवालय) निर्माण याना वंगु जूया निन्ति, थौंतक थुगु स्थानयात गुईतः धका नां प्रख्यात जुया च्वन ।

गुह्यजा ब्रह्मचारी लक्ष्मीथकुं (मय्जु छ्वा मिसां भक्तिपूर्वक श्री दीपङ्कर भगवानयात पृथम पिण्डपात्र (पञ्चदान) याःगु दिन श्रावन शुक्लया अष्टमीखुन्हु खः । थ्व हे दिने श्री दीपङ्कर भगवानयात सर्वानन्द राजां नं पिण्डपात्र दान याना वंगु दिन जूया निन्ति थौंया अद्यापि थ्व हे दिन श्रावन शुक्लया अष्टमी खुन्हु, ललितपट्टनम पिण्डपात्र दान यायेगु धिति (चलन) जुया च्वन ।

किंशुक बने बोधिसत्त्व स्वरूप ज्ञानाकर नाम माकः जन्म कया माकतय्त उद्धार याःगु, अनंलि थ्व हे माक ज्ञानाकर मनु जुया नं मृत्यु जुयालि, पुनः कामार्थी नगरे भुवनानन्द सार्थवाहया पुत्र धर्मश्री बालक धाय्का जन्म कया, क्षिता च्वंगु स्थाने १६ दं दुह्म, थुह्म बालकं श्री दीपङ्कर भगवानयात पांगु (धू) दान याःगु, तत् पश्चात् थ्व धर्मश्री बालक मृत्यु जुया, पुनः दीपावती नगरस जन्म कया सर्वानन्द राजा धाय्का याना वंगु, भिंगु कर्मया धिति-विधिया खँ फुकं थुगु स्थाने (दीपावती नगरे) थौंया अद्यापि तकं चले जुया च्वंगु गुंला श्रावन महिनास प्रतिमादि बिलपौ (पौभा) स च्वया तःगु चित्र, दशाकुशल

पाप याःपिसं भोग याःगु खँ बोया क्यना तैगु सकलयाके
विदित जुया च्वंगु नं दु धका श्री शाक्यमुनि भगवान्
बुद्धं श्रावस्ता नगरे जेतवन महाविहारे विज्याना, शालि-
पुत्र महाभिक्षु प्रमुखं सकल सभालोकपिन्त स्वया, श्व
सर्वानन्द राजा मेल्न मखु, जि हे खः धका थः न्हापा
जन्म कया अनुभोग याना वयागु स्वीनिगु जातक मध्ये
थुगु छगू सर्वानन्द राजाया जातक (जन्मचरित्र) या खँ
खः धका कना सद्धर्मोपदेश बिया विज्यात ।

थुगु खँ न्यना, थुगु स्थाने वास याना न्यना च्वंपिं
सकलया मन बोध जुया चित्त प्रशन्न याना, सकसिनं
श्वसपोल सर्वानन्द महाराज धन्य धन्य खः । थुजोगु
दुःख-मुख अनुभोग याना जन्म कया, धर्म याना क्यना
अनुत्तर बोधिज्ञान लाना श्री शाक्यमुनिबुद्ध भगवान् धायका
सकल लोकयात हित मुख ज्वीगु सद्धर्मोपदेश बिया सकलया
गुरु जुया विज्यात्त छलपोल धन्य धन्य खः धका प्रशंसा
याना सकलया थःथःगु मन आनन्द याना च्वन ।

इति श्री कपिदाऽवदाने श्री दीपङ्कर तथागताय सर्वानन्द नृपेण
तथा लक्ष्मीयकुं ब्रम्हचारिण्या दीपावती नगरे सम्यक
धर्म प्रथम पिण्डपात्र प्रदान सप्तमोऽध्यायः ॥ ७ ॥

अथ दान गाथा

धनंलि दान गाथाया प्रशंसा ।

पुनर्वार भिक्षुपृङ्खव शालिपुत्र महाभिक्षु श्री शाक्य-
मुनि भगवानयाके विन्ति यात ।

भगवन् सवविच्छास्ता संघेभ्योऽर्चन यद्विधिः ।
वद मे नाथ सर्वज्ञ सर्वसत्त्वार्थ हेतुना ॥

ओ भगवन् सर्वज्ञ गुरु ! सर्वानन्द राजां श्री दीपङ्कर
आदि बुद्ध प्रमुखं आर्य भिक्षु संघगणपिन्त आदौ (न्हापां)
लिचायका पूजा याना, सुपिण्डपात्र दान याःगु वखतस
श्री दीपङ्कर आदि बुद्ध प्रमुख आर्य भिक्षु संघपि अन दान
काःविज्यापि सकृमिनं एकमतीं लगू स्वर याना दान
वाक्य बांगु, धुकीयागु पुण्य फल गध्ये-गध्ये स्वः धन
जि इत्यादि सकल सभालोकपिन्त बोध याय्या कारणे,
दान यानागुया वर्णना सकलमत्त्व प्राणिपिस सीकेया
कारणे, बोधिज्ञान लाय्या निंति, दानपारमितां परिपूर्ण

यायुया कारणे छलपोलं जिमित कृपा तथा यथाक्रमथ्यं
विस्तार पूर्वक आज्ञा दयका विज्याहुं ।

इति संप्रार्थितं तेन श्रुत्वा सभगवान् प्रभुः ।
शालिपुत्रं सभाश्चापि समालोक्यैवमादिशत् ॥

थथे शालिपुत्र भिक्षुं विन्ति याःगु खं न्यना, श्री
शाक्यमुनि भगवानं शालिपुत्र भिक्षु प्रमुख सकल सभा-
लोकयागु स्वाः स्वया, सकलयात न्यका, दानयागु वाक्य
क्रमशः थुगु प्रकारं आज्ञा दयका विज्यात ।

वाच्ये ध्याःस्नाः-

ओ३ नमः श्री दीपङ्कर सम्यक्संबुद्धाय ।

श्री दीपङ्कर सम्यक्संबुद्ध आदिवुद्ध भगवानयात नमस्कार

❀ ध्यापां वस्त्रालायथु ❀ १

भूमौ दुकूलसुकुमार विचित्रपट्टैः

सन्तारयेत्सुगतसंघं परिक्रमाय ।

येनाप्यते विपुलभोग्य महानिधानं

तेनावनीपतिरभूत्स भवेषु तस्य ॥

सुज्ञानि भक्तिजनं आर्य सुगत बुद्ध, वसपोलया संध
गणपिन्त अति कोमलगु, नाईस्य च्वंगु, चित्रविचित्रयागु
पात वस्त्र भूमिस वसा लाया, क्रमशः दुकया विज्याकई,
व ज्ञानि भक्तिजनया जन्म-जन्मपति सदासर्वदा कालसं
नाना प्रकारया वस्तु, सुवर्णादि धातु तथा रत्नादि
आपालं परिपूर्ण जुया, सन्सारभरया मालिक राजा जुया
जन्म जुई ।

* लिचायकेणु * २

न किञ्चिदुष्णोदक पाद्यमेव च

सुशीतल स्वच्छ सुगधिकं तथा ।

करोति पादौ सुगतस्य श्रद्धया

ततः कुवेरत्वमुपैत्यसौ नरः ॥

सु ज्ञानिजनं श्रद्धा भावभक्ति सहित याना, नाकं
क्वाःगु नं मखु, ख्वाउंगु नं मखुगु, स्वच्छ निर्मलगु सुशी-
तलगु, सुगन्ध वासनां संयुक्तगु लखं आर्य सुगतसंधपिनिगु
तुती आदर तथा लिचायकी, व ज्ञानि भक्तिजनया
लिपायागु जन्मस कुवेर समानं धन ऐश्वर्य दुल्ल जुई ।

* पादाध्यायः * ३

पञ्चामृतैः पञ्च सुगन्धरत्नैः

लाजाक्षतैः कुराडसदुग्धतोयैः ।

ये चार्घ्यं पादौ प्रकुर्वन्ति संघे

ते प्राप्नुवन्ति सुखसन्निधानम् ॥

गोक्ष ज्ञानि सज्जनपिसं श्रद्धाभक्ति तया, शङ्खस
पञ्चामृत, पञ्चसुगन्ध, पञ्चरत्न, ताये, आखे द्वाफोस्वां,
सादुरु, लखं सहित याना, दक्षणा तया, भगवान् तथा
चसपोलया आर्य्य संघगणपिनिगु तुति पालिस, अर्घ विया
पूजा याना दुकया विज्याकई, बल्ल ज्ञानि सज्जनपिसं
लिपायागु जन्मस तःधंगु कुले जन्म जुया आपालं
सुखभोग याना चने दई ।

* इलां प्यनेशु * ४

वितानमुच्चैः वितनोति संघैः

त्रिलोक देवासुर सिद्ध वन्द्यः ।

यो दीप्तदेहो सुविशाल वंशः

सद्धर्म देहो हृदिजप्रजेता ॥

सु ज्ञानिजनं आय्य सुगत संघपिन्त विज्याकेगु पु
 बांलाक इलां प्यना. वया क्वसं विज्याका सत्कार या
 उल्ल ज्ञानिजन लिपा तःधंगु कुले जन्म कया सद्वर्मा
 शरीर जुया आपालं धन-जन सुमन्तान दया, स्व
 मर्त्य, पातालस च्वंपिं देव, दैत्य, मनुष्यपिसं धन्य-धन
 धका प्रशंसा याका, मान्य याका च्वने दर्ई ।

* आसन तयशु वा लासा लायशु * ५

पर्यङ्क विस्तर अलंकृत तूळिकापू
 दिव्यासनं शमित दोष गणोत्तमेभ्यो
 कन्दर्प दपं विजयी वरबोधिज्ञानं
 संप्राप्यतेऽमृतपदे मृदु पीठ दत्तं ॥

गुह्य ज्ञानि भक्ति दुह्य सज्जनं गणमध्ये उत्तम जुया
 छुं दोष मदुपिं शान्त स्वभाव जुया विज्यापिं आय्य
 संघगणपिन्त फेतुना च्वनेत लायिकगु अत्यन्त शोभायमान
 जूगु सिंहासनादि आसन तया अति कोमलगु नाईस्व
 च्वगु लासा लाया, फेतुका विज्याकई, उल्ल ज्ञानि सज्जन
 सकल मारयात जितेयाना उत्तमगु बोधिज्ञान लान
 मोक्षपद लाईल जुई ।

* धाः भण्डल थिलेगु * ६

कीलाल धाराक्षत मण्डलंये

कुर्वन्ति सत्संघ परिक्रमाय ।

ते श्रो समृद्धाः सुगुणाभिरामाः

प्राप्यन्ति नेता दिवि भूतले च ॥

सु सज्जनपिसं आर्य सुगत सघपिन्त परिक्रमध्यं
ज्याका वसपोलपिनिगु न्द्योने लखं धाःमण्डल थिला
याई, व सज्जनपिन्त आपालं ऐश्वर्य बहं जुया बांलागु
प्रकाश जुया स्वर्ग व पृथ्वीया मालिक जुया च्वनेदै ।

* पोतासं च्वयेगु * ७

सुपीत वासापित भूमिमण्डले

परिक्रमाय प्रकरोति लीलया ।

तथागतस्यार्य गणोत्तमाऽग्रत

वासोपमं सद्य मही भुजेश्वरः ॥

सु ज्ञानिजनं गणे उत्तम जुया विज्यापि आर्य सुगत
पिनिगु न्द्योने नवस्त्त वा पञ्चस्त्त, सुवर्ण चूर्ण अथवा

धुजोगु मिले याना तैगु, लोहचूँ, जाकिचूँ आदि ह्यासुगु
पोतायचूँ नं मण्डल चोया श्रद्धाभक्ति पूजा याई, व ज्ञानि
भक्तिजनयात थुगु पुण्यं तत्कालं शुद्धगु भूमिस वास लाना
सकल लोकपिनि दक्षिणवाहु जुया च्वनेदै ।

* धुं वा धुपाज्जं च्याका क्यनेण वा
न्होने गोआस तियेण * ८

धूपोऽयं घ्राण संतर्पं दिव्यगन्ध सुसंयुतं ।

जिन संघाऽग्रतोदयात् भवन्ति भद्र सर्वदा ॥

गुह्य ज्ञानि भक्तिजनं तथागत वसणोल संघगणपिनि
न्होने अत्यन्त नस्वागु सुगन्ध वासनां संयुक्तगु, नतुनेगु
योग्यगु, धुं वा धुपाज्जं च्याका क्यना वा न्होने गोआस
तिया पूजा याई, उह्य ज्ञानि भक्तिजनयात सदा सर्वदा-
कालेसं शुभ कल्याण जुई ।

* आकिस्वां होलेणु * ९

विकीर्यते येन सुपुष्प चाक्षताः

मुनीन्द्र संघार्य्य गणोत्तमाग्रतः ।

भवन्त्यसौ कान्ति वपुर्धनाधिपं

प्रबुद्ध बुद्धत्वं पदं ययो सुधीः ॥

सु ज्ञानि भक्तिजनं श्रीगुनीन्द्र तथा वसपोलया उत्तम
आर्य्य संघगणपिनिगु न्होने च्वना उत्तमगु, नस्वागु, स्वां
जाकि होला पूजा याई, उद्ध ज्ञानि भक्तजनया थुगु जन्मस
यश कीर्ति बढे जुया लिपाया जन्मस अति तेजवन्त,
धैर्य्यवन्त, महाधनाद्यद्ध जुया, आपालं सःद्ध स्पृद्ध महा-
ज्ञानिद्ध जुया बुद्धत्व पद प्राप्त जूवनी ।

* सिन्हः तिकेशु * १०

श्रीखण्ड कुंकुम सुशोभित चन्दनानि
कुर्वन्ति ये सतिलकान्सह बुद्धसंघे ।
ते प्राप्नुवन्ति जगति तिलको पमत्वं
सौन्दर्य्य रूप पृथुदिव्य विशाल वंशः ॥

गुह्य ज्ञानिजनपिसं भक्ति तथा बौद्ध तथा आर्य्य
संघगणपिन्त श्रीखण्ड, कुंकुम, रक्तचन्दन, गौलोचन
इत्यादि सुगन्धं सहितगु नस्वागु सिन्हल तिका पूजा याई,
थुजोपि ज्ञानिजनपिं लिपा तःधंगु वंशे जन्म कया, जगते
सकलया लुं सिन्हथ्यं दिव्य सुन्दरगु रूप लक्षणं संयुक्तगु
शरीर जुया आपालं धन सम्पत्ति ऐश्वर्य्य, यश-कीर्ति नां
दुद्ध जुई ।

* केशर-शील, कस्तुरी-कपू सिन्हलं लेपन यायुगु * ११

काश्मीर शीलं मृगनाभि सुगन्धिद्रव्यं

ये सौगतस्य वपुसि प्रतिलेपयन्ति ।

ते शुद्धवंश विपुलं च सुगन्ध देहं

वासो भवन्ति परमभोग महानिधानम् ॥

सु ज्ञानिजनपिसं तथागत भगवान् आर्य्य संधगणपित
काश्मीरज केशर शील, कस्तुरी कपू इत्यादि नाप छ्यानागु
सिन्हलं शरीरे लेपन याना पूजा याई. थुजोपि ज्ञानिजनपि
लिपा तःधंगु भिगु कुले जन्म जुया सुगन्ध वासना व गु
शरीर जुया महाधनाद्य जुया, आपालं सुखभोग याना
चवनेदै ।

* लुँचि 'लुँ सिन्ह' * १२

स्वर्णस्य तिलकं संधे श्रद्धया यच्च दास्यति ।

उग्रतेजोऽभिवर्णस्य त्रिभवे सप्रजायते ॥

सु ज्ञानिजनं भगवान् तथागत आर्य्य संधगणपित,
सुवर्ण तिलक 'लुँ सिन्ह' लुँचितिका भक्तिपूर्वकं पूजा याई
थुल्ल ज्ञानि भक्तिजन लिपाया जन्मस, स्वर्ग-मर्त्य-पाताले

अतिनं तेजवान्ज्ञ, लुं सिन्हभ्यं उज्ज्वगु बांलागु शरीर
जुया जन्म जुई ।

❀ अजंका अथवा कोखागा ❀ १३

रज्ञोपवीतं सुकुमार वासं

सम्पादयन्तोह गणोत्तमेभ्यो ।

भृयिष्ठकोष समवाप्य भूयः

ते प्राप्नुवन्तीन्द्र पदं विशालं ॥

गुह्य ज्ञानिजनपिसं तथागत वसपोल गणे उत्तम जुया
च्वंपि संघगणपिन्त जजकां कोखायका अथवा सुकोमलगु
कोखागां न्येका, भावभाक्ति तथा पूजा याई, उह्य ज्ञानि-
जनपिं लिपायागु जन्मस उच्चगु कुले जन्म जुया इच्छानुसार
बारंवार धन द्रव्य प्राप्त जुया ततःधगु दान धर्म याय्फुह्य
जुया स्वर्गयो राजा इन्द्र तुल्य पराक्रमं संयुक्त जूह्य जुई ।

❀ जात जातया एवां, एवांभाः ❀ १४

गो वारिजं विविध पुष्प सुभन्धि युक्तं

श्रद्धान्वितं सुमनसा प्रतिपादयन्ति ।

ये सौगतस्य सहसासन सांधिकेभ्यो

ते प्राप्नुवन्ति अवनीश्वर राजलक्ष्मी ॥

शुद्धगु लखं वा भूमिं वुया वःगु स्वांभास होगु स्वां
 जी स्वां, चमेलि स्वां, चस्वां, यलफो स्वां, सुकुन्दराज स्वां
 इत्यादि अनेक प्रकारयागु स्वां लुका वा पासलं होला
 अथवा माःहना कवखायका, सु ज्ञानि भक्तजनपिसं सुगत
 वा सुगत सासनया आर्य्य संघगणपिन्त पूजा याई, व
 ज्ञानि भक्तजनपि लिपाया जन्मस लक्ष्मीं वासयागु स्थानस
 पृथ्वी मण्डलया मालिक, राजा तुल्य जुया साधु महाज्ञानि
 जुया जन्म जूवनी ।

❀ नैवद्य ❀ १५

नैवद्यं यत्सुरान्धिः त्रिभुवन महिते
 श्री धनस्यार्य्य स धे ।
 स यच्छति त्रितीशैः मणिकनकभरैः
 वन्दयत्यर्थं नित्यं ॥

सुज्ञानिजनं भक्तितया त्रिभुवनं पूजा याका विज्याद्ध
 सुगत वसपोलया आर्य्य संघगणपिन्त नैवद्य छाया पूजा
 याई, व ज्ञानिजन लिपाया जन्मस सुवर्ण-रत्नादि धन द्रव्यं
 भरिपूर्ण जुया पृथ्वीया मालिक जुया च्वंपिसंनं सकसिनं
 न्हिथं मान्य याका च्वनेदै ।

* पञ्चामृत * १६

गोदुग्धसर्पि मधु शर्करादि

पञ्चामृतं ये समर्पयन्ति ।

ते प्राप्नुवन्तीह सुखोपभोग्यं

सौन्दर्यरूपो गुणवान् भवन्ति ॥

सु ज्ञानिजनपिसं सादुरु, ध्यो, कस्ति, धौ, साखः
आदि तथा पञ्चामृत अर्पण याई, उल्ल ज्ञानिजनर्पि सुन्दर
रूप बांलापि जुया गुणवान्पि जुया अनेक सुख भोग
याइपि जुई ।

* भधि * १७

पक्वान् पिष्टिकादिश्च ददाति येन श्रद्धया ।

लभ्यते तेन सौभाग्यं सर्वदुःख निवारणम् ॥

गुल्ल ज्ञानि मनुष्यं श्रद्धातया जिन संप्रगणापिन्त
व्यले लुनागु पुरि, मधि इत्यादि अर्पण याई, उल्ल ज्ञानि
मनुष्यं सदां दुःख लुं मद्गु सौभाग्य सुख भोग फल
लाई ।

* फल-भूषण * १८

फलमूलानि सर्वाणि स्वादु सुरस संयुतः ।
अर्पयन्ति यथा संघे तथा फलं प्रलभ्यते ॥

सु ज्ञानि भक्तजनं सुगत आर्य्य संघगणपिन्ति नाना
रसं सहित जुया च्वंगु, सुस्वादगु फल-मूल अनेक गध्ये
अर्पण याई, अध्येतुं व ज्ञानि भक्तजनयात फल-मूल भोग
याय्गु सदां प्राप्त जुई ।

* अष्ट सुगन्धादि धूप यनेषु * १९

सांयोजिकं सहज सौरभ धूपवासं ।
भक्त्याददंति सुगताय ससांधिकेभ्यो ।
ये प्राप्नुवन्ति विपुलं धनधान्य भोग्यं
सम्बुद्धमव्यय पदं खलु ते लभन्ते ॥

गुह्य ज्ञानिजनपिसं भक्तितया सुगन्ध वासना कःगु
श्रीखण्ड, कर्पूर, कस्तुरि इत्यादि अष्ट सुगन्ध सहितगु धूप
थना सुगत बुद्ध वसपोलया संघगण सहितयातनं पूजा याई,
उह्य ज्ञानिजनपिं लिपाया जन्मस आपालं धन द्रव्य भोग
याय् दुपिं भाग्यमानिपिं जुया, महाकरुणा दुपिं दातापिं

जुया लोक हित याना, गवलेसं नाश मज्जीगु, बोधिज्ञान
प्राप्त जुया क्रमशः अर्हत् सम्यक्सम्बुद्धत्व पदनं प्राप्त जुई ।

* ध्यो वा चिकंथा भत बोणु वा क्यनेणु * २०

तैल्लज्यल्लिसं खलु दीपयष्टीं

ये सांघिकेभ्यो प्रतिपादयन्ति ।

संदर्शनीयो नयनाभिरामाः

भवन्ति ते दिव्य सुखोप भोग्याः ॥

सु भक्तिजन ज्ञानिपिसं ध्यो वा चिकने बुला, इता
च्याका अथवा देवा-दलुखे ध्यो-चिकं, इता तथा दीपावली
याना मत च्याका तथा दीपयष्टि, महादीप च्याका, श्री
बुद्ध भगवान्यात, वसपोलया आर्य्य संघगणपिन्त पूजा
याई, धुजोपि भक्तिजनपि लिपाया जन्मस अत्यन्त स्वे यैपुगु
बांलागु मिखा जुया दिव्यशरीर जुया अनेक आनन्द सुख
भोग याईपि जुई ।

* ताये—अवोर होलेणु * २१

ल्लज्जात्तत ससिन्दूर अद्धाभक्ति सर्मान्वतः ।

विकीर्यते सुसंघेभ्यो प्राप्नोति त्रिदशलये ॥

गुह्य ज्ञानिजनं जिन आर्य्य संवगणपिन्त श्रद्धा भाव-
भक्ति तथा तावे-आखे, सिन्दूर-अवीर, स्वां सहित पासल
होला पूजा याई, उह ज्ञानि स्वर्ग भुवने वनिह जुई ।

* दक्षिणा * २२

सौवर्ण रौप्य ताम्रं वा मुद्रा नर्मित दक्षिणाः ।
संघेभ्यो यदप्यच्छेति तस्याधिक फलं लभेत् ॥

गोह्य ज्ञानिजनपिसं श्रद्धाभक्ति सहित याना आर्य्य
संवगणपिन्त लं, वह वा सिजया दक्षिणा अर्पण याई, उकिया
फल अधिक, असंख्य, संख्या मदुगु पुण्य फल प्राप्त जुई ।

* जाकि पुजायावे * २३

कृताञ्जलि पुटं कृत्वा पुष्पाक्षत सुसंयुताः ।
अर्चयेत् जिन संघेभ्यो प्राप्नोति प्रार्थितं फल ॥

सु ज्ञानि भक्तिजनं स्वां, जाकि, तावे, अवीर इत्यादि
तया लाहानिपां मिले याना पलेस्वांया मुखुर्य्य ज्याना
विन्ति याना, थःगु इच्छा फोना तथागत, वसपोलया
संवगणपिन्त होला पूजा याई, व ज्ञानि भक्तिजनयात
इच्छा पूर्वकं वं फोंगु फल प्राप्त जुई ।

* बुलि पूजा प्रशंसा जुह ७

धर्मलि पिण्डपात्रादि दान

❀ पिण्डपात्र ❀ २४

सौवर्णं रूप्यं विविधं धातुजं मृन्मयं वा

शाल्योदनैः सुपरिपूर्णं सुपिण्डपात्रं ।

भक्त्या ददन्ति सततं जिन साधिकेभ्यो

स्यात्तस्य पुण्यमसमं फलमप्रमेयम् ॥

सुवर्णयागु, वहयागु अथवा मेगु नानाप्रकार्या धातु यागु वा चायागु मात्र जूसान पिण्डपात्रस भिगु अन्नं परिपूर्णं याना अथवा क्षीरजा पूर्णं याना श्री भगवानयात तथा वसपोलया आर्य्य संघगणपिन्त सु ज्ञानिजनपसं भक्ति तथा दान याई, धुजोपि ज्ञानिजनपिन्त धुगु पिण्ड पात्र दान यागु पुण्यया फल अप्रमेय (धुलि दु, उलि दु धैगु) संख्या याय् थाकुगु फल प्राप्त जुई ।

❀ ब्रीहि (वा, धौ इत्यादि) ❀ २५

ब्रीहिं च धान्यं भुविसर्वजातं

श्रद्धान्वितं यः प्रददाति संघे ।

इष्टं फलं तस्य भवेत् सुनित्यं

सर्वार्थं कामं समुपैत्यसौ नरः ॥

वा, छो, क्यूगु, माय, म्वा इत्यादि पृथ्वीनं बुया
 वःगु जात जातया ब्रीहि, सु ज्ञानि भक्तजनं श्रद्धातया,
 जिन सांघिकपिन्त दान याई, थुजोगु ब्रीहि दान याःझ
 भक्तजनयात थुगु पुण्यं लिपाया जन्मस सकल ज्याखसं
 मनंतुनागु तक सकतां सफल ज्वी ।

* निसला * २६

जातो भवेदुच्च कुले सुशीले

धीमान्नराणामति वीक्षणीयः ।

प्रासादिको धीर सुखी सुवर्णः

नैवद्य पूषार्द्रक वै प्रदानात् ।

सुगत संघगणपिन्त सुतां वजि, मधि, पालु, फल
 सहित तया निसला दान याई, वं सदां सुखिगु, बांलागु
 शीलम्बभाव दुगु, तःधंगु कुले जन्म जुया विद्वान्पि मनुष्य
 पिनि अति प्रेमद्व जुया सुखभाग यायदै ।

* पक्कवान्न (लड्ड, मधि इत्यादि) * २७

जाडूक पूषकर मण्डक पूरिकाश्च

सम्यक् ददाति मनसा च विधान युक्तं ।

भोगेश्वरो भर्वात ये भुविशान्त मान

सत्काय वाक्व मनसा जिन सांघिकेभ्यः ॥

सु ज्ञानिजनपिसं श्रद्धातया बांलाक शुद्धरूपं मनं
गोसाग्वया दय्कागु लड्ड, मालपुवा, स्वारी, पुरी, मनभोग
इत्यादि विधिविधानयागु ऐंथ्या, गोगु मधि, चाकु मधि,
आदि श्री भगवान्यात, वसपोलया ओर्य्य संघगणपिन्त
श्रद्धाभाव तया दान याई, थुजोपिं ज्ञानिजनपिं लिपाया
जन्मस थ्व पृथ्वी मण्डले आपालं ऐश्वर्यस सुखभोग याय्गुलि
मालिक जुया शान्त स्वभावगु चित्त जुया महाभाग्यमानी
ज्जी ।

* गुलः वासः * २८

नठयाधि दुःखं नच वृद्ध भावं

आरोग्यता नित्य मनन्त भोग्य ।

भवेत्सुधीरः सुविशाल वंशः

भैषज्य दानाल्लभते मनुष्यः ॥

सुनां सुगत संघगणपिन्त श्रद्धाभक्ति तया हल, विहल,
अम्बः, मले, पिपी, सूं, इमू, जो थ्व च्यातां सहितगु गुटिका
दय्का (गुलः) दान याई, थुगु पुण्यं वयात लिपायागु जन्मस

निरोगी जुया आपाल आयुर्दा दया, दुःख मदया सदानं
 ल्यायुद्ध ल्यायेथ्ये जुया, सकसिनं मानेयाका, धीर गम्भीरद्व
 महाज्ञानिद्व जुया, आपालं धन सम्पत्ति सन्तान दुद्व जुया
 यश कीर्ति प्रकाश जूद्व जुया सुखभोग याइद्व जूवनी ।

* फल, स्कन्द-मूल * २९

धात्री हरितकीरम्भा चूतञ्च पनसादिकम् ।
 स्कन्दमूलादिकं दानं यथेप्सितं फलंलभेत् ॥

सु ज्ञानिजन भक्तिभाव दुद्वसे भगवान् आर्य संघपिन्त
 भूमिं च्वे सःगु अम्ब, हल, केरा, अं, फंसि, वटहर, तःसि
 झमसि, सन्त्रासि, पावि, बःस, तुसि आदि ह नं भूमि
 क्वे दुगु सकि, हि, लै, वडां आदि फल, स्कन्द-मूल
 दान याई, वयात मनं तुनागु इच्छा फुकं पूर्ण जी ।

* सतु-धुं * ३०

भृष्टं यवादिकं चूणं सक्तुञ्च सुप्रसाधितं ।
 संघेभ्यो यः ददातीह पुष्टेन्द्रियो भविष्यत ॥

सु ज्ञानिजनपिसं सुगत संघगणपिन्त यवादि तछो,
 छो, जाकि आदि सिया क्यलागु सक्तुचुं दान याई, व
 ज्ञानिजनपिनि इन्द्रिय पुष्ट जुई ।

❀ शर्करा पान (साखति) ❀ ३१

यत्पानं वर्णगन्धं प्रभृति गुणयुतं
कल्पितं तृद्विनाशि ।

श्लेष्माघातोष्ण वातः प्रशमन चतुरं
पिप्पली खण्ड चूर्णं ॥

ग्रीष्म प्रालेयभिन्नं शशिकर सदृशे
भाजने संस्थितं तत् ।

दत्त्वा संघे प्रभक्त्याऽमरभुवन गतो
दिव्यमाप्नोति पानम् ॥

सु ज्ञानि भक्तजनं तथागत आर्य्य संधगणपिन्त निर्मल
स्वादु गु लखे मले, पिपी, शू, एला, सुकमेल, दालचिनी,
साखः अथवा चिनी तथा अत्यन्त स्वादं युक्त याना
दय्कागु, प्यास हटये ज्वीगु, वात-पित्त, कफ यागु पीडा
यात याकनं नाश याइगु साखति ताह्या, चिकुलायातं
मिलये जूगु यन्चुसे च्वंगु थले तथा श्रद्धाभाव तथा दान
याई, शुद्ध ज्ञानि भक्तजनया लिपायागु जन्मस सदानं
निरोगी जुया हृष्टपुष्ट सुन्दरगु आनन्द शरीर जुबा लोके
सकलया प्रेम जुयका स्वर्गस देवभुवने च्वना दिव्य अमृत
पान भोग याना च्वने दई ।

* क्षीर भोजन * ३२

माहिष्य गो रसवरं कनिकान्वितं ये
वैकृत्य तण्डुल महौषध चोदनं वै ।

तस्मै ददाति सततं जिन सांघिकेभ्यो
ते प्राप्नुवन्त्यतुल भोग्य सराजलक्ष्मीः ॥

सुनां तथागत व वसपोलया संधगणपिन्त सायागु वा
मेयागु दुरुया सास्स नैक्या, छोरा, पेस्ता, दाँख, वडां,
एला, सुकमेल, दालचिनी, तेजपत्र, (ऐश्वर्य रस) तुयागु
रस, साखः, मिश्री आदि मसला तथा वा पञ्चामृत घ्यो.
कस्ति, साखः, सादुरु, साधौ आदिस भिगु शुद्धगु जाकि
तथा पूः सीमदयक पाक यानागु क्षीर जा भोजन याका
सन्तीप याई, थुगु पुण्यं लिपाया जन्मस आपालं सम्पात्ति
दुगु तःधंगु कुले जन्म जुया राज्य लक्ष्मीं परिपूर्ण जुयका
च्वने दई ।

* जल पान * ३३

सुशीतलं स्वच्छं सुगन्धितोयं

स्वादान्वितं ये जघ्नु वारि पानं ।

ददन्ति संधार्य गणोत्तमेभ्यो

तृष्णानवधार्य पदं लभन्ते ॥

सु ज्ञानिभक्तजनं भगवान् आर्य्य संधगणपिन्त शुद्धगु
वांलागु, लःथलस निर्मलगु शीतलगु, सुस्वादगु, हलूकागु,
लखं पूर्ण याना, जल पान यायगु वी, शुद्ध ज्ञानिभक्तजनया
लिपायागु जन्मस तृष्णा (लोभ-प्यास) धैगु गवलेसं लुं
मदया सदानं सन्तोषिद्ध जुया सुनानं निन्दा दोष बोगु
थाय् मदुगु आर्य्य पद प्राप्त जुई ।

❀ सभ्यक् भोजनया फल ❀ ३४

वलवान् स्थान सम्पन्नो राजाभवति धार्मिकः ।

संधेभ्यो भोजनं दत्वा सर्वत्र सुखमेधते ॥

सु ज्ञानिभक्तजनपिसं भक्ति व ज्ञानया वलं संयुक्त
जगु स्थाने वा देवस्थले श्री सुगत तथा वसपोलया आर्य्य
संधगणपिन्त सुआश्रयस विजयाका, आदि देवतार्ति प्रभृति
सुगत संधगणपिन्त यथाश्रद्धा भावभक्ति पूजा याना दान
याना अनंलि प्राणि हिंसा आदि आसिध वजित्तु पाप्मसादि
पञ्चामृतं संयुक्तगु क्षीर (ओदन) जा भोजन याका

सन्तोष याई, थुजोपि ज्ञानि भक्तिजनपि लिपा न्द्यागु
स्थाने जन्म काःवंसां उगु स्थाने अति बलवान्छ सुख,
ऐश्वर्य, आनन्द संयुक्तञ्च बरा धर्मात्माञ्च राजा जुया
आनन्दं सुख ऐश्वर्य भोग यानो, लिपा बुलुहुँ सम्यक्संबोधि
ज्ञान नं प्राप्त ज्वीछ जुई ।

* नोचायकै ३५

कर्पूरमोदाभिसुगन्धितोयः

प्रज्ञाजनाय सुखपान विशुद्धिताय ।

ददन्ति ये च सुगतेभ्यो भक्त्या

संशुद्धवंश विपुलं च सुगन्ध देहम् ॥

सु ज्ञानि भक्तिजनं श्रद्धामक्ति तथा सुगत तथा वस-
पोलया संघगणपिन्त इच्छानुसार भोजन याकै धुंकालि
कर्पूर, श्रीखण्डादि, सुगन्ध वास्ना दुगु, स्वच्छ निर्मलगु
लखं (हस्त-मुख-प्रक्षालन) लाहा, श्दुत, शुद्ध यायेया
निर्ति लाहासिकै, नोचायकै, थुजोपि ज्ञानि भक्तिजनपि
लिपायागु जन्मस शुद्धगु वंशे प्रख्यातञ्च बुद्धिमान् जुया,
शरीरस सुगन्ध वापनां संयुक्तञ्च जुया जन्म ज्वनी ।

❀ मुखशुद्धि (ग्वे श्वे भक्षला) योग ❀ ३६

भोगाधिको नपनपथो सुगन्धिवाक्य

श्लेष्मादि रोग पारमुक्ति मनोज्ञवानी ।

चित्त प्रसन्न विरहो दिविजन्म भागी

तांबूल पूग गण संयुत वै प्रदानात् ॥

सु ज्ञानिभक्तजनं श्रद्धाभाव तथा सुगत संघर्षपिन्त
भोजन याका नोचायके धुंकालि मुखशुद्धिया निम्ति ग्वा,
श्वे आदि नयेगु मसला यला, लवं, दालचिनी, सुकमेल,
नैक्या, छोरा, बडां, दाँस, मिश्री इत्यादि अर्पण याई,
उक्त ज्ञानि भक्तजनया श्लेष्मादि, कफ-वात-पित्तयागु
रोगं मुक्त जुया, निरोगी जुया, सकतां संह जुया, वं खँ
लहाइगु वाक्य सकलयात प्रेम जुया, सकलें खुशी याना
ताकाल चित्तयात आनन्द याना च्वना, अन्तकाले मृत्यु
जुस्यंलि स्वर्ग भुवने जन्म जूवनीक्ष जुई ।

धरति आश्रम विषये दानः—

❀ ध्वज, पताका, चाभल सहित विविधविचित्रगु

गेह (छे) ❀ ३७

विविध ध्वजपताकालंकृतं दिव्य गेहं

विदधति सहस्रार्ये बुद्ध संघेषु भक्त्या ।

प्रचरति दिविनन्द्या सौख्ययुक्ता विमाने

मनयति महिपत्या भोग्यमाना वतस्थे ॥

सु ज्ञानि धर्म चित्तोत्पत्तिश्च श्रद्धावान्महत् भक्तजनं श्री
मुगत, वसपोलया आर्य्य संघगणपिन्त च्वनेत योग्यगु
अत्यन्त मनोहर जुइक छै दयका ध्वात्रे स्वाना, पता
बोयका, च्वामो घण्ट इत्यादि खाया, अनेक प्रकारया
चित्र विचित्रं शुभशोभायमान ज्वीक वालाका छायपा
श्रद्धाभावं दान याई, व ज्ञानि श्रद्धावान्महत् भक्तजनया
लिपाया जन्मस देव भुवने जन्म जुया विमाने च्वना थः
इच्छा दुर्धर्ये स्वर्ग भुवने चाःहिला नन्दन बने हिता सकल
देवलोकपिस मान्य याका मालीक जुया आनन्द पूर्वक
स्वर्गयागु सुखभोग याना च्वने दई ।

* क्षेत्र (बुं) * १८

क्षेत्रं नानाभिरूयात फलमपि सहितं

सर्वं शस्याभि पूर्णं ।

मौनीन्द्रस्यार्य्य संधि सहगण सहिते

येन श्रद्धा प्रसज्जत् ॥

संधेभ्यो दान पुण्यात् महि सकल भुवं

राज्य बाधीन धृत्य ।

कौवेर्याधिक द्रव्य मसम विभवसु

सम्भवेद्वै सुवृत्त्या ॥

गुह्य ज्ञानि धार्मिक श्रद्धावान् ह्य भक्तजनं श्री मुनी-
न्द्रादि सकल संधगणपिन्त भक्तिभाव तथा नयेत योग्यगु
शस्यादि (वृक्ष, लता, तृण) इत्यादि वा, छो, स्कन्द मूल,
फल उब्जनि जूगु क्षेत्र (बुँ) चक्रमण, विश्राम, स्नान यायत
योग्यगु उद्यान-पुष्करणी (वगीचा, पुखू) इत्यादि पत्र पुष्पं
जलं पूर्ण जुया च्वंगु अत्यन्त मनोहर जुया च्वंगु क्षेत्र श्री
मुगत संधगणपिन्त श्रद्धाभाव तथा प्रसन्नगु चित्तं दान याई,
धुगु दान पुण्ययागु प्रभावं उह्य धार्मिक श्रद्धावान् ह्य भक्त-
जनया लिपायागु जन्मस थ्व पृथ्वी मण्डलस गुलि राजधानी
(नगर) दैच्वन, उलि दक्क राजधानी थःगु अधीन जुया
कुवेरयासिनं अप्पो धन ऐश्वर्य सम्पन्न जुया सकस्यानं मान्य
याका सुख आनन्द पूर्वक जीवन वृत्ति याना च्वने दई ।

❀ तुफि लाखि ❀ ३९

मार्जन्युट्घाटनं दानं सांधिकेभ्यो ददा त यः ।

लक्ष्म्यैश्वर्यादि संयुक्तः शीलवान् सः भवेद्भृशं ॥

कर्मानुसारं दान यागुया पुण्यं देवताया राजा इन्द्रयागु
पदवी प्राप्त जुई ।

❀ भिपु-भोति आदि रत्नया माला ❀ ४३

प्रवाल मुक्ताद्यपि रत्नमालाः

संघेभ्यो श्रद्धान्वित ये ददन्ति ।

द्रव्यादिरत्नैः विभवादि पूर्यैः

सौभाग्य कोषैः पुरुषाः भवन्ति ॥

गुह्य ज्ञानिपिसं भिपू, मोति, हिरा, इत्यादि रत्नया
माला, आर्य बुद्ध्या संघगणपिन्त श्रद्धाभावं सहित याना
इच्छानुसारं दान वी, शुजोपि ज्ञानिजनपि लिपाया जन्मस
आपालं धन-द्रव्यादि, रत्न, ऐश्वर्य भण्डार परिपूर्ण जुया
महाभाग्यमानिपि पुरुषपि जुया जन्म जूवनी ।

❀ मकुट-भुजः, भतू-तपुषी ❀ ४४

सर्वे ताथागताङ्गं विचित्रित मकुटं

सर्वरत्नाभि युक्तं ।

श्रद्धाभक्ति प्रसन्ना प्रमुदित मनसा

दास्यति आर्य संघे ॥

तस्मै संपूज्यमान सुरनरसहितैः

स्वर्गमर्त्ये त्रिलोके ।

एवं धर्मस्य स्वामी प्रभवति नियते

सर्वलोकस्य नाथ ॥

सकल तथागतपिनिगु विचित्रित रूपगु पञ्चबुद्धया
चिन्ह दुगु भकुट (तपुली) नवरत्नादि संयुक्त याना सु
ज्ञानिजनं भद्राभक्ति तथा निर्मल शुद्धगु चित्त याना हर्षगु
मनं श्री सुगत आर्य्य सधादिपिन्त दान याई, व ज्ञानि-
जनयात, लिपाया जन्मस देव मनुष्य सहित त्रिलोक
स्वर्ग-मर्त्य-पाताले च्वर्षि सकसिनं पूजा मान्य याका,
एवंप्रकारं धर्मया मालीक जुया, सकल लोकया नाथ
जुया च्वने दई ।

* वज्र-घण्टा * ४५

दम्भोल्लि घण्टा प्रददन्ति आर्य्ये

सुरूपता नित्य प्रहृष्ट चेता ।

मनोज्ञवाणी च सुरानराणां

गन्धर्व विद्या सदृशो भवन्ति

सु ज्ञानि धर्मानुयायी जनपिसं आर्य्य संघगणपिन्त,
 पूजाया निर्मित वज्र-घण्ट अर्पण याई, भुजोपि ज्ञानिजनपि
 लिपाया जन्मस अत्यन्त सुन्दर रूप जुया न्हित्थं प्रसन्नगु
 आनन्द मन जुया, सकल देव मनुष्यया प्रेमगु मनोहर
 वचन जुया देव भुवने मे हाला प्याखँ हुलिपि किन्नरगणपि
 समान जुया जन्म जूवनी ।

* ताभ्रादि विविध भाण्ड (वस्तुजा) * ४६

राजायः चक्रवर्त्तीः धनुशर कुलिशैः

शस्त्र कुन्तादि वेषैः,

नाभिज्ञाः दिव्य देहाः भवति रिपुगणै-

श्चाप्रधृष्य धनाढ्यः ।

प्रायः श्रेयः जिनाय सुरनर गुरवे

ताम्र भाण्डादि दानं,

दद्यात्संघेभ्यरित्थं प्रवर सुरनरात्

याति बुद्धत्वमेषः ॥

गुह्य श्रद्धावान्ता ज्ञानिजनं प्रायः श्रेयः मनया इच्छा-
 नुसारं बुद्धगु, उत्तमगु, सिजः आदि अनेक प्रकारया ली,

कजे धलवत इत्यादियागु वसुजा, देव मनुष्यादि सकलया
गुरु जुया विज्याह, श्री आदि बुद्ध भगवानयात वध्यंतुं
वसपोलया संवगणपिन्त अर्पण याई, उक्त ज्ञानिजन लिपा
यागु जन्मस चक्रवर्ती राजा जुया धनुष-बाण, वज्र मुङ्गल
खड्ग-तलवार, भाला-त्रिशुल आदि शस्त्रास्त्र सहितगु
आपालं रङ्गमञ्च दया, गवलेसं तुटये मजुसे सदां उध्यंतुं
बल्लाना, न्हाक्व वरित मुना संग्राम याः वःमां मुनानं
लिचीके मफुगु, त्याके मफुगु, बल पराक्रम दया, अत्यन्त
सुन्दरगु दिव्य शरीर जुया आपालं वन ऐश्वर्यं परिपूर्ण जुया,
अनेक प्रकारया सुखभोगयाना अन्तकालस देव मनुष्ययानं
ज्येयागु उत्तम पद, बुद्धयागु पदवी वानिह जुई ।

❀ भैषज्य (दासः) ❀ ४७

रोगादिभिः प्रवर दुःखकरैर्विमुक्ताः

स्निग्धाननाः कनक तुल्य मनोज्ञवर्णाः ।

राज्यं हि ये विगत कण्टकमाप्नुवन्ति

भैषज्य दान विधिना तदुसन्ति सधे ॥

सु ज्ञानिजनपिसं श्रद्धा भावभक्ति तया शुद्धगु रूपं
आर्य्य संवगणपिन्त भैषज्य (दासः) दान याई, धुगु

पुण्यं व ज्ञानिजनपि लिपाया जन्मस निरोगी जुया दुःख
कष्ट धैगु छुं मदया सुवर्णया उनध्यें द्वासुसे बांलागु स्वाः
जुया, सकल लक्षणं संयुक्त जुया च्वंगु उच्चगु कुले धन-
द्रव्यं परिपूर्ण जुया शत्रु इत्यादि सुयागुं छुं भय मदुपि
राजा जुया जन्म ज्वनी ।

❀ जाकि, भाये-भू ❀ ४८

विभवाः सर्वासम्पूर्णाः सर्वशस्य समुद्भवाः ।
जिन संघाय योदव्यात्तण्डुलस्य फलं लभेत् ॥

सु ज्ञानि भक्तजनं सुगत आर्य्य सधगणपिन्त श्रद्धा-
भाव तथा जाकि, माय्, मू लहर इत्यादि उत्तमगु अन्न
दान याई, व ज्ञानि भक्तजन लिपाया जन्मस आपालं
धन सम्पत्ति दुल्ल महाजन जुया सकल लोकया प्रेम-प्रीति
दुल्ल जुया जन्म ज्वनी ।

❀ चि ❀ ४९

शुद्ध स्फटिकसंकाशं रस सर्वा समन्वितं ।
लवणं यो ददातिह जोयते योगविन्महान् ॥

सु ज्ञानिजनं सुगत संघगणपिन्त शुद्धगु रसं सहितगु
स्फटिकध्यें तुयूगु चि दान याई, व ज्ञानिजन लिपायागु
जन्मस तःधंगु योगज्ञान सःक्ष स्यूद्ध जुया जन्म ज्वनी ।

❀ चिकं ❀ ५०

प्रसन्नवर्णा मृदुपाणि पादा

महाबलाः शत्रुभिरप्रधृष्याः ।

तैल प्रदानेन भवन्ति मत्स्योः

सुरूपरूपाः सुखमाप्नुवन्ति ॥

श्री सुगतया संघगणपिन्त चिकं दान याःगु पुण्य व
मनुष्यपिनि लिपायागु जन्मस निर्मल रूपगु सुन्दर वर्ण
जुया, कोमलगु लाहातुति जुया, अत्यन्त बलवान् जुया,
दुष्ट जुया च्वंपि शत्रुपिसं छुं याये मफया आनन्दगु सुख
भोग यायेगु प्राप्त जुई ।

❀ पट्ट चीवरादि वस्त्र ❀ ५१

सुपीत रक्ता मृदु चित्र पट्ट

कौशेय वस्त्रावृत चीवरादि ।

नरोत्तमा सर्वाजनैरूपेता

भवन्ति आर्य्ये सुगते प्रदानात् ॥

सु श्रद्धा दुल्ल भक्तजन आर्य्य सुगत संघगणपिन्त
भिगु, बांलागु, नायूगु, बल्लागु, ह्वाउंगु, ह्वासुगु अनेक
रंग-विरंगयागु पाट, रेशमी इत्यादि पट्ट-चीवरादि वस्त्र

दान वी, शुग वस्त्र दान याः शु पुण्यया अनुभावं व श्रद्धा
 दुःख भक्तजन लिपाया जन्मस मनुष्य मध्ये उत्तमद्व, आपालं
 धन ऐश्वर्य दुःख महाभाग्यमानिदं पुरुष जुया सकल लोकपिसं
 मान्य याका महाआनन्दं सुखभोग याना च्वने दई ।

* भुलु-शुका * ५२

धीरोविनीतो मतिमान् वीर्य्य सम्पन्न बुद्धिमान् ।
 सूत्र सूचि प्रदानेन नाभिजानाति दुर्गतिम् ॥

सु ज्ञानिजनं आर्य्य सुगत संघगणपिन्त भुलु-शुका
 दान वी, व ज्ञानिद्व मनुष्य वराबुद्धिमान् जुया आपालं
 पराक्रम दया गवत्येवं दुर्गति धैरु मभिगु गती वनेमाली
 मखु ।

* सलां * ५३

लेखनी कठिनी शुभ्रमृजुं येन प्रयच्छति ।

विशाख बुद्धि पाण्डित्यं जायते भुविजन्मनि ॥

सु ज्ञानि बुद्धिमानद्व भक्तजनं सुगत संघगणपिन्त
 आखः च्वर्य्या निमित्त तुयूगु, तप्यंगु सलां वा कलम मसि
 इत्यादि दान वी, शुद्ध ज्ञानि भक्तजन लिपाया जन्मस
 पृथ्वीमण्डले अत्यन्त प्रख्यातद्व आपालं सःस्पूद्व वराबुद्धि-
 मानद्व महापण्डित जुया जन्म ज्वनी ।

❀ क्वपू-लाकां-तुतां ❀ ५४

पादासनं पादुकं यष्टि दानं

ये सर्व संघेषु ददन्ति भक्त्या ।

दानोत्तमैस्ते सुचिरं प्रयान्ति

देवेषू सत्येषु पदोपपन्ना ॥

सु ज्ञानिजनं श्रद्धाभक्ति तया आर्य्य सकलसंघगणपिन्त
क्वपू, क्वापा लाकां-लाकां, तुतां इत्यादि दान याई,
थुगु उत्तमगु पुण्यं व ज्ञानिजनया लिपायागु जन्मस तुति
यात छुं कष्ट पीर मज्जीक, न्यासि वनेम्बास जुया स्थे
चवना भ्रमण यानालि, अन्तकालस स्वर्गस वास याना
ताकालं सुखभोग याना चवने दई।

❀ छत्र, कुला ❀ ५५

छत्री भूतो भवति जगतां

आत पत्र प्रदानात्,

छायारम्ये वसति सुचिरं

लीलया राज्यलक्ष्मी ।

विश्व स्वामी भवति नियतं
 रूपवान् दिव्य दृष्टी
 नासौ गच्छेत् कुगति गहनं
 छत्र दानात् प्रसूतम् ॥

सु ज्ञानि भक्तजनं श्री सुगत वसपोलया संघगणपिके
 श्रद्धाभाव तथा छत्र अथवा कुसा दान याई, उगु पुण्यया
 प्रभावं व ज्ञानिजन लिपाया जन्मस जगते दक्ख छत्रधारीया
 राजा, संसारया मालीक जुया, अत्यन्त सुन्दर रूपह्व,
 सर्वत्र खंड जुया, ताकालं मनयात अत्यन्त आनन्द शीतलगु
 मनोहरगु छाँयास विश्राम याना, राज्यलक्ष्मी सुखेश्वर्य
 धन-द्रव्य सम्पत्ति भोग याना छत्र दान याःगु पुण्यया
 प्रभावं कुगति मभिगु गतिस गबलेसं जन्म ज्वने माली
 मखु । सदाकालसं सुगतिस जन्म जुया जन्म-जन्म पत्ति
 सुख ऐश्वर्य भोग याना आनन्दं च्वने दई ।

* किंशि, लल, रथ * ५६

गज तुरग रथादि श्रद्धया यः ददाति
 व्रजति शत सहस्रै व्योम्निव चक्रवर्त्ती ।

सकल भुवन वेगं याति शत्रु विनाशं
भवति भुवन सर्वं राजराजेन्द्र सिद्धि ॥

श्री आर्य्य सुगत संघगणपिन्त चंक्रमण दूर यात्राया
निमित्त श्रद्धा तथा अति शोभायमान ज्वीक छाया किंसि,
सल सहित रथ सुनां समर्पण याई, वं लिपायागु जन्मस
आकाशथ्य चक्रवर्ती जुया, छगू समुद्रं निगू समुद्रे वना
आकाशे ब्वया वनीगु वायुयानथ्ये लक्ष प्रमाणं सकल
भुवन भुवन पत्ति महावेगं चाःहिला वना शत्रुत दक्व नाश
याना सकल राजा-राजापिनि मध्ये अति शिक्षितद्ध, सर्व
सिद्धि दुक्त अधिराज जुया सकल भुवन-भुवनया राजा-
राजापिसं मान्ययाय माःक्त सम्राट् राजायागु पद लाइद्ध
जुई ।

❀ अग्नि भायङ्ग-भक्त, दीप-भक्त ❀ ५७

गन्धर्वासुरकिन्नरैः सहचरैः
देदिव्यमानाननैः,
विद्युज्ज्वाल शरच्छशाङ्क सदृशैः
कान्ताभिरालिङ्गताः ।

स्वर्गे यद्विचरन्ति दीप्तवपुषाः

लीलायमानाः सुराः,

दद्यादाय्यं गणाय शीत समये

प्रोज्ज्वालिकाः श्रद्धया ॥

सु ज्ञानिजनं आर्य्यं सुगत संघयात श्रद्धाभाध तया,
चिकु तंकेत ज्वाला दुगुं मकः, ख्यूं लिचीकेत दीप्तिमानगु
मत दान बी, धुल्ल ज्ञानि लिपायागु जन्मस देवलोके
सुन्दर रूपगु शरीर जुया जन्म कया, स्वर्ग भुवने शरद
ऋतुया शीतलगु रश्मि प्रकाश जुया शोभायमान जुया
च्वंल चन्द्रमाथ्ये निर्मल सुन्दरगु ख्याः जुया च्वंपि देव-
कन्या, गन्धर्व किन्नरादि सुन्दरपि अप्सरागणपि नाप
थःगु इच्छानुसार रमण याना स्वर्गयागु सुखभोग याना
च्वने दई ।

❀ शय्या—लासा, कौशा, कुंश इत्यादि ❀ ५८

दिव्यं भोग्यानुरक्तं प्रमुदित हृदयं

चित्र वस्त्रं मनोज्ञं,

शय्यायां दिव्य मय्यां सुरभिपरिमल्लां

मोदवत्यां महत्यां ।

साकं दिव्याङ्गनाभिश्चिरममर पुरे
 शर्मना तत्र शेते,
 यत्तच्छय्योपवर्हं फलमिदमुदितं
 आर्य संधे प्रदद्यात् ॥

सु ज्ञानिजनं श्रद्धाभाव तथा आर्य्य संधगणपिन्त
 घनेत लासा, फांगा, फुंग इत्यादि दान याई, उल्ल ज्ञानि-
 जन लिपायागु जन्मस लासा, फांगा, फुंग इत्यादि दान
 याःगु पुण्यया प्रभावं स्वर्ग भवने प्रादुर्भूत जुया, अन
 अत्यन्त दिव्य सुन्दरीपि, भोग्य विलास यायगुली मत्त
 जुया च्वपि अप्सरागणपि नाप थःगु मनयात प्रेम जगु,
 रुचि जगु, अनेक रंगविरंगयागु, अत्यन्त सुन्दरगु, कोमलगु
 लासास च्वना हर्षपूर्वक सुरत क्रीडा विलास याना, देना,
 ताकाल सुख भोग याना आनन्दं च्वने दई ।

❀ २३री-पुत्र-पुत्रादि ❀ ५९

नाना रत्नादि भूषाः परिष्कृत वसनाः
 दारकः दार कन्याः ।
 स्मृत्वाऽनित्यं भवाङ्ग परिप्लव विभवं
 प्रेम रागश्च त्यक्त्वा ॥

दद्यात्संधेषु भक्त्या जगद्धित हृदया ।

श्रद्धया वै प्रसन्ना ।

एतत्पुण्यानुभावैः त्रयः सत्तरहितं

प्राप्यते बोधिज्ञानं ॥

सु ज्ञानि मोक्षार्थीजनं ध्व सन्सारयागु विषय सम्बन्धी
जि, जिह्वा, जिगु धैगु कला-काय्-मह्याय् इत्यादि धन-
सम्पत्ति दक्व अस्थिर-स्थीर जुया सदां दैच्वनिगु मखु,
अनित्य-नित्यगु मखु. नाशवान् छन्दुया दिने वियोग जुया
मदया बनि धैगु लुमंका, स्त्री-पुत्र-पुत्रीपिन्त नं बोध
याना, प्रेम-प्रीति, राग-मोह-माया दक्वं त्याग याना,
श्री सुगत सषगणपिके प्रार्थना याना, स्त्री पुत्र-पुत्रीपिन्त
प्रव्रजित हे याय्गु वा वसपोलपिनिगु सेवा-शुभूपा याकेगु
या निम्ति नानाप्रकारयागु वसः पुंका, सुवर्ण रत्नादियागु
तिसां तीका, जगत् हितया लागी धन-द्रव्यादि सहितं
श्रद्धा भक्तिभावं प्रसन्नगु, कसिंगर छुं मदुगु, निर्मल
शुद्धगु हृदयं एकचित्त याना दान बिई, धुगु पुण्यया प्रभावं
व ज्ञानिह्न मोक्षार्थीया काय, वाक्, चित्तयागु मल, दशा-
कुशलादि पाप दक्वं निःशेष ज्वीक वर्जित जुया क्रमशः
दानपारमितादि, पुण्य सम्भार-ज्ञान सम्भार परिपूर्ण जुया

लिपा अन्तिमयागु जन्मस बोधिज्ञान लानो निर्वाण पद प्राप्त जुई ।

* दान-दक्षिणा * ६०

यथानुलभ्यते द्रव्यं दक्षिणा यः प्रयच्छति ।
धर्मार्थं काममोक्षं च प्राप्नोति भक्तिमान सः ॥

सु भक्तिमान्नाह ज्ञानिजनं श्री सुगत तथा वसपोलया
संवगणपिन्त थःत लाभ जूगु द्रव्यया भद्रानुभावं दक्षिणा
दान बिई, थुल्ल ज्ञानिजनयात लिपायागु जन्मस धर्म-अर्प
काम-मोक्ष थ्व प्यंगू (चतुर्वर्ग) फल प्राप्त ज्वी ।

* अत्र दानया फल * ६१

अश्वदन्ती सहस्राणि धेनुकोटि शतैरपि ।
कोटि कन्या महादानं अन्नदानं महत्फलम् ॥

सल-किसि द्रःछि-द्रःछि, सा छगू कोटि, सछिगू
कोटि कन्या, महादान यानागुया सिकं अधिकता, पिण्ड
पात्रादि अन्न दान यानागु पुण्यया फल असंख्य, संख्या
यावगु मदु, अगणित गणना यावे मफुगु आपालं पुण्यफल
प्राप्त जुई ।

* प्यंगू युगोदय, पर्वकालया प्रभाश * ६२

कार्तिक शुक्ल नौम्यां च अर्धरात्रौ सत्यः युगः ।
 माघ पूर्णोऽपि मध्याह्ने त्रेतानाम युगोदयः ॥
 वैशाख शुक्ल सन्ध्यायां द्वापरश्च तृतीयकः ।
 श्रावण कृष्ण पूर्वाह्ने त्रयोदश्यां कलियुगः ॥
 एते युगोदये दान दद्याद्वै द्विपदोत्तमे ।
 सर्वेषां पुण्य संख्याऽस्ति तेषां संख्या न विद्यते ॥

कार्तिक शुक्लया युगादि नवमिस्तु वाचाया इले
 सत्ययुग उदय जुल १, माघ शुक्लया पूर्णिमास्तु वानिया
 इले त्रेतायुग उदय जुल २, वैशाख शुक्लया तृतीयास्तु
 सन्ध्या इले द्वापरयुग उदय जुल ३, श्रावण कृष्णया
 त्रयोदशीस्तु सुधया इले कलियुग उदय जुल ४ ।

ध्व प्यंगू युग उदय जगु दिने, द्विपदे सर्वश्रेष्ठ उत्तम
 जुयाविज्यापि आर्य्य श्रीसुगत तथा वसपोलया संघर्षणपिन्त
 पिण्डपात्रादि, अन्न, धन-द्रव्य दान यानागु पुण्यया फल
 असंख्य संख्या मदु, मेमेगु दिने अनेक दानयानागु पुण्यया
 फलयागु संख्या दु, प्यंगू युग उदय जगु पर्वकालया दिने
 दानयानागु पुण्यया फलयागु संख्या मदु । उपमा बिया
 थुलि दु धका गणना याना क्यनेगु छुं मदु, असंख्य ।

शुक्ल पक्षे नभाष्टम्यामुषायामुदयो रविः ।
पिण्डपात्रादिकं दानं स्नानं चापि प्रकल्पयेत् ॥

प्यंगू युग उदय जूगु दिनेध्यंतुं, श्रावण शुक्लया
अष्टमिया दिनेनं सूर्य उदय जूगु समये सुथय स्नान
याना, आर्य्य सुगत संघगणपिन्त पिण्डपात्रादि दान
यानागुया पुण्य फल नं असंख्य । व दिने दान यानागु
पुण्यया फल नं संख्या मदु ।

❀ दानया फल ❀ ६४

दानं विभूषणं लोके दानं दुर्गति निवारणं ।
दानं स्वर्गस्य सोपानं दानं शान्ति करं शुभं ॥

दान यानागु पुण्यया फलं त्रिलोकस नित्यगु तिसा
समानं शोभादै, दान यानागु पुण्यया फलं दुर्गति मर्भिगु
गतिस वास याय माली मसु । दान यानागु पुण्यया
फलं स्वर्गे थहाँ वनेगु लँ (स्वाहाने) सत्तिना वै, दान
यानागु पुण्यया फलं हे सदा कालसं शुभ कल्याण जुया
सकभनं शान्ति-स्वस्ति जुई, दान बरोवर तःधंगु पुण्यया
फल मेगु छुं मदु ।

* अदत्त दानया फल * ६५

अदत्त दानेन दरीद्र भावं
दारिद्र भावेन करोति पापं ।

पापञ्च कृत्वा नरके प्रयाति
नरकादि मुक्तं पुनरेव पापं ॥

अदत्त दान धैगुः— नुगः स्यास्यां वीगु, लोभ यायां कायगु । सुनां दरिद्र भाव याना अदत्त दान वी. वा सुनां काई, अपि सदां दरिद्र यागु हे भाव जुई, व हे दरिद्र यागु भावं याना अमिसं पाप कर्म याई, व पापं याना नरके बनी । नरक आदि यागु दुःख भोगं मुक्त जुस्यंलि नं हानं पाप कर्म हे याना अथ्य हे तुं चा;चा; हिला दुःख भोग याना हे च्वनी, तरे जुया बने फे मखु ।

* दान शील तथा शानया प्रशंसा * ६६

दारिद्र नाशनं दानं शीलं दुर्गति निवारणं ।
अज्ञान नाशनं प्रज्ञा भावना भव नाशनं ॥
शुद्धेन मनसा द्रव्यं यो ददाति यदा पुमान् ।
तत्त्वण कुशलस्कन्ध दानमित्यभिधीयते ॥

सु ज्ञानि महापुरुषं दरिद्र नाश ज्वीगु दान, दुर्गति
नाश ज्वीगु शील, अज्ञान नाश ज्वीगु प्रज्ञा (ज्ञान) संसार
यागु दुःख नाश ज्वीगु भावना, धुलि क्रियां सहित याना
चित्त शुद्ध याना द्रव्य अनेक सामाग्रि, अन्न, धन इत्यादि
दान याई, व ज्ञानि महा पुरुष यात याकनं हे उत्तमगु
पुण्य फल प्राप्त ज्वी ।

* तथा * ६७

दानेन भोगाः नपरोपतापात्
शीलेन स्वर्गं नगिरि प्ररोहात् ।
सत्येन शौच्यं नजले प्रवेशात्
ज्ञानेन मोक्षं न शरीर शोभात् ॥

परहितया निम्ति दान यानागुलि आपालं ऐश्वर्य सुख
भोग याय्दै । परयात दुःख कष्ट ताप चियां सुख भोग
याय्दै मखु । दान यानागु पुण्यया फलं थःत नं परयात नं
हुं हे कष्ट पीर मज्वीक, तःधंगु कुले जन्मजुया सदां सुख
भोग याना च्वने दै । शील पालना याना स्वभाव भिका
जुया गुलि स्वर्गस वना सुख भोग याय्दै । तानागु पहाड
पर्वत गया जुयां स्वर्ग यागु सुख भोग याय्दै मखु । शील

पालना यानां, स्वभाव भिका जुयागु पुण्यया फलं ताजागु
 पहाड पर्वत गया थाकु क तापाक वने म्वायक सत्तिगु लं
 याउं क स्वर्गस वना सुख भोग याना च्वने दै । सत्य धर्म
 धारणा याना गुलिं शरीर, मन, निर्मल शुद्ध जुया संसार
 यागु दुःखं मुक्त ज्वी । लखे दुना न्हित्थं मोल्हुयां जक
 शरीर निर्मल जुया चित्त शुद्ध ज्वी मखु । सत्य धर्म
 धारणा यानागु पुण्यया फल तःव्यागु, तःजागु, ताःहाकगु
 समुद्रे वने म्वायक, चीव्यागु, चीजागु, चीहाकगु नदीं
 सत्तिक याउं क संसार यागु समुद्रं पार वने दै । आर्य्य
 सद्धर्म ज्ञान तोमफीक क्वातुक ज्वनागुलिं याकन निर्वाण
 मोक्ष फल प्राप्त ज्वी । धर्म ज्ञान धका उख्ये थुख्ये मदयक
 पहाड-पर्वत गया देश-विदेश वना चाःचाःहिला शरीरयात
 ताप चिया गंसी जुयका कष्ट नया जुयां मोक्ष वने दै मखु ।
 आर्य्य सद्धर्म ज्ञान बालाक तोमफीक क्वातुक ज्वनागु
 पुण्यया फलं शरीरयात छुं परिश्रम मज्जीक, थाकु मज्जीक,
 आनन्द सुख पूर्वक याकन हे निर्वाण मोक्ष वने दै ।

* नाना वाद्य अनेक वाजा * ६८

मृदङ्ग वीणा पटहादि भिर्ये

कुर्वन्ति पूजां सुगतोत्तमाऽथे ।

सौन्दर्य रूपाः विविधोपभोज्याः

शृण्वन्ति वाद्याः सुमनोज्ञ घोषाः ॥

सु ज्ञानि भक्त जनपिसं श्री सुगत तथा आर्य्य उत्तम
संघ गणपिनि न्द्योने च्वना, पूजा भाव याना, मृदङ्ग,
वीणा, बासुरी, म्वाहाली, पोंगा, काहा इत्यादि पुया
पञ्चताल वाद्य, नव बाजादि अनेक नगरा, टोलक, धाः,
नायखि, खि, कोंचाखि इत्यादि अनेक वाजं थाना, सकल
यात मनोज्ञ शब्द न्यंका श्रद्धा भक्ति तथा सेवा याई,
धुजोर्षि भक्त जनपि लिपाया जन्मस, अत्यन्त सुन्दर दिव्य
मानगु शरीर जुया, सकल लोकपिसं मान्य याका, अनेक
प्रकार यागु ऐश्वर्य भांग याना च्वने दैगु पुण्य फल
प्राप्त ज्वी ।

❀ गीत—वृत्त्य ❀ ६९

सुनादितं ये सुमनोज्ञ वाक्यं

शृण्वन्ति गीतं रुचिरञ्चनाट्यं ।

मनुष्य भूता सुमुखा सुवाक्याः

दिव्याङ्गना हृद्य विहार स्वर्गे ॥

सु ज्ञानि जनपिसं विहारादि तथा देवालये अथवा
 श्री सुगत आर्य संघर्षि विज्याना च्वंगु स्थाने च्वना, गीत
 वाद्य, मेहाला वाजं थाना, व गीत वाद्यया ताले ताल चुकये
 मज्जीक । नृत्य प्याखं हुया अथवा वज्ज्यान सम्बन्ध यागु
 गीत चचा हाला ताः, डमरु, कोता थाना पयें ता पुया
 एक मतीं शुद्धगु शब्दं स्वभाव शुद्ध याना सुन्दर मनोहरगु
 स्वरं गीत न्यंका, थिक्कगु मुद्रा क्यना, सकलयात मन
 रुचि जुयक विस्तारं नृत्य याना, भाव भक्ति तथा, पूजा
 याना सेवा याई, थुजोर्षि ज्ञानि जनर्षि लिया यागु जन्मस
 शुद्धगु म्हुतु जुया, मनोहरग अमृत समानगु वचन, सकस्यां
 प्रेमद्व योद्ध मनुष्य जुया स्वर्गया अप्सरापिनि नं अति
 प्रेमद्व जुया, स्वर्गस वना अप्सरागणपिणि नाप रति क्रीडा
 विलास याना, आनन्दं सुख भोग याना च्वने दैगु पुण्य
 फल प्राप्त ज्जी ।

* पुरय फलया प्रशंसा * ७०

पुरयं नराणां तमसी प्रदीपं

भयेषु रक्षा व्यपनेषु बन्धुः ।

रोगेषु भैषज्यमनुत्तरञ्च

प्रभूत सन्सार महासमुद्रे ॥

पुण्यया फल धैरुः— संसार रूपी समुद्रे दुना अनेक
भय कया दुःख भोग याना च्वर्पि मनुष्य पिनिगु भय
यात रक्षा याइगु । गथ्य धाःसा— बन्ही जूसा मत जुया
विपत्ति जूसा थः गोत्र दाजु किजा जुया, रोग जूसा
भैषज्य भिगु वास जुया, वथ्यतुं मेमेगु छु-छु ज्वीमागु खः
व पुण्य यागु फल उगु उगु फुक ज्वीमागु जुया, सर्वत्र
सकभनं रक्षा याई ।

❀ पुण्य फलया भावना ❀ ७१

ईदृक् पुण्य फलं मत्वा करोति येन भावना ।
तेन सम्यक् पदं प्राप्य ययौ निर्वाण सद्गतिम् ॥

सु ज्ञानि जनं थुगु प्रकारं छगू-छगू पुण्य यागु फल
ज्ञानं विचार याना बाँलाक शुद्ध रूपं लसीका सद्धर्मस एक
चित्त याना भावना याई, उल्ल ज्ञानि जन लिपा यागु
जन्मस भिगु गती जन्म जुया, सम्यक्संबुद्धयागु पद लाना
प्राणि हित याना निर्वाण-मोक्ष बनील जुई धका श्री
दीपङ्कर आदि बुद्ध भगवानं सर्वानन्द राजायात छगू छगू
दान याःगुया पुण्य फल आज्ञा दयका विज्यात ।

★ बुलि दानया पुण्ययागु फलया प्रशंसा ★

* प्रार्थना * ७२

अथ खलु राजा सम्भाषयित्वा

भगवन्तं तमेतदवोचत्तत् ।

अद्य मे सफलं जन्म सफलं जीवितञ्च मे ।

अद्य बुद्ध कुलेजातो बुद्धपुत्रोऽस्मि साम्प्रतं ॥

यथाधुना मयाकार्यं स्वकुलोचित्तकारिणा ।

निर्मलस्य कुलस्यान्य कलङ्को न भवेत्तथा ॥

थनलि सर्वानन्द राजां वसपोल श्री दीपङ्कर आदि
 बुद्ध भगवानयात प्रार्थना याना थुगु प्रकारं थथ्ये चिन्ति
 यात- हे भगवन् ! छलपोल यागु दया कृपां थौं जि जन्म
 जुयागु साफल्य जुल, जि म्बाना च्वनागुयां सार जुल,
 थौं जि बुद्धयागु कुले जन्म जुया, बुद्धया पुत्र जि जुल ।
 आः जि थ्व बुद्ध यागु कुले जन्म जुया थमं याये माःगु
 थःगु कुल यागु उचित्तगु यथा योग्यथ्यं याय् माःगु कर्तव्य
 सत्त्व हितार्य याय्गु ज्या जि याय्, निर्मल जुया च्वंगु थ्व
 बुद्धयागु कुलयात गथ्ये यानां कलङ्क मज्जी, अथ्ये जि
 कलङ्क मदैगु सत्कर्म यागु ज्या याय् ।

❀ आशीर्वाद ❀ ७३

इति राजोदितं श्रुत्वा प्रत्युवाच मुनीश्वरः ।
साधु राजन् त्वया मह्यं सम्यक् दानं प्रभावतः ॥
परा भोन्तु सदा सुखी आयुरारोग्य सम्पदम् ।
पश्चात् बोधिं समासाद्य प्राप्नोतु सुगतपदम् ॥

अथ ये सर्वानन्द राजां विन्ति यागु, श्री दीपङ्कर आदि
बुद्ध भगवानं न्यना आज्ञा दयका विज्यात । साधु-साधु
हे राजन् सर्वानन्द छं युगोदय महान् पर्व कालया दिने
जि प्रमुख सकल आर्य्य संघ गणपिन्त श्रद्धा भाव तथा
पिण्ड पात्रादि सम्यक् दान भोजन याकल, थुगु पुण्यया
प्रभावं छं थुगु जन्मस सदां आयुरारोग्य सम्पत्ति ऐश्वर्य्य
वृद्धि जुया आनन्दं सुख भोग याय दयमा, लिपा यागु
जन्मस क्रमशः बोधि ज्ञान लाना सम्यक्सम्बुद्ध भगवान्
यागु पद लायमा ।

❀ प्रत्यावृत्त (सिहौ विज्यागु) ❀ ७४

एवमेतद्विधानेन देशयित्वा नराधिपम् ।
यथागतस्तथा यातो दीपङ्करो मुनीश्वरः ॥

शुगु प्रकारं श्री दीपङ्कर आदिवुद्ध भगवानं सर्वानन्द
राजायात सुवर्णं पिण्डपात्रादि दानयागु पूजा विधिविधान
सहित दानयागु पुण्य फलया प्रशंसा उपदेश चिया अथ्ये
विज्यागु खः अध्यतुं थःगु भुवने लिहाँ विज्याना वखत-
वखतस पिहाँ विज्यायगु याना सकल सत्त्वप्राणियात हित
सुख ज्जीगु समाधियोगस च्वना विज्यात ।

* चिन्तना * ७५

अथखलु राजा सर्वानन्द महासुधीः ।
निर्दिष्टं श्रीमुनीन्द्रेण स्मृत्वा एवं विचिन्तयेत् ॥

थनंलि महाज्ञानि शुद्धसत्त्व जुया विज्याद्धा सर्वानन्द
महाराजां श्री दीपङ्कर आदिवुद्ध भगवानं उपदेश चिया
विज्यागु सद्धर्म दान याःगु प्रशंसा लुमंका शुगु प्रकारं
मती शुभ चिन्तना याना विज्यात ।

* शुभेच्छा * ७६

किं जन्मना सुगत शासन दान हीनात्
किं जीवितेन शरण्य त्रयः वर्जितेन

तस्माद्विशुद्ध मनसा वपुसा गिराच्च

सम्यक् ददामि सुगताय सुपिण्ड पात्रम् ॥

थौं जिं श्री बुद्ध भगवानयागु शासने दान यागु
हीन याना त्वःतां, जि जन्म जुयागुया सफलता छु दे ? छुं
सफलता दैमखु । श्री त्रिरत्नयागु शरण वजित याना
त्रिरत्नयागु शरण वनेगु त्वःता जि जीविका याना म्वाना
न्वनागुया सार छु दे ? छुं सार दैमखु । अध्यसा कारणे
जि काय वाक् चित्त शुद्ध याना, श्री सुगत बुद्ध भवागन्
वसपोलया आर्य्य संघगणपिन्त श्रद्धापूर्वक आदर भाव
तया जगतोहिताय सुखायया निगित लिपाभयकं थुगु धर्म
स्थीर यायेया कारणे पिण्डपात्रादि अन्न, धन, द्रव्य दान
विया, सम्यक् भोजन याके धका मती शुभ इच्छा याना,
सर्वानन्द राजां सम्यक् सङ्कल्प याना याना वंगु जगत्
कल्याण जीगु, मिगु शुभकर्मया स्थिति-रीति, विधि-
विधान थौंया अद्यापि थ्व नेपाल मण्डले दनि धका
श्रावस्तीनगरे, जेतवन महाविहारे श्री शाक्यमुनि भगवानं
शालिपुत्र भिक्षु प्रमुख सकल सभालोकपिन्त सर्वानन्द राजां
पिण्डपात्र दानयागु समये, श्री दीपङ्कर आदिवुद्ध भगवान्
वसपोलया संघगण सहित सकसिन एकमति छगू स्वरं

बोना बिज्यागु, दानगाथाया छगू छगू वाक्ययागु प्रशंसा
पुण्यफल सहित कना, उगु समये व सर्वानन्द राजा मेझ
मखु जि हे खः धका आज्ञा दयका बिज्यात ।

एवंहि जन्म-जन्मेषू चित्त शुद्धेन कर्मणाः ।

पिण्डपात्रादिकं दानं तेषां पुण्यप्रभावतः ॥

थय्ये जि जन्म-जन्मपत्तिकं जगतोहिताय सुखायया
निम्ति दान धर्म याना वयागु पुण्यया प्रभाव, आः थुगु
समये दुष्टमारयात धर्षण याना, बोधिज्ञान लाना, सम्यक्
सम्बुद्ध भगवान् धायका छिपि सकसिनं गुरु धका मान्य
याका च्वने धुन धका एवंप्रकारं थःगु पूर्वजन्मयागु महिमा
कनालि सकल सभालोकपिन्त पुनः थय्ये आशीर्वाद
बिया बिज्यात ।

* श्री शाक्यभुनि भगवानं आशीर्वाद

बिया बिज्यागु *

पुराजिनेन निर्दिष्टं द्रव्य दानस्य यत्फलम् ।

प्राप्नुवन्तिवह युष्मभ्यं सप्तवृद्धयादिकंमहत् ॥

हे शालिपुत्रादि भिक्षवः, हे सकल सभालोकपि !
परापूर्वकाले श्री दीपङ्कर आदिबुद्ध भगवानं आज्ञादयका
त्रिज्यागु सुवर्ण पिण्डपात्रादि अन्न, द्रव्य सर्वानन्द राजां
दानयाः शु दानया पुण्यफल गुगु खः व छिमिसं जिके
न्यन, जि छिमित कना, आः ध्व दानया पुण्ययागु फलया
प्रशंसा न्यंगु व कनागुया प्रभावं छिमित सप्त वृद्ध्यादि
सम्पूर्ण पुण्ययागु फल प्राप्त ज्वीमा ।

सप्त वृद्धि धंगुः-

आयुर्वृद्धिः यशोवृद्धिर्वृद्धिप्रज्ञाः सुखस्तथा ।
आरोग्य धन सन्तान सन्तु ते सप्तवृद्धयः ॥

आयु, जश, ज्ञान, सुख, निरोग, धन, सन्तान
थुलि छिमित वृद्धि ज्वीमा धका श्री शाक्यमुनि भगवानं
आशीर्वाद विद्या विज्यात ।

इत्यादिष्टं मुनीन्द्रेण श्रुत्वा सर्वे सभाश्रिताः ।
शालिपुत्रादयश्चापि प्रत्यानन्द प्रबोधिताः ॥


यथ्ये श्री शाक्यसिंह भगवानं सुवर्ण पिण्डपात्रादि
अन्न, द्रव्य दानया पुण्ययागु फलया प्रशंसा आज्ञादयका,

आशीर्वाद विया विज्यागु न्यना भिक्षु शालिपुत्र प्रमुख
 सकल सभालोकया चित्त बोध जुया अत्यन्त हर्षमान
 याना, धन्य-धन्य सर्वानन्द राजा धका प्रशंसा याना
 श्री भगवानयागु उपदेश न्यना वसपोलयागु सेवा याना,
 आनन्द मन याना च्चन ।

इति श्री कपिदाऽवदाने पूजा, पिण्डपात्र प्रदान सम्यक्
 धर्म पुण्य-फल वर्णनोनामाऽष्टमोऽध्यायः ॥ ८ ॥

॥ समाप्तम् शुभम् ॥





लेखकया प्रकाश जूगु सफूत-

१. बुद्ध-वृष-जन्म कथा ।
२. सूर्योदय राजाचा कथा ।
३. स्तोत्र दर्पण ।
४. नेपाल वर्ष क्रिया ।
५. बुंगद्यः नेपाले हःगु वंशावली ।
६. गुणवती कथा ।
७. अन्त्य शान्ति क्रिया पुस्तक
८. सर्वानन्द नृप जातक कथा।

मेमेगु नं. पथे हे पिहाँ वेगु जुया ज्वंगु दु ।



सफू कायगु थाय्

यत्त-

भा. अ.- पं. वै आशाकाजी वज्राचार्य अथःननी

प्रकाशक- हर्षज्योति शाक्य गुईतः

चैत्यराज वज्राचार्य भिछे बाहा

आशाकाजी मंगः बजार तगोगं कवय् सफू पसः

ये-

सं.- ज्ञानरत्न वज्राचार्य भोछे लाय्क साः